

觀佛三昧海經

東晉天竺三藏法師佛陀跋陀羅譯



清刻龍藏佛說法變相圖

觀佛三昧海經卷第一

量一

東晉天竺三藏法師佛陀跋陀羅譯

六譬品第一

如是我聞一時佛住迦毗羅城尼拘樓陀精舍爾時釋摩男請佛及僧供養三月七月五

量一

五日僧自恣竟爾時父王閱頭檀佛姨母僑曇彌來詣僧房供養眾僧禮拜既畢奉上楊枝及澡豆已呼阿難言吾今欲往至世尊所為可爾不爾時阿難即宣此言以白世尊佛告阿難父王來者必問妙法汝行遍告諸比丘僧及往林中命摩訶迦葉舍利弗目犍連迦旃延阿那律等彌勒菩薩跋陀婆羅十六賢士一時來會如此音聲遍至諸方爾時天主夜叉主乾闥婆主阿脩羅主迦樓羅主緊那羅主摩睺羅伽主龍主等及諸眷屬皆悉

已集爾時父王及釋摩男三億諸釋入佛精舍當入之時見佛精舍如玻瓈山爲佛作禮未舉頭頃即見佛前有大蓮華衆寶所成於蓮華上有大光臺父王見已心生歡喜歎未曾有遶佛三匝却坐一面是時父王即從座起白佛言世尊佛是吾子吾是佛父今我在世見佛色身但見其外不覩其內悉達在官相師皆見三十二相今者成佛光明益顯踰昔日百千萬倍佛涅槃後後世衆生當云何觀佛身色相知佛光明常行尺度惟願天尊今當爲我及後衆生分別解說爾時世尊入遍淨色身三昧從三昧起即便微笑諸佛笑法有五色光時五色光化五百色從佛口出照父王頂從父王頂照光明臺從光明臺照于精舍遍娑婆界還入佛頂爾時世尊告

父王言諦聽諦聽善思念之如來當說來世衆生得見佛法父王白佛唯然世尊我今願聽佛告父王閻浮提中有師子王名毗摩羅其師子法滿四十年牝牡乃會一交會已跳踉鳴吼宛轉自撲體無損傷其師子在胎之時如父獸王等無有異大王當知欲使胎中便能鳴吼飛落走伏未有斯事父王白佛獸王之子在母胎時頭目牙爪與父相似佛告大王與父無異但其力能不及其父百千萬倍佛告父王如是如是未來世中諸善男子善女人等及與一切若能至心繫念在內端坐正受觀佛色身當知是人心如佛心與佛無異雖在煩惱不爲諸惡之所覆蔽於未來世雨大法雨復次父王譬如伊蘭俱與旃檀生末利山牛頭旃檀生伊蘭叢中未及長

大在地下時芽莖枝葉如閻浮提竹筍衆人不知言此山中純是伊蘭無有梅檀而伊蘭臭臭若膻尸熏四十由旬其華紅色甚可愛樂若有食者發狂而死牛頭梅檀雖生此林未成就故不能發香仲秋月滿卒從地出成梅檀樹衆人皆聞牛頭梅檀上妙之香永無伊蘭臭惡之氣佛告父王念佛之心亦復如是以是心故能得三種菩提之根復次父王閻浮提中及四天下有金翅鳥名正音迦樓羅王於諸鳥中快得自在量一此鳥業報應食諸龍三於閻浮提日食一龍王及五百小龍明日復於弗婆提食一龍王及五百小龍第三日復於瞿耶尼食一龍王及五百小龍第四日復於鬱單越食一龍王及五百小龍周而復始經八千歲此鳥爾時死相已現諸龍吐毒

無由得食彼鳥飢逼周樟求食了不能得遊巡諸山永不得安至金剛山然後暫住從金剛山直下至大水際從大水際至風輪際爲風所吹還至金剛山如是七返然後命終其命終已以其毒故令十寶山同時火起爾時難陀龍王懼燒此山即大降雨澍如車軸鳥肉散盡惟有心在其心直下如前七返然後還住金剛山頂難陀龍王取此鳥心以爲明珠轉輪王得爲如意珠佛告父王諸善男子及善女人若念佛者其心亦爾復次大王雪山有樹名殃伽陀其果甚大其核甚小推其本末從香山來以風力故得至雪山孟冬盛寒羅刹夜又在山曲中屏隈之處糞穢不淨盈流于地猛風吹雪以覆其上漸漸成塹五十由旬因糞力故此果得生根莖枝葉華實

滋茂春陽三月八方同時皆悉風起消融冰雪惟果樹在其果形色閻浮提果無以爲譬其形團圓滿半由旬婆羅門食即得仙道五通具足壽命一劫不老不死凡夫食之向須陀洹阿那含食成阿羅漢三明六通無不悉備有人持種至閻浮提糞壤之地然後乃生高一多羅樹樹名拘律陀果名多勒如五斗瓶閻浮提人有食之者能除熱病佛告大王諸善男子及善女人正念思惟諸佛境界亦復如是復次大王如帝釋樹生歡喜園名波利質多羅天女見之身心喜悅不自勝持帝釋見之即生慾想八萬四千諸婬女等即得樂覺此樹生時曲枝在地即於地下華敷成果其果金色光明赫奕且其華葉終不萎落十色具足開現光明有諸樂音至秋八月從

地涌出高三百三十五萬由旬諸天見之喜悅非恒佛告大王觀佛三昧在煩惱地亦復如是其出生時如彼寶樹嚴顯可觀復次大王如劫初時火起一劫雨起一劫風起一劫地起一劫地劫成時光音諸天飛行世間在水澡浴以澡浴故四大精氣即入身中身觸樂故精流水中八風吹去墮淤泥中自然成卵經八千歲其卵乃開生一女人其形青黑猶如淤泥有九百九十九頭頭有千眼九百九十九口一口四牙牙上出火狀如霹靂二十四手手中皆捉一切武器其身高大如須彌山入大海中拍水自樂有旋嵐風吹大海水水精入體即便懷妊經八千歲然後生男其兒身體高大四倍倍勝於母兒有九頭頭有千眼口中出火有九百九十九手八脚海

量一

五

中出聲號毗摩質多羅阿脩羅王此鬼食法
唯噉淤泥及菓藕根其兒長大見於諸天嫫
女圍遶即白母言人皆伉儷我何獨無其母
告曰香山有神名乾闥婆其神有女容姿美
妙色踰白玉身諸毛孔出妙音聲甚適我意
今爲汝娉適汝願不阿脩羅言善哉善哉願
毋往求爾時其母行詣香山到香山已告彼
樂神我有一子威力自在於四天下而無等
倫汝有令女可適吾子其女聞已願樂隨從
適阿脩羅時阿脩羅納彼女已心意泰然與
女成禮未久之間即便有娠經八千歲乃生
一女其女儀容端正挺特天上天下無有其
比色中上色以自莊嚴面上姿媚八萬四千
左邊亦有八萬四千右邊亦有八萬四千前
亦有八萬四千後亦有八萬四千阿脩羅見

以爲瓊異如月處星甚爲奇特憍尸迦聞即
遣使下詣阿脩羅而求此女阿脩羅言汝天
福德汝能令我乘七寶宮以女妻汝帝釋聞
此心生踊躍即脫寶冠持用擬海十善報故
令阿脩羅坐勝殿上時阿脩羅踊躍歡喜以
女妻之帝釋即以六種寶臺而往迎之於宮
闕中有大蓮華自然化生八萬四千諸妙寶
女譬如壯士屈伸臂頃即至帝釋善法堂上
爾時天宮過踰於前百千萬倍釋提桓因爲
其立字號曰悅意諸天見之歎未曾有視東
忘西視南忘北三十二輔臣亦見悅意身心
歡喜乃至毛髮皆生悅樂帝釋若至歡喜園
時共諸嫫女入池遊戲爾時悅意即生嫉妬
遣五夜叉往白父王今此帝釋不復見寵與
諸嫫女自共遊戲父聞此語心生瞋恚即興

四兵往攻帝釋立大海水踞須彌山頂九百九十九手同時俱作撼善見城搖須彌山四大海水一時波動釋提桓因驚怖惶懼靡知所趣時宮有神白天王言莫大驚怖過去佛說般若波羅蜜王當誦持鬼兵自碎是時帝釋坐善法堂燒眾名香發大誓願般若波羅蜜是大明呪是無上呪是無等等呪審實不虛我持此法當成佛道令阿脩羅自然退散作是語時於虛空中有四刀輪帝釋功德故自然而下當阿脩羅上時阿脩羅耳鼻手足一時盡落令大海水赤如絳汁時阿脩羅即便驚怖遁走無處入藕絲孔彼以貪欲瞋恚愚癡鬼幻力故尚能如是豈況佛法不可思議佛告大王諸善男子及善女人繫心思惟諸佛境界亦能安住諸三昧海其人功德不

可稱計譬如諸佛等無有異

序觀地品第二

云何名爲觀諸佛境界諸佛如來出現於世有二種法以自莊嚴何等爲二一者先說十部經令諸衆生讀誦通利如是種種名爲量一法施二者以妙色身七示閻浮提及十方界令諸衆生見佛色身具足莊嚴三十二相八十種隨形好無缺減相心生歡喜觀如是相因何而得皆由前世百千苦行修諸波羅蜜及助道法而生此相佛告父王若有衆生欲念佛者欲觀佛者欲見佛者分別相好者識佛光明者知佛身內者學觀佛心者學觀佛頂者學觀佛足下千輻相輪者欲知佛生時相者欲知佛納妃時者欲知佛出家時者欲知佛苦行時者欲知佛降魔時者欲知佛得阿

轉多羅三藐三菩提時者欲知如來轉法輪
時相者欲知如來寶馬藏相者欲知如來昇
忉利天爲母摩耶夫人說法時相者欲知如
來下忉利天時相者欲知如來行住坐卧四
威儀中光明相者欲知如來詣拘尸那降度
力士相者欲知如來伏曠野鬼神毛孔光明
相者佛告父王佛涅槃後若四部衆及諸天
龍夜叉等欲繫念者欲思惟者欲行禪者欲
得三昧正受者佛告父王云何名繫念自有
衆生樂觀如來具足身相自有衆生樂觀如
來諸相好中一一相好者自有衆生樂觀如
來隨順相好自有衆生樂觀如來逆相好者
自有衆生樂觀如來光明者自有衆生樂觀
如來行者自有衆生樂觀如來住者自有衆
生樂觀如來坐者自有衆生樂觀如來卧者

自有衆生樂觀如來乞食者自有衆生樂觀
如來初生者自有衆生樂觀如來納妃時者
自有衆生樂觀如來出家時者自有衆生樂
觀如來苦行時者自有衆生樂觀如來降伏
魔時者自有衆生樂觀如來成佛時者自有
衆生樂觀如來轉法輪時者自有衆生樂觀
如來昇忉利天爲母說法時者自有衆生樂
觀如來降伏曠野鬼神者自有衆生樂觀如
來於那乾訶羅降伏諸龍留影時者自有衆
生樂觀如來在拘尸那城降伏六師尼提賤
人及諸惡律儀殷重邪見人者如是父王我
涅槃後諸衆生等業行若干意想若干所宜
不同隨彼衆生心想所見應當次第教其繫
念如我住世不須繫念譬如日出冥者皆明
唯無目者而無所覩未來世中諸弟子等應

修三法何等爲三一者誦修多羅甚深經典
二者淨持禁戒威儀無犯三者繫念思惟心
不散亂云何名繫念或有欲繫心觀於佛頂
上者或有欲繫心觀佛毛髮者或有欲繫心
觀佛髮際者或有欲繫心觀佛額廣平正相
者或有欲繫心觀佛眉間白毫相者或有欲
繫心觀佛眉間者或有欲繫心觀佛牛王眼
相者或有欲繫心觀佛脩直鼻相者或有欲
繫心觀佛鷹王背相者自有衆生樂觀如來
鬚鬢如蚪蚪形流出光明者自有衆生樂觀
如來脣上齟齬者自有衆生樂觀如來脣色
赤好如頻婆果者自有衆生樂觀如來下脣
如鉢頭摩華莖者其色紅赤上入頻婆果色
中者自有衆生樂觀如來口四十齒相者自
有衆生樂觀如來齒白齊密相者自有衆生

樂觀如來齒上印文相者自有衆生樂觀如
來齒畫界者自有衆生樂觀如來上齟齬相者
八萬四千畫了了分明自有衆生樂觀如來
下齟齬如優曇鉢華莖色者自有衆生樂觀如
來咽喉如瑠璃筒狀如累蓮華相者自有衆
生樂觀如來廣長舌相蓮華葉形上色五畫
五彩分明舌下十脉衆光流出舌相廣長遍
覆其面者自有衆生樂觀如來咽喉節中有
三相者自有衆生樂觀如來咽喉相如金翅
鳥眼者自有衆生樂觀如來頸相者自有衆
生樂觀如來八萬四千髮相者自有衆生樂
觀如來毛右旋者自有衆生樂觀如來一一
毛孔一毛旋生者自有衆生樂觀如來頭皮
者自有衆生樂觀如來肉髻骨者自有衆生
樂觀如來腦者自有衆生樂觀如來耳普垂

睡者自有衆生樂觀如來耳輪郭相者自有衆生樂觀如來耳旋生七毛相者自有衆生樂觀如來缺盆骨滿相於彼相中旋生光臺者自有衆生樂觀如來腋下滿相於其相中懸生五珠如摩尼珠上挂佛腋者自有衆生樂觀如來臂臑纖圓如象王鼻者自有衆生樂觀如來肘骨如龍王髮宛轉相著文彩不壞節頭蟠龍不見其迹手指參差不失其所於指節端十二輪現自有衆生樂觀如來赤銅爪其爪八色了了分明自有衆生樂觀如來合縵掌相張時則見斂指不見如真珠網了了分明勝閻浮檀金百千萬倍其色明淨過於眼界於十指端各生萬字萬字點間有千輻輪衆相具足如和合百千蓮華自有衆生樂觀如來掌文圓成如自在天宮其掌平

正人天無類當於掌中生千輻相於十方面開摩尼光於其輪下有十種畫一一畫如自在天眼青白分明然後入掌相中自有衆生樂觀如來手背毛上向靡如紺瑠璃流出五色光入網縵中者自有衆生樂觀如來手足柔輭如天劫貝自有衆生樂觀如來手內外握者自有衆生樂觀如來曾德萬字印相三摩尼光相者自有衆生樂觀如來齋如毗楞伽寶珠自有衆生樂觀如來脇肋大小正等宛轉相著者自有衆生樂觀如來諸骨支節蟠龍相結其間密緻者自有衆生樂觀如來鈎鎖骨卷舒自在不相妨礙者自有衆生樂觀如來骨色鮮白玻璃雪山不得爲譬上有紅光間錯成文凝液如脂自有衆生樂觀如來伊尼延鹿王膺相者自有衆生樂觀如來

蹠相者自有衆生樂觀如來足趺平正相者自有衆生樂觀如來足趺上色閻浮檀金色毛上向靡足指網間如羅文彩於其文間衆彩玄黃不可具名者自有衆生樂觀如來赤銅爪相於其爪端有五師子口自有衆生樂觀如來脚脂端螺文相如毗紐羯摩天所畫之印自有衆生樂觀如來足下平滿不容一毛足下千輻輪相轂輞具足魚鱗相次金剛杵相者足跟亦有梵王頂相衆螺不異如是名樂順觀者自有衆生樂逆觀者從足下千輻輪相從下觀至足指上一一相一一好一一色從下至上了逆觀是名逆觀法自有衆生樂觀如來金色佛生閻浮提故作金色中上色如百千日耀紫金山不可得具見自有衆生樂觀如來巨身丈六者自有衆生樂

觀如來圓光一尋者自有衆生樂觀如來舉身光明者自有衆生樂觀如來說法時瑞應相者自有衆生樂觀如來齋上向相下向相者

觀相品第三之一

佛告父王云何名觀如來頂如來頂骨團圓猶如合蓋拳其色正白若見薄皮則爲紅色或見厚皮則金剛色髮際金色腦玻璃色有十四脉衆畫具足亦十四光其光如脉分明了了於腦脉中旋生諸光上衝頭骨從頭骨出乃至髮際有十四色圍遶衆髮髮下金色亦生衆光入十四色中是名如來生王宮中頂腦肉髻唯其頂上五大梵相生時摩耶及佛姨母皆悉不見其五梵相開現光明至於梵世復過上方無量世界化成雲臺諸佛境

量一

十二

界十地菩薩之所不見今爲父王說生頂相若有聞者應當思惟佛勝頂相其相光明如三千界大地微塵不可具說後世衆生若聞是語思是相者心無悔恨如見世尊頂勝相光閉目得見以心想力了了分明如佛在世雖觀是相不得衆多從一事起復想一事想一事已復想一事逆順反覆經十六返如是心想極令明利然後住心繫念一處如是漸舉舌向齶令舌正住經二七日然後身心可得安隱復當繫心還觀佛頂觀佛頂法光隨毛孔入佛告父王及勅阿難諦聽諦聽善思念之如來今者頭上有八萬四千毛皆兩向靡右旋而生分齊分明四觚分明一一毛孔旋生五光入前十四色光中昔我在宮乳母爲我沐頭時大愛道來至我所悉達生時

多諸奇特有人若問我汝子之髮爲長幾許我云何答今當量髮知其尺度即勅我伸髮母以尺量長一丈二尺五寸放已右旋還成螺文欲納妃時復更沐頭母復勅言前者量髮正長一丈二尺五寸今當更量即伸量之長丈三五寸我出家時天神捧去亦長丈三五寸今者父王欲看髮相不父王白言唯然天尊樂見佛髮如來即以手伸其髮從尼拘樓陀精舍至父王宮如紺瑠璃繞城七匝於佛髮中大衆皆見若干色光不可具說是一光普照一切作紺瑠璃色於瑠璃色中有諸化佛不可稱數現是相已斂髮卷光右旋宛轉還住佛頂即成螺文是名如來真實髮相若有比丘及比丘尼諸優婆塞優婆夷等欲觀佛髮當作是觀不得他觀若他觀者名

爲邪觀名爲狂亂名爲失心名爲邪見名顛
倒心設得定者無有是處如是父王佛眞髮
相事實如是觀髮相已次觀髮際如赤眞珠
色宛轉下垂有五千光間錯分明皆上向靡
圍繞諸髮從頂上出繞頂五匝如天畫師所
作畫法團圓正等細如一絲於其絲間生諸
化佛有化菩薩以爲眷屬諸天八部一切色
象亦於中現色如日輪不可具見是名觀佛
髮際如此觀者名爲正觀若異觀者名爲邪
觀佛告父王此名如來髮際實觀云何觀如
來額廣平正相額廣平正相中有三相一者
所謂白毛相佛初生時王與夫人將太子詣
阿私陀仙令相太子仙人披氎初見太子眉
間白毛旋生於白毛邊有諸輪郭隨白毛旋
相師舒毛見毛長大即取尺度量其長短足

滿五尺如瑠璃簫放已右旋如玻璃珠顯現
無量百千色光是名菩薩初生時白毫相光
至年八歲姨母復觀悉達年大其眉間毛亦
隨年長今試看之即舒白毛其毛正直如白
瑠璃簫於其毛端出五光明還入毛孔母甚
憐念情無已已告語諸人我子毛相乃至如
此諸人見已如前右旋甚可愛念是名菩薩
童子時白毫毛相云何名菩薩納妃時白毫
毛相耶輸陀羅父自遣相師來相太子見三
十二相炳然如畫唯於白毫其心不了相師
即言地天太子其餘衆相同金輪王唯此白
毛流出衆光非我所明今欲舒看爲可爾不
太子告言隨汝所欲爾時相師以手伸毛其
毛流出如牛王乳射相師眼其眼明淨即於
毛中見百千轉輪聖王七寶千子皆悉具足

相師驚愕白言地天太子我伸白毛欲觀長短不知何意如牛王乳來射我眼爲是實見爲是夢見爲是狂亂今者悉忘太子相好一切都盡唯見百千轉輪聖王七寶千子及四種兵從四面起我心歡喜如婆羅門得梵世樂語已放毛右旋宛轉還復本處爾時相師名牢度跋多見此事已五體投地禮於太子太子衆相不可具見如我相法見一相者王四天下快得自在今太子相如摩醯首羅自在神力不可記錄當云何知太子告言吾不達此汝自歸家往白汝王爾時相師即還本國以如上事具向王說王聞是語駕乘名象導從百千詣迦毗羅城到淨飯王宮以水澡太子手持女上之因爲作禮地天太子願受我女可備灑掃相師所見上妙毛相我今欲

見爲可爾不太子告言隨意看之爾時耶輸陀羅父以手伸太子白毛見其白毛如玻瓈幢節節相當於衆節間見有無量百千梵王釋提桓因諸勝天子與宮殿俱了了而見如於明鏡自觀面像見已歡喜尋復放捨如前右旋還住眉間光明赫奕四面布散入輪郭中不可悉說是名菩薩納妃時白毫相佛告父王佛涅槃後四部之衆其中欲觀菩薩爲童子時及納妃時白毫相者當作是觀如此觀者是名正觀若異觀者是名邪觀佛告父王云何名如來出家時白毫相我欲出家時父王及母遣諸姝女常以衛護門施關鍵開闔有聲如師子吼於窓牖間密懸諸鈴金鎖相鉤龍鬼夜叉無從得入爾時四天王虛空中遙發聲言地天太子日時已至宜當學道

我今欲往供養太子恐殿有聲無緣得入爾時太子以手伸毛至四天王所色如天繒柔軟可愛時四天王見心甚愛敬以愛敬故即於毛中見化菩薩結跏趺坐形如太子一一菩薩復有無量諸大菩薩共爲眷屬此相現時無量諸天龍夜叉等俱時得入勑語車匿汝往後殿鞞健陟來車匿白言今此地中若舉足時此地振吼如大象聲云何得往爾時太子復伸白毛令車匿見猶如蓮華葉葉相次其白如雪車匿見已心眼即開於其葉間見化菩薩結跏趺坐猶如微塵不可稱數是諸化人眉間白毛亦復如是爾時車匿見宮中地如玻瓈色表裏堅實猶如金剛躡之無聲疾至後殿鞞馬金鞍牽至殿前車匿白太子言諸天顚顚合掌叉手住在空中同聲讚

歎出家功德太子宜時速乘疾馬爾時太子復舒白毛持擬諸女令諸侍女身心悅樂猶如比丘得第三禪爾時此毛宛轉右旋還入眉間諸天復見太子眉間有百千光譬如乳河周流一切於乳河中有化菩薩乘化蓮華皆共讚歎出家功德一一化菩薩眉間乳河流出光明亦復如是佛告父王是名菩薩出家時白毛相種種瑞應若佛滅後諸四部衆欲觀如來出家時白毛相者當作是觀若異觀者是名邪觀佛告父王云何名苦行時白毫毛相如我踰出宮城已去伽耶城不遠詣阿輸陀樹吉安天子等百千天子皆作是念菩薩若於此坐必須坐具我今應當獻於天草即把天草清淨柔軟名曰吉祥菩薩受已鋪地而坐是時諸天諦觀菩薩身相可愛復

童一

十七

見白毛圍如三寸右旋宛轉有百千色流入諸相是諸天子觀白毫時各作是念菩薩今者惟受我草不受汝草時白毛中有萬億菩薩結跏趺坐各取其草坐此樹下一一天子各見白毫中有如此相是時吉安天子而讚歎言善哉勝士修大慈悲慈悲力故得大人相於其相中無量變現能滿諸天一切善願不生諍訟起菩提心釋梵諸天見於菩薩坐此樹下各獻甘露持用供養菩薩是時爲欲降伏彼六師故不受彼供天令左右自生麻米菩薩不食諸天皆曰此善男子不食多日氣力愒然餘命無幾云何當能成辦菩提菩薩是時入滅意三昧三昧境界名寂諸根諸天啼泣淚下如雨勸請菩薩當起飲食作是請時聲遍三千大千世界菩薩不覺有一天

子名曰悅意見地生草穿菩薩肉上生至肘告諸天曰奇哉男子苦行乃爾不食多時喚聲不聞草生不覺即以右手伸其白毛其毛端直正長一丈四尺五寸如天白寶中外俱空天見毛内有百億光其光微妙不可具宣於其光中現化菩薩皆修苦行如此不異菩薩不小毛亦不大諸天見已歎未曾有即放白毛右旋宛轉與光明俱還復本處爾時諸天諦觀白毛目不暫捨見白毛中下生五筭從面門入流注甘露滴滴不絕從舌根上流入于身表裏清徹如瑠璃山千百萬億諸大菩薩於身内現諸天見已合掌歡喜前言愚癡言此大人命不云遠今見是相必當成佛了無疑無上慧日照世不久作是語已遶百千帀各還宮殿如此音聲聞六欲天佛告

觀佛三昧海經卷第一

音釋

牝牡

牝莫後忍切跳踉張跳田切聊跟切躍踉也呂膾江滂

切屏

隈
隈屏
烏補
回永
切切
怕鄰
奧蔽
也也
伉
儷
儷伉
郎口
計浪
切切

偶伉
也儻

匹
瓌姑回切
偉也
蚪
蚪
口蚪
切苦
蚪禾
蚪切
蟲蚪
名當
齒

斷逆
也各

切 穽 容 臍 直也 容 切 緻 密 直 利 切 喘 市 切

腸切也腓

踝足戶骨也切
 轂切古祿
 輜切文紡
 簞切徒東
 鍵

戸巨
鑰偃

也切 **鞞** 平義 **捷** 切 **陟** 渠馬切 **犍** 切 **陟** 馬切 **顯** 職名

體貌

敬也順也也也悛悛叛也也也

觀佛三昧海經卷第二

量二

東晉天竺三藏法師佛陀跋陀羅譯

觀相品第三之二

佛告父王云何名菩薩降魔時白毫相光魔王波旬遙以天眼觀閻浮提見釋迦子棄國

量二

如唾坐道樹下肌骨枯槁形體羸瘦如久病人唯有金色光明益顯其眼陷黑如井底星骨節相拄失蟠龍文波旬喜曰瞿曇體羸骨如腐草雖有光色餘命無幾及道未成宜往敗之瞋目大怒勅諸夜叉速集軍眾吾今欲

行下閻浮提往征瞿曇是時魔子名薩多羅長跪白父淨飯王子其生之時萬神侍御光徹衆天其人慈悲普覆一切今爲羣生坐於道樹父王云何興惡逆意魔即怒曰汝幼無知乃言瞿曇有勝道德瞿曇身羸如枯骨人

竟何所能而言慈悲子復白言瞿曇體羸不食故爾觀其光色如金剛山紫焰流出恬坐六年心不傾搖觀其面貌曾無畏色惟願大王且住天宮不願往攻波旬復言汝但默然何須多云時夜叉主名曰翅陀即至魔所頭面著地爲魔作禮白言天王何所勅令波旬告曰汝以我聲徧勅六天告下鬼王并諸八部及曠野鬼十八地獄閻羅王神一切皆集往瞿曇所是時諸鬼猶如雲起從四面集或有諸鬼首如牛頭有四十耳於其耳中生諸鐵箭赤焰上起高一由旬有十八角角端擎山山上有龍銜熱鐵丸復有諸鬼首如狐頭有十千眼眼睫長大如霹靂燄頂上有口口吐熾火身上諸毛猶如劒樹復有諸鬼倒住空中有十二脚於其足跟有千刀輪頭如太

山於其頭上五百劒樹樹頭火起復有諸鬼宛轉腹行負鐵圍山穹脊而至復有諸鬼一頸多頭口有千舌於其舌上生棘刺樹毛鬣上衝毛端雨血吐刺疾走騰虛而至毗舍闍鬼發大惡聲氣涌如雲雨熱鐵丸倏忽而到鳩槃荼鬼蹲踞土埵現其醜形富單那鬼其形黑瘦頭戴大鑊盛熱鐵丸手執刀輪左脚躡狗右脚蹋狼奔走而至諸羅刹王背黑如漆胷白如月眼如盛火頭髮鬚亂如縛刺束狗牙上出狀如矛劒手十指爪利如鋒銚脚有十爪縱橫如劒以鐵羈頭疾走而至曠野鬼神大將軍等一頸六頭胷有六面膝頭兩面舉體生毛狀如箭鏃奮身射人張眼赤爛血出流下與諸兇類疾走而到復有諸鬼首如虎頭有十二眼鼻如象鼻有十三鼻左肩

擔山右肩負火手捉利劒脚躡師子哮吼而至復有諸鬼其形如雲霹靂火起如團雲頭於團雲邊有百千萬龍不見其身但見吐毒於十方面一切惡事如雲而集鬼子母神將其諸子各執一石辟方十里巖崿可畏競馳而至復有諸鬼踰脊挾尾以鼻齕地鼻出諸火火焰上化化生諸鬼掩面而走是時魔王顧視夜叉告令諸鬼今者鬼兵既已雲集瞿曇善人或能知呪當興四兵以魔王珠化作四兵象馬車步列杖如材甚可怖畏直從空下至道樹邊魔復更念如此軍衆或不能掩降伏瞿曇復脫寶冠持擬地下其冠光明徑至下方當閻羅王化人官上高聲大呼告勅諸鬼汝等獄卒及閻羅王阿鼻地獄刀輪劒戟火車鑪炭一切都舉向閻浮提欲滅瞿曇

擲置其中阿鼻地獄縱廣正等八千由旬七重鐵城下十八隔四面劒林亦十八行東方復有十八小地獄以爲圍遶南方十八隔以爲圍遶西方十八隔以爲圍遶北方十八隔以爲圍遶地下自然有熾猛火燒然鐵城鐵網俱熾一切熱焰周迴還旋下過十八隔若有衆生犯五逆者身滿其中受如此苦晝夜不息間無空缺劫欲盡時四門自開是諸罪人見東門外一切劒林如清涼林從下隔起至第二隔第二隔起至第三隔乃至於上走趣東門羅刹獄卒以熱鐵叉逆刺其眼睛如融銅流出于地即時躡倒徧滿十八隔中心迷悶滿一小劫爾乃還起復向南門如是四方如前無異晝夜受苦經一大劫劫盡更生餘小地獄其餘衆獄形狀大小受報輕重

形類好醜一切雜報慈三昧中當復廣說時諸獄卒城東八千三方亦爾一一獄卒頭髮如山生刀輪劒戟耳如驢耳有百千種一一耳中烟焰俱起脣口牙齒過於羅刹百千萬倍角如牛角角端生劒五方異見身體赤黑如癩病狗有四百尾於其尾頭膿血沸屎有鐵背蟲纏其身體手捉鐵叉脚下蹋輪刀輪上刺直徹心髓駛疾如風各以鐵叉又罪人腰直上而走阿鼻地獄如影隨形逐罪人來俄頃之間到道樹邊一時雲集欲興惡逆菩薩是時儼然不動入勝意慈魔王偈張奮武振吼勅諸兵衆汝等速疾逼害瞿曇上震天雷雨熱鐵丸刀輪武器更相加積交橫空中四面諸鬼同時俱作然其火箭不近菩薩是時菩薩徐舉右臂伸眉間毛下向用擬阿鼻

地獄令諸罪人見白毛中流出衆水澍如車軸雨大火上大火漸滅唯烟氣在令受罪人心得小悟自憶前世百生千生百千萬生所作諸罪諸獄卒等持大鐵叉舉起罪人盡其身力不能得動忽然自見大鐵叉頭如白銀山龕室千萬有白師子蟠身爲座於其座上生白蓮華有妙菩薩入勝意慈如是莊嚴如須彌山放叉擲地有七寶華生又根下有白色光明照諸地獄及獄卒身令閻羅王及諸獄卒作白銀山猶如電光暫時得見諸受罪人六情諸根猛火速起節頭火然筋脉生釘暫得一起合掌叉手向白毫相即時心開見白毛中人如已無異坐蓮華牀以水澆灌諸罪人頂令心熱惱暫得清涼即皆同時稱南無佛以是因緣受罪畢訖直生人中諸情完

量二

五

具正見出家既出家已破二十億洞然之結成須陀洹魔見是相憔悴懊惱却卧牀上魔有三女長名悅彼中名喜心小名多媚時魔三女至父王前長跪叉手爲父作禮啓言父王今日何故愁悴乃爾其父答言沙門瞿曇結誓深重今坐道樹要壞我民是故愁耳女白父言我能往亂願父莫愁即自莊飾著雜寶冠容媚挺特過踰魔后百千萬倍眄目作姿現諸妖冶瓔珞晃曜光翳六天乘羽葆車安施寶帳垂諸天華於華鬚頭諸化玉女手執樂器鼓樂弦歌聲萬種音見在世人之所喜樂一一玉女從五百女以爲侍御繒蓋幢旛如雲而下身毛孔中香烟芬馥有百千色玄黃煜爚甚適人目安詳徐步至菩薩所下車合掌禮敬菩薩旋遶七帀白菩薩言太子

生時萬神侍御七寶來臻何棄天位來此樹
下我是天女盛義無比顏貌紅暉六梯無雙
今以微身奉上太子供給左右可備灑掃我
等善能調身按摩今欲親附願遂下情太子
坐樹身體疲懈宜須偃息服食甘露即以寶
器獻天百味太子寂然身心不動以白毛擬
令天三女自見身內膿囊洩唾九孔筋脉一
切根本大腸小腸生藏熟藏於其中間迴伏
宛轉涌生諸蟲其數滿足有八萬戶有九
億諸小蟲等蟲遊戲時走入小腸皆有四口
張口上向大蟲遊戲入大腸中從大腸出復
入胃中冷病起時胃脘閉塞蟲不得入故食
不消脾腎肝肺心膽喉嚨肺脾肝膈如是中
間復生四蟲如四蛇合上下同時啖食諸藏
滓盡汁出入眼爲淚入鼻爲涕聚口成唾放

量二

六

口成涎薄皮厚皮筋髓諸脉悉生諸蟲細於
秋毫數甚衆多不可具說其女見此即便嘔
吐從口而出無有窮盡即自見身左生蛇頭
右生狐頭中首狗頭頭上化生九色死屍如
九想觀九想觀者一者新死想或見死人身
體正直無所復知想我此身亦當復爾與此
無異故曰新死想二者青淤想或見死人一
日至于七日身體青胛淤黑想我所愛身亦
當復爾與此無異故曰青淤想三者膿血想
或見死人身已爛壞血塗流漫極爲可惡不
可瞻視我所愛身亦當復爾故曰膿血想四
者絳汁想或見死人身體縱橫黃水流狀
似絳汁我所愛身亦當復爾故曰絳汁想五
者食不消想或見死人爲鳥鳥所食蟲狼所
啖爲蠅所蛆其肉欲盡或半身在我所愛身

亦當復爾故曰食不消想六者筋纏束薪想或見死人皮肉已盡止有筋骨相連譬以束薪由是得成而不解散我所愛身亦當復爾故曰筋纏束薪想七者骨節分離想或見死人筋已爛壞骨節縱橫不在一處我所愛身亦當復爾故曰骨節分離想八者燒焦可惡想或見死人爲家火所燒野火所焚焦縮在地極爲可惡不可瞻視我所愛身亦當復爾故曰燒焦可惡想九者枯骨想或見久昔乾骨若五十歲至百歲二百歲三百歲時骨還變白日曝徹中火從骨上燄燄而起火燒之後風吹入地還歸于土是名略說九想是爲菩薩始在樹下初開不淨觀門時魔三女自見背上復負老母髮白面皺脣口喎僻手脚繚戾顏色津黑猶如僵尸曾前復抱一死小

兒於六竅中流出諸膿膿中生蟲正似蛭蟲諸女見此愕然驚號却行而去低頭視齋齋生六龍龍吐水火耳出諸風體堅如鐵自見女形醜狀鄙穢乃當如是其於鄙處有諸小蟲蟲有四頭二上二下啖食女身口出五毒毒有五脉上至心下乃至咽喉從六根中生諸脉根九十有九直下流注至諸蟲頂共相灌注徹諸蟲心諸女人等從無數世造諸邪行惡業因緣獲得如是不淨醜身復有諸蟲如手臂釧團團相持而有衆口口生五毒啖食女根諸女人等先世之時邪淫行故獲是臭惡身以爲莊嚴諸女見已心極酸苦如箭入心却行之時匍匐而去如羸馳步初舉足時節節火起其髮黃黑如刺棘林以自纏身呼嗟歎息至魔王前魔王心怒奮劍豎色即

欲直前魔子諫曰父王無辜自招瘡疣菩薩行淨難動如地云何可壞作是諫時菩薩復以白毫光擬令魔眷屬身心安樂譬如比丘入第三禪餓鬼見白毛毛端皆有百千萬億諸大菩薩是諸菩薩亦入勝意慈心三昧各

量二

以右手將左指頭爪端出乳灑滅猛火猛火滅已即得清涼自然飽滿身心踊悅發菩提心因是心故捨餓鬼苦是諸鬼等自見其身如似白玉似瑠璃山似玻瓈山似黃金山似碼碯山身諸毛孔似真珠貫眼目明淨似明月珠身諸烟燄如雜寶雲所執刀杖似七寶臺七寶臺內重敷純綖安置丹枕左右自然有化梵王見化菩薩坐於化臺各各異說諸罪人報汝等前世坐作惡業故獲如此可惡之形說是語時是諸鬼神有發無上菩提心

者有種聲聞辟支佛者有於來世當生人天勝樂處者是時魔王忽然還官白毛隨從直至六天於其中間無數天子天女見白毛孔通中皆空團圓可愛如梵王幢於其空間有百千萬恒河沙微塵諸寶蓮華一一蓮華無量無邊諸妙白色以爲其臺臺上有化菩薩放於白毫大人相光亦復如是諸菩薩頂有妙蓮華其華金色過去七佛在其華上是諸化佛自說名字與脩多羅等無差別復有諸天宿善根者見化菩薩一毛孔中生一菩薩量二菩薩頂上皆有化佛如前不異時諸化佛眉間出華百寶莊嚴諸天世間無色可比有化光臺臺上化佛如前不異諸化菩薩身毛孔中化出一切十方衆生所希有事化人足下有化光臺生諸天宮勝過六欲魔王宮殿亦

勝大梵嚴身之宮諸梵頂相從化菩薩足下
輞間生如是白毛上至無色徧照一切無量
無邊諸天世界皆如白寶玻瓈明鏡諸天見
此勝瑞相已不樂天樂發菩提心魔王八萬
四千天女視波旬身狀如死狗亦似焦木但
瞻菩薩白毫相光心意悅樂無以爲譬怒恚
波旬前所爲事規欲壞他返自敗勦作是語
時百千無數天子天女復發無上菩提道意
佛告大王如是種種諸勝相事但從菩薩眉
間白毛而生此耳不勞其餘身分功德佛滅
度後諸四部衆若能暫時捨離散亂繫心正
觀菩薩降魔白毫相者滅無數劫黑業惡障
亦除十惡諸煩惱障能於現世見佛影像了
了分明如是種種觀相境界不可具說如來
滅後欲觀如來降伏魔時白毛相者當作此

觀如是觀者名爲正觀若異觀者名爲邪觀
云何名爲如來成佛時大人相覺人相不動
人相解脫人相光明人相滿智慧人相具足
諸波羅蜜相首楞嚴等諸三昧海相菩薩摩
訶薩從勝意慈三昧起入滅意定從滅意定
起還入首楞嚴從首楞嚴起入慧炬三昧從
慧炬三昧起入諸法相三昧從諸法相三昧
起入光明相三昧從光明相三昧起入師子
音聲三昧從師子音聲三昧起入師子奮迅
三昧從師子奮迅三昧起入海意三昧從海
意三昧起入普智三昧從普智三昧起入陀
羅尼印相三昧從陀羅尼印相三昧起入普
現色身三昧從普現色身三昧起入法界性
三昧從法界性三昧起入師子吼力王三昧
從師子吼力王三昧起入滅諸魔相三昧從

滅諸魔相三昧起入空慧三昧從空慧三昧起入解空相三昧從解空相三昧起入大空智三昧從大空智三昧起入徧一切處色身三昧從徧一切處色身三昧起入寂心相三昧從寂心相三昧起入菩薩摩訶薩金剛相三昧從金剛相三昧起入金剛頂三昧從金剛頂三昧起入一切三昧海從一切三昧海起入一切陀羅尼海三昧從一切陀羅尼海三昧起入一切佛境界海三昧從一切佛境界海三昧起入一切諸佛解脫解脫知見海三昧從解脫解脫知見海三昧起然後方入無量微塵數諸三昧海門從諸三昧海門起入寂意滅意三昧從入寂意滅意三昧起入金剛譬大解脫三昧相門爾時道場地化似金剛滿八十里其色正白不可具見此相現

量二

十一

時菩薩眉間白毫相光端潔正直矗然東向長一丈五尺有十楞現彌迦女人同類五女無數萬億天龍鬼神彌勒賢劫諸菩薩等跋陀波羅等無量無邊阿僧祇微塵數諸大菩薩亦見此相此相現時佛菩提樹白毛力故根下自然化生寶華縱廣正等四十由旬其華金色金剛爲臺佛眉間光照此華臺其光直下至金剛際於金剛際自然化生二金剛座互相振觸聲震三千大千世界令此大地六種震動其金剛座上衝蓮華至蓮華根其蓮華根亦是金剛三種金剛共相振觸直還下過至金剛際徃旋十返白毫光明圍繞十帀令金剛座磲然不動佛坐此座消除三障成菩提道佛心境界說不可盡若廣說者一切衆生至十地菩薩亦不能知亦非所解是

故於此白毫相中隱而不說如是白毛光明
力故令菩提樹金剛爲莖根亦金剛鬚七寶
成鬚上生光各各有七佛圍遶佛身化成寶
縵樹葉金色華白寶色華上有光百千寶色
諸天寶光不得爲譬果白寶色夜摩天上微
妙白寶不得爲比其果光明化摩尼網彌覆
樹上於其網間猶若白霓宛轉下垂化成寶
鈴鈴四角頭有大寶臺其臺高顯過於上方
無量世界過是界已復更化成諸大寶臺一
一寶臺不可具說高顯微妙譬如和合百千
萬億諸須彌山於其臺上有天寶蓋純金剛
成雜色間錯微妙光明光明下垂化成幡帳
於幡帳中雨寶蓋雲寶蓋雲中雨幢幡雲幢
幡雲中雨妓樂雲妓樂雲中雨寶光雲寶光
雲中雨諸香雲諸香雲中雨師子座雲師子

量二

十二

座雲中雨華鬚雲華鬚雲中雨華鬚雲華鬚
雲中雨妙音雲妙音雲中雨偈頌雲偈頌雲
中雨諸珍寶供養具雲如是等種種供具皆
從菩提樹白毫相光明中出時白毛光下垂
照地令道場邊金剛地上化作七池池生七
水水有七色七色分明色有千光上照樹王
其池四岸衆寶合成一岸百寶所共合成一
寶流出百億光明池底純是金剛摩尼以爲
底沙水生諸華純黃金葉葉上千光化成光
輪池有一渠水自涌出池中生華葉葉相次
於蓮華鬚流出諸水如瑠璃珠映徹分明於
渠兩邊列生諸華八萬四千衆寶嚴飾此渠
中水更相灌注當水流時光亦隨轉映菩提
樹此樹光中一一葉上生寶蓮華其華徧布
一切世界於其華上化百寶臺徧至十方無

量世界其白毫光從佛眉間生寶蓮華團圓正等滿一由旬如是相次過於上方無量無邊不可算數不可算數微塵世界華華相次一一華上見一佛坐身黃金色方身丈六結跏趺坐坐蓮華臺其金剛座及菩提樹如上

量二

十三

所說等無有異乃至十方亦復如是於白毫中復出寶華勝前寶華百億萬倍華上有佛如釋迦文等無有異一華鬚頭復有一佛身長丈六入深禪定心不傾動如是光明照於東方無量無數百千世界令諸世界皆作金色彼衆生見化佛毛孔開現光明復出無量百千寶光一一光中復有無量百億化佛時諸天龍鬼神夜叉乾闥婆等覩此光明遶佛千匝照十方國見十方國高下大小了了分明如執明鏡自見面像是諸大衆波旬眷屬

八萬億衆及諸鬼神天龍夜叉等各見白毫端直丈五十方悉見映蔽衆目如萬億日不可具見但於光中見無量無數百億千萬化釋迦文眉間白毛正長丈五一毛中出無量光一一光中無量化佛化佛眉間亦復如是是白毫光輪郭之中流出衆光上至佛額顯發額廣平正之相額上諸毛毛皆上靡其毛根下梵摩尼色適衆生心毛端流光如融紫金光相上靡入於髮際宛轉垂下至耳輪邊然後布散上入髮間圍繞螺文數百千匝從頰骨生如金蓮華葉日照開敷蓮華葉間及蓮華鬚如帝釋臺了了分明衆色異現於其色間無量化佛一佛七大菩薩諸天以爲侍者手執寶華白中白者華有五光五色分明隨從化佛不失其所此名如來初成佛時

白毫相光因白毫光初生頂光生王宮時此
光如日見不了了圓光一尋別自當說時諸
八部覩白毫光所見不同有見白毛猶如諸
佛有見白毫如諸菩薩有見白毛如已父母
一切世間可尊敬事悉於毛端了了得見見
已歡喜有發無上菩提心者有發聲聞緣覺
心者如是諸鬼見白毛者自然慈心無諸惡
意佛告父王如來白毛自從初生乃至成佛
於其中間微細小事可得觀見既成佛已白
毫光明衆相具足諸修多羅中佛已廣說白
毫相光究竟之處十地菩薩爾乃得見先說
小者隨應世間此事易見佛告父王及勑阿
難諦聽諦聽善思念之汝語後世諸弟子等
皆令得知若我滅後諸比丘等若問是事此
白毫相菩薩本昔修何行得汝當答言佛白

毫相從無量劫捨心不慳不見前相不憶財
物心無封著而行布施以身心法攝身威儀
護持禁戒如愛雙目然其心內豁然虛空不
見犯起及捨墮法心安如地無有動搖設有
一人以百千刀屠截其身設復有人以諸棘
刺鞭撻其身菩薩初無一念瞋恚設復有人
頭有千舌舌出千言種種異辭罵辱菩薩顏
色不變如淨蓮華心無所著身心不懈無疲
倦意如救頭然如身毛孔生邪利瘡求覓良
醫晝夜精進心無染汙如瑠璃珠表裏俱淨
攝身欽意閉目叉手端坐正受其心如海湛
然不動如金剛山不可沮壞雖作是意不隨
禪生灰心滅智無所適莫亦無覺觀非不觀
法心智猛利攝諸方便不見有法若大若小
有細微相如是衆多名波羅蜜亦從三十七

助菩提法復從十力四無所畏大慈大悲三念處諸妙功德得此白毫若我滅後佛諸弟子捨離諸惡去憤鬧想樂少語法不務多事晝夜六時能於一時中分爲少分少分之中能須臾間念佛白毫令心了了無謬亂想分明正住注意不息念白毫者若見相好若不得見如是等人除却九十六億那由他恒河沙微塵數劫生死之罪設復有人但聞白毛心不驚疑歡喜信受此人亦却八十億劫生死之罪若諸比丘比丘尼優婆塞優婆夷犯四根本罪不如等罪及五逆罪除謗方等如是衆人若能懺悔晝夜六時身心不懈譬如人在深草中行四面火起猛風吹來欲燒其身此人作念若火燒我未死之間支節解散我當云何得滅此火若不設計命必不齊誰

有智者多諸方便能救我命設命全濟於彼人所無所吝惜作是思惟已如太山崩五體投地號泣雨淚合掌向佛讚歎如來種種德行作是讚已誦懺悔法繫念在前念佛眉間白毫相光一日至七日前四種罪可得輕微三七日時罪相漸滅七七日後然後羯磨事在他經若比丘犯不如罪觀白毫毛闇黑不現應當入塔觀像眉間一日至三日合掌啼泣一心諦觀然後入僧說前罪事此名滅罪前五種罪念白毫光經八百日然後復有別羯磨法佛告父王如來有無量相好一一相中八萬四千諸小相好如是相好不及白毫少分功德是故今日爲於來世諸惡衆生說白毫相大慧光明消惡觀法若有邪見極重惡人聞此觀法具足相貌生瞋恨心無有是

處縱使生瞋白毫相光亦復覆護暫聞是語
除三劫罪後身生處生諸佛前如是種種百
千億種諸觀光明微妙境界不可悉說念白
毫時自然當生如此觀者名爲正觀若異觀
者名爲邪觀云何名觀額廣平正額廣平正
相二輪光明光明輪郭千輻轂輞成摩尼珠
形如毗紐羯磨天畫於畫畫中流出上妙金
色之光來入白毫遶毫七市上入額上諸毛
孔中乃至髮際諸色相中宛轉下垂至于耳
輪上散入髮遶髮七市從頰骨出遶前蓮華
相團圓七市七畫分明畫有七色色生七華
華有一佛有七菩薩以爲侍者恭敬圍遶右
旋而轉如是額廣平正三相髮際相頭諸毛
孔相腦中相腦中亦有十四光現諸脉中中
外俱徹明顯可愛涌出白光紅紫間錯其色

量二

十七

微細從頰骨出亦遶前者三市一一畫間有
一佛坐有二菩薩以爲侍者益更明顯勝前
數倍云何觀如來眉相左右二眉形如月初
遶生諸毛稀稠得所隨月形轉其色豔紫毛
端紺青瑠璃妙光色無與比眉光兩靡散入
諸髮旣入髮已上至髮杪其光螺起蜂翠孔
雀色無以類猶如聚墨比瑠璃光亦復下垂
從頰骨出右旋宛轉遶光四市一一畫中出
一化佛有二菩薩及二比丘翼侍左右皆悉
住立蓮華鬚上明顯可愛勝前數倍眉下三
畫及眼眶中旋生四光青黃赤白上向豔出
入眉骨中出眉毛端亦如前法從頰骨出遶
光四市四色分明黃色化佛身黃金色白色
化佛身白銀色青色化佛身金精色赤色化
佛身磔色如是右旋益更明顯勝前數倍

云何觀如來眼睫相如來眼睫上下各生有五百毛柔軟可愛如優曇華鬚於其毛端流出一光如玻璃色入前衆相光明色中遠頭一帀從頰骨出圍遶前光純生微妙諸青蓮華蓮華臺上有青色蓋有梵天王手執是蓋此相現時佛眼青白白者過於白寶百億萬倍青者勝青蓮華及紺瑠璃百億萬倍上下俱瞬如牛王眼眼雙背頭旋出二光如青蓮華極爲微細遶髮一帀從頰骨出映飾諸華今華開敷光明益顯如是勝相無量功德名如來眼若有欲觀如來眼者當作此觀作此觀者減損諸惡閉目端坐正觀佛眼一日至七日於未來世常得見佛終不盲冥亦不生於邊地邪見無佛法處慧眼恒開不生愚癡佛告父王是故智者爲除盲冥當觀佛眼佛

量二

十八

有五眼此觀法中先說肉眼明淨光顯觀眼心利傍生境界不可具說諦觀佛眼於少時間及觀像眼未來世中經五生處眼常清淨眼根無病除却七劫生死之罪佛告阿難勑諸四衆勤觀佛眼慎勿休廢觀佛眼者必獲無量微妙功德髮際額廣及髮螺文眼眶眼脣眼睫眼畫如是等衆相光明若能暫見除六十劫生死之罪未來生處必見彌勒賢劫千佛威光所護心如蓮華而無所著終不墮於三塗八難若坐不見掌入塔觀入塔觀時亦當作此諸光明想至心合掌胡跪諦觀一日至三日心不錯亂命終之後生兜率天面見彌勒色身端嚴應感化導既得見已身心歡喜入正法位佛告父王如是觀者名爲正觀若異觀者名爲邪觀

觀佛三昧海經卷第三

量三

東晉天竺三藏法師佛陀跋陀羅譯

觀相品第三之三

佛告父王云何觀佛耳佛耳普垂睡旋生七毛輪郭衆相及生王宮初穿耳時令兩耳孔

量三

內外生華此蓮華中及耳七毛流出諸光有五百支支五百色色出五百化佛佛五菩薩有五比丘以爲侍者遶光右旋其數五帀上下正等映照佛耳佛耳可愛如寶蓮華懸處日光佛在世時一切大衆咸見是相是名佛耳色相光明佛告父王若四部衆遠離憤鬧正念思惟佛耳相者此人生處耳根清淨無諸穢惡耳常得聞無上微妙十二部經聞已信解如說修行除滅八十劫生死之罪若不見者如前入塔諦觀像耳一日至十四日亦

得如向所說功德是故智者當勤修集正觀佛耳勿使廢失若病苦時倚側偃卧亦當觀佛清淨耳相如是觀像耳如前所想心不懈退後身生處亦常得與陀羅尼人以爲眷屬聞法憶持譬如貫珠如是觀者名爲正觀若異觀者名爲邪觀云何觀如來方頰車相如來頰上六畫中左右正等有妙光色輝豔倍常閻浮檀金光色遍照令佛面相如淨金色譬如和合百千日月是名如來方頰車相佛滅度後佛諸弟子繫念思惟作是觀者除滅百劫生死之罪面見諸佛了無疑如是觀者名爲正觀若異觀者名爲邪觀云何觀如來師子欠相佛張口時如師子王口方正等口兩吻邊流出二光其光金色過逾前光百千萬倍上入耳光圍繞諸髮從頰骨出繞前

圓光一一畫間有三化佛一一化佛有二梵王以爲侍者是名如來師子久相佛滅度後四部弟子作是觀者除滅十劫生死之罪後身生處口中恒有優益華香有所宣說人皆信受譬如帝釋三十三天一切信用如是觀者是名正觀若異觀者名爲邪觀云何名觀如來鼻相如來鼻高脩而且直當于面門如來鼻端如鷹王背鼻孔流光上下灌注上者上入眼眉白毫相髮際如是直入頂肉髻骨譬如金幢從頰骨出變成衆華華上皆有天諸樂神手執樂器遍入一切諸化佛間以爲導從遶光十帀下者直至入佛髭中圓遶髭毛令髭毛根有華開敷如稊米粒流入脣齧至諸齒間映飾咽喉下至佛胃成光明雲表裏清淨無諸塵翳如瑠璃器盛金光豔是名

如來真淨鼻相佛滅度後佛諸弟子如是觀者除滅十劫極重惡業未來生處聞上妙香心意了了不著於香常以戒香爲身瓔珞如是觀者名爲正觀若異觀者是名邪觀云何觀如來髭諸髭毛端開敷三光紫紺紅色如是光明直從口邊旋頸上照圍繞圓光作三種畫其畫分明色中上者一一畫間生一寶珠其珠光明有百千色珠下白華莖莖相拄滿三帀已然後彼光還入髭中是名如來髭毛光相佛滅度後作是觀者除二十劫生死之罪後生身處身諸毛孔有自然光心不樂著家居眷屬世間之樂常樂出家修頭陀行如是觀者名爲正觀若異觀者名爲邪觀云何觀如來脣色赤好如頻婆果相於上下脣及與斷齧和合出光其光團圓猶如百千赤

眞珠貫從佛口出入於佛鼻從佛鼻出入於白毫從白毫出入諸髮間從髮間出入圓光中映飾諸華口四十齒印上生光其光紅白光光相照照四十齒令四十齒朗然齊白如玻璃壁上下齊平無參差者齒間文畫流出諸光亦紅白色如是衆色佛在世時映耀人目佛滅度後當以心眼觀見此色佛諸弟子作此觀者除二千劫生死之罪後身生處唇口微妙齒不踈缺得色中上色雖得是色心不貪著常見諸佛聲聞緣覺爲之說法令心不疑如是觀者名爲正觀若異觀者名爲邪觀云何觀如來廣長舌相如來舌者是十波羅密千善報得其舌根下及舌兩邊有二寶珠流注甘露滴舌根上諸天世人十地菩薩無此舌相亦無此味舌上五畫如寶印文如

此上味入印文中流注上下入瑠璃筭諸佛笑時動其舌根此味力故舌出五光五色分明繞佛七帀還從頂入佛出舌時如蓮華葉上至髮際遍覆佛面舌下亦有衆雜色脉如此上味流入脉中其味力故變成衆光有十四色一一光上照無量世界一一光間有一光臺其色衆妙不可具名一一光臺龕室無數一一龕中無量化佛結跏趺坐聲聞菩薩一切大衆皆悉圍遶過於上方無量世界化爲一佛佛身高顯如須彌山如是諸佛其數無量皆出舌相亦復如是一一光下照至阿鼻獄令阿鼻獄如黃金色佛舌力故令受苦人暫得休息自慨前世所作惡事如是下過無量世界一一界中化寶華樹葉如佛舌舌相放光光相照變成化佛其化佛身純白

銀色身相具足一一化佛出廣長舌舌相光中有諸化佛如是化佛其數無量化佛光明成一銀山其山高無量無邊於其山間純生銀樹金華銀果樹下皆有白玉蓮華華上復有白玉化人玉人齋中化生六龍其龍口黑龍色純白是化玉人其數無量復更下過照無量界見白玉樹從下方出至娑婆界復更鬱鬱至三界頂枝條扶疎其葉有色色九十八一一樹葉遍覆三界其諸葉間復有龍象虎狼師子毒蟲惡獸狸貓鼯鼠無事不有其餘境界坐者自見見一光照東方令東方地皆作金色山河樹木一切火燒火光金光各不相障於金光端有諸化佛佛佛相次乃至東方無量世界譬如稻麻間無空缺一佛皆有無量菩薩以爲侍者是諸菩薩亦出舌

量三

五

相與佛正等如是舌相無量光明化成光雲於光雲中如微塵等無量化佛結跏趺坐如是光明其數無量時火燄端有五夜叉手執利劍頭有四口吸火而走如是諸鬼其數無量乃至東方亦復如是一光照南方無量世界令其世界作瑠璃色瑠璃地上生黃金華黃金華上生碼碯華碼碯華上生磲磲華磲磲華上生玫瑰華玫瑰華上生琥珀華琥珀華上生珊瑚華珊瑚華上生金精華金精華上生金剛華金剛華上生摩尼光華摩尼光華一一光間有無量色百億寶華一一華鬚有無量釋迦文尼結跏趺坐菩薩大眾以爲圍遶時諸大眾身毛孔中亦出此華一一華上現希有事亦如上說是諸化佛出廣長舌相開現光明倍勝是相百千萬倍於諸華間

有妙寶座高顯可愛如梵王牀一一牀上有大菩薩身相端嚴猶如彌勒亦出廣長舌相其舌光明作摩尼網覆諸化佛及與大眾摩尼網間出大寶華其寶光端復有無量無邊化佛一一化佛各有無數比丘侍從時諸比丘坐金蓮華身黃金色安禪合掌入念佛定身諸毛孔出金色光此一一光化成化佛猶如金山圍遶比丘有化比丘亦圍遶佛如是衆多數不可說一光照西方令西方地作玻瓈色玻瓈地上有金剛雲金剛雲中有白寶雲白寶雲中有赤真珠雲赤真珠雲中有白真珠雲白真珠雲中有紫真珠雲紫真珠雲中有綠真珠雲綠真珠雲中有紅真珠雲紅真珠雲中有閻浮檀金沙雲閻浮檀金沙雲中有金剛摩尼微塵雲金剛摩尼微塵雲中

三

六

有一切寶色微塵雲如是一一雲中有十六億色微妙鮮好過於眼界惟有寂心可與此合如是諸相復有無量微塵化佛一一化佛無量微塵諸化弟子諸塵不大諸佛不末端嚴微妙如釋迦文亦出舌相一一光照比方令北方地作磤磤色磤磤地上有金剛塔一一佛塔百千妙塔以爲圍遶其數無量塔極小者高五十億那由他由旬一一塔中復有百億塵數龕窟一一窟中無量無邊諸寶色水自然涌出是諸水上有大蓮華開現光明其光現時香氣微妙勝海此岸梅檀之香百千萬倍是香變爲微妙光明諸光明中有諸化佛身色微妙寶中上者一切衆寶從舌相出時一一窟無量光明一一光明無量化佛一一化佛復出舌相光明無量亦成香塔

過於北方無量世界不可窮盡但從念佛三昧海生一光照東南方令東南方其地碼碯色碼碯色地上有琥珀山琥珀山上生七寶林七寶林間有十泉水水十寶色水色放光普照東南方無量世界光所照處有大寶山一一山間一一樹下生曼陀羅華摩訶曼陀羅華於華臺上有一化佛純瑠璃色內外清徹不可具名雜寶色光繞身千匝一一光中無量化佛一一化佛無量大衆皆瑠璃色以爲圍繞一一化佛出舌相光明化成寶山如是寶山復過東南方無量世界一光照西南方無量世界令西南方地純珊瑚色珊瑚地上生碧玉樓樓極下者高五十億由旬樓一億柱此一一柱百億寶色一一寶放無數光此一一光化爲無量千億寶樹一一樹下有

六泉水其水從樹根入從樹條出流出之時有六寶色一一水中生一蓮華其華鮮白華上復有一白化佛其身極白過踰一切白色之上有五百色微妙光明圍遶佛身一一光明化無數佛一一化佛有無數菩薩樓閣諸柱皆放光明一一光中無數化佛青色化佛在於珊瑚地上經行白色化佛在於青玉樓上經行樓閣龕室皆有如是無數化佛亦出舌相放大光明其光微妙照西南方無量世界不可窮盡一光照西北方令西北方作琥珀地琥珀地上生真珠山真珠山上有珊瑚樹白玉葉摩尼華黃金果金精鬚樹下自然有大師子其身七寶師子眼中放大光明照琥珀地令琥珀地生一大蓮華其華團圓無量無邊一一華上有光明雲其雲紫色雲上

有網綠真珠色真珠網間生金蓮華金蓮華
上有一化佛身紫色青黃赤白五色光明
以爲圍繞一一光中無數化佛一一化佛無
量大衆是諸化佛出廣長舌相亦復如是如
是遍照西北方量三無量世界舌相光明不可窮
盡一光照東北方令東北方地純金剛色金
剛地上生華七寶合成華上生幢閻浮金色
幢頭有華其華無量百千寶色有無數華一
一華葉化爲無量百千寶帳一一帳角有七
寶幢一一幢頭有七寶蓋其蓋彌覆東北方
地一切世界蓋有五旛純黃金成幡有萬億
無量寶鈴鈴出妙音讚歎佛名讚歎禮佛讚
歎念佛讚歎懺悔出是聲已寶帳下地大光
涌出其光微妙無數千億一一光中無量化
佛結跏趺坐坐寶帳內復有涌身住虛空中

東涌西沒西涌東沒南涌北沒北涌南沒邊
涌中沒中涌邊沒或現大身滿虛空中大復
現小身如芥子於虛空中行住坐卧身上出
水身下出火身下出水身上出火履地如水
履水如地水中生華大如車輪華上有佛結
跏趺坐如是化佛無量無邊同時見佛踊身
空中作十八變火上生一金須彌山星宿日
月七寶莊嚴諸龍夜叉及大海水如是衆多
須彌山左右一切諸有皆悉出現如是衆山
其數無量山頂有佛亦出舌相舌相光明遍
照東北方無量世界不可窮盡一光上照從
閻浮提四天王宮令四天王皆見釋迦文尼
世尊人中之日乘七寶臺與諸大衆徃彼天
上諸天見已發菩提心乃至無色界一切諸
天皆見是相了了分明心不謬亂令無色天

不謗涅槃起菩提想一光下照諸阿脩羅諸
夜叉等諸乾闥婆諸迦樓羅諸緊那羅諸摩
睺羅伽諸龍諸羅刹諸富單那諸金毗羅諸
歌人精氣鬼諸鳩槃荼諸吉遮諸曠野鬼諸
餓鬼諸食吐鬼諸食洩唾鬼諸食膿血鬼諸
食屎尿鬼諸山神諸樹神諸水神如是等若
千百千諸鬼神等其身暫時作天身色柔軟
悅樂譬如比丘入第三禪是諸鬼等各隨業
行自發三種菩提之心諸餓鬼等舌光現時
猶如冷水滅節間火火既滅已融銅墮地直
陷入地時諸餓鬼皆悉張口唱言飢飢於千
萬歲不曾見水今遇此水除熱清涼是誰力
耶空中聲曰愚癡餓鬼有佛世尊放舌光明
其光照汝令汝苦毒悉得休息作是語已一
鬼前見一慈母坐蓮華臺譬如慈母抱持

嬰兒與乳令飲使鬼飽滿既飽滿已發菩提
心既發心已一一慈母化成一佛時一一佛
亦放舌相救諸餓鬼佛攝舌相此光千色繞
佛千匝光有千佛從佛頂入入已佛身嚴顯
三十二相八十隨形好皆悉明耀遍體流光
晃晃煜煜勝於百千無數億日佛告父王如
來舌相及舌功德觀舌境界其事如是佛滅
度後念佛心利觀佛舌者心眼境界如向所
說作是觀者除却百億八萬四千劫生死之
罪捨身他世值遇八十億佛於諸佛所皆見
諸佛廣長舌相放大光明亦復如是然後得
受菩提道記佛告阿難汝持佛語莫令忘失
告諸弟子正身正意端坐正受觀廣長舌者
如我在時等無有異若有衆生聞此說者心
不驚疑不生誹謗不惱念佛者勸進念佛者

供養恭敬尊重讚歎如是等人雖不念佛以告心故除却百劫極重惡業當來生處值遇彌勒乃至樓至佛於千佛所聞法受化常得如是觀佛三昧佛告父王如是觀者名爲正觀若異觀者名爲邪觀云何觀如來頸相缺瓮骨滿相脣臆字相卽字印相是衆字間出生圓光頭臙圓相如瑠璃甯懸好金幢咽喉二有點相分明猶如伊字一一點中流出二光其一光繞前圓光足滿七帀衆畫分明一一畫間有妙蓮華其蓮華上有七化佛一一化佛有七菩薩以爲侍者一一菩薩二手皆執如意寶珠其珠金光青黃赤白及摩尼色皆悉具足如是圍繞諸光畫中是名佛頸出圓光相脣臆字文卽字印中缺瓮滿相腋下珠相是諸相中一一勝相有五百色雜色

量三

十一

光明共相映發各不相妨一一色光圍繞頸光足五百帀一一畫中五百化佛一一化佛五百菩薩以爲侍者五百比丘手執白拂侍立左右諸化佛光化菩薩光化比丘光於衆光中皆悉顯現大須彌山四天王宮諸天宮殿日月星辰龍宮神宮阿脩羅宮十寶山神四海水神及諸水性乾闥婆等諸婆羅門所尊敬事九十五種神仙異術父母所親歷世因緣如是等神於佛光中悉皆顯現復有百億無量鬼神影現圓光爲閻浮提人說孝養事此影化人見衆人時皆自說言我是汝父我是汝母無量世中汝字某甲我名某甲如是衆多無量大衆皆是衆生所尊敬事於佛圓光了了如畫如鏡見面如是衆相名爲圓光圍繞佛頸上亦一尋下亦一尋左亦一尋

右亦一尋足滿八尺於圓光中流出化佛一切衆生所希有事悉於中現了了分明於圓光上有金色焰如摩尼珠嚴顯可愛摩尼燄間化生華樹其樹金色百千萬億閻浮檀金不可爲比一一樹下有寶蓮華華上化佛眞黃金色如瑠璃蓋以覆佛上顯發金顏分齊分明如是化像其數無量佛在世時世尊行時此光照地前一由旬純黃金色後一由旬純黃金色左一由旬純黃金色右一由旬純黃金色有人近佛左右行者其人臭穢皆悉不現人遠望之同爲金色佛坐樹下此光赫弈如衆金華散祇樹間有人諦觀佛項光者前行看者見佛在前從後看者見佛在後左邊看之見佛在左右邊看之見佛在右八方人來遙見項光各作是言瞿曇沙門在金山

量三

十二

中遊行自在來向我所如是衆人各各異見是名項光見此光時佛頂肉髻生萬億光光光相次乃至上方無量世界諸天世人十地菩薩亦不能見其髮右旋上妙螺文蜂翠孔雀色不得比有千光明赫奕而起此光起時佛肉髻骨及佛頭中一切妙相皆悉映現滿足面相光明可愛人天淨國報得妙華不得爲譬佛面光明益更明顯佛頸佛臂及以佛臂勝前數倍光更明顯佛膝出光其光白色分爲四支隨身上轉化作白華入項光下齊出五光光有二支支有五色入脅骨中如白玉簫盛衆色水從兩肩後自然涌出如金摩尼燄燄相拄諸摩尼光有妙蓮華一一蓮華上有七化佛如畫如印隨佛身轉不相障礙鹿王踰鈎鎖骨蟠龍結間如是中間出諸金

光此一光從一節出入一節間如是和合成一大光如金摩尼住佛肘後焰至項光赤銅爪足指縵網各各有光其光赫奕瑠璃玻瓈備七寶色從佛足趺副稱佛身如摩尼珠亦如前光上至圓光足下輪相及長足跟各生一華其華微妙猶如淨國優鉢羅華佛足跟出圍繞諸光滿足十而華華相次一一華中有五化佛一一化佛五十菩薩以爲侍者一一菩薩其頂上生摩尼珠光此相現時佛身毛孔一一孔中旋生八萬四千微細諸小光明嚴飾身光極令可愛如是種種雜色名爲常光名適意光亦名隨諸衆生所樂見光亦名施衆生眼光此光一尋其相衆多瞿師羅觀佛此光隨小乃至他方諸大菩薩觀佛之時此光隨大如雜華說佛白父王及勑阿

難吾今爲汝悉現具足身相光明作是語已佛從座起告阿難言汝諸比丘并諸釋子皆悉起立合掌向佛諦觀如來從項光明下至足光從頂肉髻下至足下平滿之相復勑比丘復從足下平滿相上乃至肉髻亦觀如來身光項光復勑從佛一一毛孔盡一身分一事觀皆令了了如人執鏡自觀面像若生垢惡不善心者若有毀犯佛禁戒者見像純黑猶如炭人釋子衆中五百釋子見佛色身猶如炭人比丘衆中有一千人見佛色身如赤土人優婆塞衆中有十六人見佛色身如黑象脚優婆夷衆中二十四人見佛色身猶如聚墨如是四衆各各異見比丘尼衆中有比丘尼見佛色身如白銀色優婆夷衆中有優婆夷見佛色身如藍塗青色如是四衆觀

佛色身所見不同時諸四衆聞佛是語啼哭
兩淚合掌白佛我等今者不見妙色五百釋
子自扳頭髮舉身投地鼻中血出佛生我家
佛初生時衆人皆見純黃金色唯有我等恒
見佛身猶如炭人亦如羸瘦諸婆羅門我等
宿世有何罪咎量三惟願佛曰爲我解說十四是語
已自扳頭髮啼哭如前宛轉自撲爾時慈父
出梵音聲安慰諸釋及諸四衆善男子等如
來佛曰出現世間正爲除滅汝等罪咎汝等
還起佛自知時當爲汝說爾時大衆從地起
已遶佛三匝禮世尊足五百釋子詣阿難所
禮敬阿難白言尊者我之與汝俱生釋家汝
獨聰明總持佛語猶如瀉水置於異器我宿
罪故不見佛身何況聞法說是語已對阿難
哭爾時如來以梵音聲告諸釋子及勅大衆

諸兄弟等勿復號哭過去有佛名毗婆尸如
來應供正徧知出現於世教化衆生度人周
訖般涅槃後於像法中有一長者名日月德
有五百子聰明多智廣如世間一切文藝星
宿曆數無不貫練其父長者信敬佛法常爲
諸子說觀佛心亦說甚深十二因緣諸子聞
已疑惑不信言父老耄爲諸沙門之所誑惑
我諸書籍都無是義父今何處求覓得此時
父長者愍諸子故隱匿佛法不爲宣說是時
諸子同遇重病父觀諸子命不支久到諸子
所一一兒前泣淚合掌語言汝等邪見不信十五
正法今無常刀割切汝身汝心煩悶爲何所
怙有佛世尊名毗婆尸汝可稱之諸子聞已
敬其父故稱南無佛父復告言汝可稱法汝
可稱僧未及三稱其子命終以稱佛故得生

天上四天王處天上壽盡前邪見業墮大地
獄地獄受苦獄卒羅刹以熱鐵叉刺壞其眼
受是苦時憶父長者所教誨事以念佛故從
地獄出還生人中貧窮下賤尸棄佛出亦得
值遇但聞佛名不覩佛形毗舍佛出亦聞佛
名拘樓孫佛出亦聞其名拘那含牟尼佛出
亦聞其名迦葉佛出亦聞其名以聞六佛名
因緣故與我同生雖生此處我今身相端嚴
乃爾汝見我身如羸婆羅門我身金色閻浮
檀金色不得比汝見我色猶如炭人佛告諸
釋子汝今可稱過去佛名為佛作禮并稱汝
父禮過去佛亦稱我名敬禮於我未來有佛
號曰彌勒亦當敬禮說汝先世邪見之罪今
佛現世沙門大眾一切雲集汝當向諸大德
衆僧發露悔過隨順佛語懺悔諸罪佛法衆

中五體投地如太山崩向佛懺悔心眼得開
見佛色身端嚴微妙如須彌山光顯大熾既
見佛已心大歡喜白佛言世尊我今見佛三
十二相八十種好身黃金色一一相好無量
光明作是語已尋時得道成須陀洹白父王
言我等今者欲於佛法出家學道父王告言
汝自白佛佛聽汝不即往佛所白言世尊我
欲出家佛告釋子善來比丘鬚髮自落即成
沙門身所著衣化成法服合掌禮佛稱南無
佛未舉頭頃成阿羅漢三明六通皆悉具足
佛告父王大王今者見諸釋子懺悔除罪成
阿羅漢不父王白佛唯然已見佛告父王是
諸比丘前世之時以惡心故謗佛正法但爲
父故稱南無佛生生常得聞諸佛名乃至今
世遭值我出世見佛色身及見衆僧聞佛所

說懺悔衆罪因懺悔故諸障消除諸障除故
成阿羅漢佛告阿難我涅槃後諸天世人若
稱我名及稱南無諸佛所獲福德無量無邊
況復繫念念諸佛者而不滅諸障礙耶佛告
諸比丘汝等所以見佛色身如赤土者汝等
前世於然燈佛末法之中出家學道既出家
已於師和尚起不淨心然其和尚得羅漢道
知弟子心告言法子汝於和尚及衆僧所莫
起疑意若起疑意於諸淨戒永無得理時諸
比丘聞和尚說心生瞋恨是時和尚知弟子
心漸漸自制不爲其說時千弟子隨壽脩短
各欲命終和尚猶存而不涅槃是時和尚到
弟子所而說是言汝諸比丘初受法時疑師
疑戒虛食信施汝等今者欲何所怙諸人聞
是心驚毛豎白言和尚爲我說法和尚告曰

量三

十七

汝今事切不宜餘處教汝懺悔汝今但當稱
然燈佛如來應供正遍知十號具足爾時諸
比丘用和尚語咸皆稱言南無諸佛既稱佛
已尋即命終乘善心故得生天上上生忉利
封受自然畢天之壽下生世間坐前世罪虛
食信施墮餓鬼中洋銅灌咽壽命長遠八萬
四千歲餓鬼罪畢生畜生中畜生罪畢還生
人中貧窮下賤以爲莊嚴既生人中聞諸佛
名因於前世出家力故信心內發如前宿識
稱南無佛以稱佛名因緣功德八千世中常
值佛世而眼不覩諸佛色身況復聞法乃至
今日遭值我世見我身體狀如赤土佛告諸
比丘汝等先世於不疑處橫生疑見於可信
處橫生不信以是罪故不見諸佛不聞正法
如我今者現生王宮我色真正色中最上汝

見赤土時諸比丘聞佛此語各自悔責偏袒
右肩合掌向佛而作是言我於前世無量劫
時邪見疑師虛受信施此因緣故墮地獄中
今雖得出於無量世不見諸佛但聞其名今
見世尊身赤土色正長五尺是時世尊被僧
祇支示曾臆字令比丘讀誦得字已知佛功
德智慧莊嚴於卐字印中說佛八萬四千諸
功德行比丘見已讚歎佛言世尊甚奇特但
於曾字說無量義何況佛心所有功德說是
語已向佛懺悔五體投地如太山崩悲號兩
淚對佛啼哭是時世尊輒言安慰令諸比丘
心得歡喜既歡喜已猶如風吹重雲四散顯
發金顏三十二相炳然觀現既見佛已心大
歡喜發菩提心佛告父王此千比丘慇懃求
法心無懈怠於未來世過算數劫當得作佛

量三

十八

號南無光照如來應供正徧知十號具足其
作佛時地純金色七寶行樹妙寶樓閣以爲
莊嚴其土衆生皆是慙愧懺悔之徒純是菩
薩發無上意如是千佛次第出世亦如賢劫
千菩薩等次第成佛佛告大王是諸比丘疑
師疑僧獲大重罪如向所說稱南無佛所得
果報今於我世現前受記何況正念思惟佛
者諸比丘尼見佛銀色從座而起偏袒右肩
爲佛作禮白言世尊如來今者自說身色除
諸衆生無量重罪我等何故從生出家乃至
今日見佛銀色銀華銀光諸莊嚴具悉皆是
銀我等云何不見如來金光赫燄亦不見佛
三十二業果報功德是時如來聞諸尼語即
便微笑有金色光從面門出繞佛銀身足滿
十市此光現時諸尼見佛身紫金色三十二

相光明顯照不可具說諸尼見已觀眉間白
毫右旋宛轉見已歡喜應時即成阿羅漢道
三明六通具八解脫諸比丘尼自識宿命曾
於前世無量劫時有佛出世亦名釋迦文彼
佛滅後有諸弟子出家學道僧中一人遊行

量三

十九

教化見五百童女在山澤中歡娛自樂時彼
比丘攝持威儀安詳徐步至諸女所敷尼師
壇在地而坐諸女見已各各歡喜而作是言
此空閑處神仙所遊忽然有此勝士比丘來
在此坐必非凡人我宜供養各脫銀鐶散比
丘上比丘精進德行純備後必成佛願我見
之時女所散鐶汝等貪著銀寶色故生生常
在白銀山中受銀山神寶女之身以禮沙門
奉獻銀鐶今遭我世沐浴清化成阿羅漢爾
時比丘則我身是時諸女者汝身是也汝於

前世供養沙門禮諸佛故從是已來恒值諸
佛佛告父王佛人中寶祐利處多若聞名者
禮拜供養獲大重報何況繫念思佛正顏優
婆塞衆中見佛世尊如黑象脚者即從座起
偏袒右肩合掌向佛而作是言我生此國我
國王子出家成佛阿私陀仙見三十二相即
爲我說地天太子成佛無疑我聞是語歸依
於佛從是已來恒隨佛後受三歸依受持八
齋受五戒法然我罪咎但聞佛聲不見佛形
每見佛時如黑象脚何酷之甚說是語已舉
手椎胸號泣躋地是時如來以梵音聲猶如
慈父安慰其子告諸優婆塞言法子還坐佛
當爲汝除斷疑悔滅諸障礙說是語已告諸
優婆塞汝等先世無量劫時於閻浮提各作
國王王領諸國快得自在有諸沙門爲利養

故爲汝邪說不順佛教法說非法非法說法
汝等諸人皆信用之是人以此諸惡教故命
終之後墮阿鼻地獄汝等隨順惡友教故命
終亦墮黑闇地獄由前聞法善心力故今遭
我世受持五戒法汝今應當佛法僧前說汝

量三

二十

邪見邪友所教誠心懺悔諸優婆塞聞佛此
語稱南無佛稱南無法稱南無僧說諸罪咎
誠心懺悔時佛即放眉間大人相光照諸人
心心意開解同時即得須陀洹道諸優婆塞
既得道已見佛色身端嚴微妙世間無比求
佛出家成阿羅漢優婆夷衆中見佛色身猶
如聚墨者即從座起合掌向佛兩淚號哭悲
不能言舉手拍頭氣絕躋地是時世尊見是
事已以梵音聲安慰諸女告言諸女何故愁
憂乃至如是是時諸女聞佛語聲諸情根開

即起合掌白世尊言佛日出世普照一切衆
人皆見如月盛滿唯我不見佛說法時諸人
皆聞八種音聲我獨不聞如生聾人尊者舍
利弗爲我受戒乃聞其說有五戒法每至佛
會見佛世尊猶如聚墨惟願天尊以大慈悲
故除我罪咎令我得見是時世尊於師子座
還坐伸脚出千輻輪相以此示諸女諸女但
見衆妙蓮華從輪相出華上化佛猶如墨人
復更合掌向佛作禮白言世尊爲佛弟子已
經多時惟有今日見妙蓮華見諸化佛猶如
墨塗宿有何罪眼闇乃爾佛告諸女諦聽諦
聽善思念之如來今者爲汝分別過去久遠
無量世時時世有佛號一寶蓋燈王如來應
供正遍知彼佛滅後於像法中有諸比丘入
村乞食執盂持錫杖威儀不犯至淫女家時

量三

三十一

諸淫女取比丘盃盛滿盃飯戲比丘言汝釋
種子顏色可惡猶如聚墨身所著衣狀如乞
人汝之可惡天下無比自言無欲誰當念汝
爾時比丘聞此語已擲盃空中飛騰而去諸
女見已慙愧懺悔而作是言我等今者施沙
門食願於來世身得自在猶如沙門佛告諸
女爾時諸女飯羅漢者今汝等是汝以善心
施比丘食二千劫中常不飢渴坐前惡罵姪
怒因緣六十小劫墮黑闇地獄由前發願善
心不滅今遭我世得受五戒乃是供養阿羅
漢故見舍利弗不見我身爾時世尊說是語
已即於齋中出大蓮華其大蓮華化成光臺
其光臺中有百千無數聲聞比丘如舍利弗
目犍連等於佛光臺神通自在作十八變諸
女見已心生歡喜應時即以智慧大火燒二

十億洞然之結得須陀洹道諸優婆夷既得
道已見佛色身端嚴微妙唯不見佛白毫相
光佛告父王戲弄惡口乃至得道所見不明
是故諸人當勤護口專心正意觀佛三昧以
見佛故獲無量福是時世尊欲令大眾見佛
色身了了分明佛即化精舍如白玉山高妙
大小猶如須彌百千龕窟於眾龕窟影現諸
像與佛無異時佛前地有大蓮華其華千葉
葉有千光千化佛佛千弟子以爲侍者佛
告阿難佛滅度後佛諸弟子若能割捨諸事
捐棄諸惡繫念思惟佛常光者佛不現在亦
名見佛以見佛故一切諸惡皆得消滅隨其
所願於未來世當成三種菩提之道佛告阿
難如此觀者是名正觀若異觀者名爲邪觀
觀佛三昧海經卷第三

觀佛三昧海經卷第四

量四

東晉天竺三藏法師佛陀跋陀羅譯

觀相品第三之四

佛告父王云何觀如來放常光相如來今者爲未來世諸凡夫人當現少光彼諸凡夫當

量四

學是觀如是觀者亦如今日見佛光相無有

異也爾時世尊放肉髻光其光千色色作八萬四千支一一支中八萬四千諸妙化佛其化佛身身量無邊化佛頂上亦放此光光光相次乃至上方無量世界於上方界有化菩薩如雲微塵從空而下圍遶諸佛此光現時十方微塵世界諸佛亦悉得見此光直照諸佛頂上諸佛放光其光亦照釋迦文頂佛告阿難衆生欲觀釋迦文佛肉髻光明當作是觀作是觀者若心不利夢中得見雖是心想

能除無量百千重罪如是觀者現身必見諸大菩薩見菩薩故聞其說法聞說法故得陀羅尼其陀羅尼名旋憶持如是觀者名爲正觀若異觀者名爲邪觀佛告父王云何名爲觀於如來眉間光明如來今者爲此後世諸衆生故當少現於白毫相光作是語時時佛眉間即放白毫大人相光其光分爲八萬四千支支亦八萬四千色遍照十方無量世界一一光色化一金山一一金山無量龕窟一一窟中有二化佛結跏趺坐入深禪定聲聞菩薩百千大衆以爲眷屬時佛窟中有諸化佛皆放白毫大人相光亦照十方無量世界皆如金色金色地上有金蓮華金蓮華上皆有化佛亦皆同號名釋迦文諸佛眉間亦放此光其光遍照十方世界猶百千億須彌山

王共合一處諸須彌山映現諸佛佛身高顯
與山正等是等化佛眉間光明繞諸化佛滿
七布已還入釋迦牟尼眉間此光入時佛身
毛孔一毛孔中有一化像一一化像身毛孔
中化成八萬四千妙像皆是三千大千世界
一時衆生所希見事是名如來八十好中一
好光明如是八十隨形好光說不可盡如來
少現白毫光時父王所將衆中有八千人遠
塵離垢得法眼淨佛告阿難如來白毫相光
諸修多羅中佛已廣說如是妙光唯佛見佛
十地菩薩見不明了是故此中少分而說說
少分者爲凡夫人佛滅度後如是觀者名爲
正觀若異觀者名爲邪觀此光除罪如向所
說唯見光者心得了見百億佛見白毛者
是心想見云何觀如來額廣平正相如來面

上三輪相髮際相如是衆相一一相中皆出
金光其金色光化成金牀一一牀上有千菩
薩拘樓孫馱爲始下逮樓至是千菩薩皆放
光明坐金牀上如是百億千萬菩薩百億千
萬金牀其金牀上皆有寶帳一一寶帳有千
光明一一光明成千寶幢一一幢上千萬寶
蓋衆寶蓋下有諸寶幡諸寶幢中無量化佛
是諸化佛皆說苦空無常無我說此偈時一
切化佛亦皆說此釋迦文佛方身丈六在行
者前舉其右手而作是言善哉善哉善男子
汝今能觀諸佛相好我等先世行菩薩道與
汝無異汝今能觀諸佛境界此境界者但是
汝心妄想所生作是語已即滅不現額上諸
光復更明顯其光流出有百千億一一光明
照寶牀上諸菩薩面彼菩薩面亦出光明照

釋迦文此相現時行者真觀佛面了了無疑
佛告阿難佛滅度後佛諸弟子能如是觀真
見佛面與我住世等無有異作此觀者除却
一億劫生死之罪後身生處面見諸佛生諸
佛家諸佛菩薩以爲眷屬如是觀者名爲正
觀若異觀者名爲邪觀云何觀如來鼻出光
明鼻出光明分爲四支上入佛眼佛眉佛睫
出大光明其光靉靄如龍象形遍照十方無
量世界入諸佛眼此相現時十方大明是時
行者見十方界地及虛空諸佛滿中一一佛
眼眉睫鼻孔放大光明亦復如是佛眼兩光
其明遍照入諸佛眼於虛空中化成光臺其
光臺上純是光雲光雲青白世界無比於青
光中有青色化佛於白光中有白色化佛此
青白佛左右分明百寶色光以爲其雲如神

通人飛騰雲間身諸毛孔猶如華樹一一華
樹上至梵世諸華葉間有百千億聲聞比丘
一一比丘著千納衣千納千色一一色中百
千化佛皆純金色是諸比丘涌身雲中亦隨
佛後如龍象行其子隨從佛告阿難佛滅度
後佛諸弟子若能正心觀佛眼光即於現世
重障得除於當來世常得觀佛不離佛目雖
處母胎常入三昧在母胎時見十方佛皆放
眼光來照其身胎殼中時常受妙法況出於
外如是觀者名爲正觀若異觀者名爲邪觀
鼻出二光其光遍照十方世界其一光化
成大水其水住空流入諸光此水入時一切
光明唯更明顯一一光間生玻璃山玻璃山
間生七寶華其華臺上湧出衆水其水金色
猶如金幢其金幢內有百千萬無量化佛一

一化佛方身丈六身毛孔中八萬四千上妙寶色諸寶色中復放光明其光微妙有恒沙色佛告阿難佛滅度後佛諸弟子作是觀者除却千劫極重惡業後世生處心無所著不處胞胎恒常化生既化生已身光具足不離諸佛如是觀者名爲正觀若異觀者名爲邪觀云何觀如來面門光明其光白色猶如寶山內外俱淨於寶山內無量化佛真金精色時諸化佛面門出光其光五色徧照十方入諸佛面門此相現時行者行住坐卧恒聞如來說四念處身受心法并說境界令行者聞聞已憶持閉目思惟此光力故即得四念處法時十方佛及釋迦文於三昧中各申右手摩行者頂而作是言善哉善哉善男子汝能眞實行念佛定如是觀者名爲正觀若異觀

並四

五

者名爲邪觀云何觀如來耳耳出五光其光千色色千化佛佛放千光如是光明徧照十方無量世界化成一華其華甚大量不可知除佛心力無能知者是蓮華中百千萬億無量佛刹皆於中現百千萬億諸大菩薩坐一華鬚華鬚不大菩薩不小亦不相妨如是菩薩耳普睡睡如金蓮華懸處日光亦於耳中旋生五光此相現時佛耳中毛如帝釋樹衆所喜見佛告阿難佛滅度後佛諸弟子作是觀者常聞百億千佛及諸菩薩說深妙法不壞耳根如是觀者名爲正觀若異觀者名爲邪觀云何觀如來頸相頸相出二光其光萬色徧照十方一切世界有諸衆生善根熟者遇斯光明悟十二緣成辟支佛此光照諸辟支佛頸此相現時行者徧見十方一切諸辟

支佛擲盂虛空作十八變諸辟支佛一一足下皆有文字其字演說十二因緣無明緣行緣識緣名色名色緣六入六入緣觸緣受受緣愛愛緣取取緣有有緣生生緣老死憂悲苦惱一字一光一光十二音一音說苦空無常無我一音演說十二因緣如是辟支佛足下光中皆有是字逆順往返凡十二遍是名生死之根本也此光照諸辟支佛已還入佛頸作此觀者不生人中生兜率天值遇一生補處菩薩爲說妙法既聞法已身心歡喜學諸菩薩觀緣起法如是觀者名爲正觀若異觀者名爲邪觀云何觀如來缺髻骨滿相滿相光明遍照十方作琥珀色若有衆生遇此光者自然興發聲聞道意是諸聲聞見此光明分爲千支一支千色十千光明光

量四

六

有化佛一一化佛有四比丘以爲侍者一一比丘皆說苦空無常無我分別四諦說八人義說四果相說三昧令彼衆生於此法中求出家法出家不久成阿羅漢如是光明遍照十方諸羅漢頂照頂之時如人執瓶灌藥入頂其狀色貌猶如醍醐從頂入已貫徹表裏爾時行者身心安隱其心恬然無有惡想不見諸使及結相貌如是霍然成阿羅漢此光復變作金色蓋其數無量一一蓋中百千七佛一一七佛有四比丘以爲侍者一一比丘入四大定四大定中遍現一切結使相貌八萬戶蟲宛轉而出小蟲種類亦皆隨從此相現時火大先起火大起者初如芥子從毛孔生後漸漸長遍燒諸身身如火聚諸蟲鳴吼如師子聲此聲出時行者心怖迷悶躋地

出定見身如野火行傍樹爲焦此相現時復當起心作一藥想先作身想身想既成開頂令空作梵王想作帝釋想作諸天手持寶瓶想持藥灌想藥入頂時遍入四體及諸脉中見脉及身如瑠璃筩但見諸蟲如萎死華爾

量四

七

時諸脉更相流注唯有衆水水至之處火則隨滅是時行者節節水出如人仰射水至梵際水水相次至于梵天見身中水如四大海但見諸蟲頭萎摧茹手折脚戾惟心生火分爲十支火入衆水不相消滅水光上衝火光隨逐水火二光皆從心出互相交錯上極三界頂下至阿鼻獄盡一世界際純見水火流東西南北火亦隨走爾時心端自然生一黑毛於其毛端出大黑風其風四色隨心根起如旋嵐風狀如烟燄其風遍吹一切諸水其

水波動沫聚成積火亦入中得火力故沫堅如冰復有風來吹諸塵穢九十八種惡不淨物持置冰上冰力弱故隨不淨物著處即解此冰解時八人執刀斫冰段取各持而去塵土坌汙心悶而卧風火水等合聚一處火力大故燒壞衆物有四惡蛇含一寶珠從火燄出凌雲飛逝有六大龍迎四小螭吞吸而走龍頂生樹至無色界有一小草細若秋毫色正金色從樹稽生下入樹根從樹根生上入樹莖從樹莖生散入枝葉其華白色亦有紅赤其果欲熟猶作四色至八月半純黃金色如此光明照諸聲聞變化無量百千境界如是觀者名爲正觀若異觀者名爲邪觀若有比丘入此定時身如芭蕉無有堅實出定之時身體支節悉皆疼痛瘁若不服藥發狂而死

應當隨時衆藥消息作是觀者除無數劫生死之罪如大水流不久當得阿羅漢道佛告阿難汝持佛語真實莫忘爲諸比丘當廣宣說說是語時五百比丘得四大定同時皆得四沙門果云何觀如來曾臆字卍字相腋下摩尼珠皆放光明其光紅紫中有金華其華開敷化爲無量百千萬億無數衆華一一華上有無量佛是諸化佛各有千光光一化佛其光五色若有衆生遇此光明狂者得正亂者得定病者得愈貧窮者自然得寶盲者得視聾者得聽瘡者能言癰跛疥癩皆得除愈遍入十方諸佛頂上入已諸佛曾中有百千光從卍字生一一光中歌百千偈演說檀波羅蜜如是衆光演說六波羅蜜其偈無量行者正坐聞無量佛皆說是法一一化佛遣一

化人端嚴微妙狀如彌勒安慰行者而作是言善哉善哉善男子汝繫念故見諸佛光諸佛光中說無相施說無相戒說無相忍說無相精進說無相定說無相慧汝聞此法慎勿驚怖過去諸佛繫念思惟亦聞是法亦解是相解是相已不畏生死處大地獄阿鼻猛火火不能燒雖處地獄如遊天宮是故卍字名實相印諸佛如來無量無邊阿僧祇却學得此印得此印故不畏生死不染五欲佛告阿難佛滅度後佛諸弟子見佛曾相光者除却十二萬億劫生死之罪若不能見曾相分明者入塔觀之如是觀者名爲正觀若異觀者名爲邪觀云何觀如來寶臂膊纖圓如象王鼻相手十指合縵掌千輻輪各各皆放百千光明一一光明分爲千支純作紅色如是衆

光遍照十方無量世界照世界已化成金水
金水之中有一妙水如水精色餓鬼見者除
熱清涼畜生見者自識宿命狂象見者爲師
子王師子見之爲金翅鳥諸龍見之爲金翅
鳥王是諸畜生各見所尊心生恐怖合掌恭
敬以恭敬故命終生天衆人見者如梵天王
或如日月星辰見已歡喜命終生兜率天行
者見之心眼即開時十方界滿中化佛一一
化佛手出光明入行者眼閉目開目恒見諸
佛自觀身相如妙寶瓶中有不淨如是見者
雖未得通遍至十方歷侍諸佛見一一佛出
手光明亦復如是如是觀者名爲正觀若異
觀者名爲邪觀云何觀如來齋相如來齋中
有萬億寶華一一寶華萬億那由他葉一一
葉萬億那由他色一一色萬億那由他光此

相現時一切大衆見佛心相如來心者如紅
蓮華金華映蔽妙紫金光以爲閻錯妙瑠璃
甯懸在佛臂見佛身內萬億化佛是諸化佛
遊佛心間佛齋出光其光熾然如須彌山衆
山中間有無量寶山如須彌山此衆華上皆
有化佛嚴顯可觀如須彌山其光千種有十
千色分爲十億億支億億支照下方億億支
照上方億億支照東方億億支照南方億億
支照西方億億支照北方億億支照東南方
億億支照西南方億億支照西北方億億支
照東北方如是十方各有諸華華極小者猶
如百億須彌山大一須彌山有百億萬諸大
菩薩身極小者如須彌山諸化菩薩齋中各
生一大蓮華其諸蓮華遍覆三千大千世界
一一華間有金色光其光猶如閻浮檀金一

一金光化微塵數釋迦牟尼一一釋迦齋中
光明亦復如是如是衆光合成光臺其衆光
臺亦有無量微塵恒沙諸大化佛佛佛相次
放齋光明其光大盛直照上方無量世界復
過是界如是衆界數如三千大千世界無量
微塵是世界中皆有瑠璃玻瓈億寶以爲佛
窟是衆窟中各有萬億無量諸佛諸佛齋中
各各皆生一大蓮華與前無異是諸光明照
諸一切十地菩薩是諸菩薩遇斯光已即入
微妙首楞嚴門復得入於金剛譬定諸天遇
者深發無上正真道意心眼開明見諸佛相
如此光明照菩薩已令諸菩薩身諸毛孔一
毛孔中出阿僧祇諸供養雲及衆供具蓋極
小者覆閻浮提如是衆多雜寶供具不可悉
說此諸供具從首楞嚴湧生佛告阿難若善

量四

十一

男子善女人作是思惟時如是憶想者夢見
此事者生生之處恒常值遇普賢文殊是法
王子爲衆行者夢中恒說過去未來三世佛
法說首楞嚴三昧般舟三昧亦說觀佛三昧
以爲瓔珞覺已憶持無所忘失此人現世功
德天女以爲給使除却十萬億劫生死之罪
如是觀者名爲正觀若異觀者名爲邪觀億
億光照下方令下方地如閻浮提水色於衆
水中有恒沙寶樓衆寶樓下有一寶城如捷
闍婆城於寶樓上有大寶樹其樹枝葉一切
火起其火光燄上下俱燒燒此衆水化成瑠
璃瑠璃地上復生諸樹樹有四龍其龍頂上
有如意珠其珠光明遍照龍身令龍及樹純
黃金色其龍奮迅諸龍毛孔出金色光其光
直照下方無量世界復過下方復照無量世

界令下方地皆作金色金色地上有金剛華
金剛華上有金天女一天女百千天女以
爲眷屬是諸天女皆讚慈心三昧海從下方
出直至上方迦毗羅城其聲如雷讚說慈心
說是語時諸龍毛端出諸寶雲一一雲中有
恒沙佛刹一一刹中塵數化佛一一化佛出
此光明此光現時下方世界有百萬金山於
其巖間百億寶窟如雲涌起是衆窟中純諸
白佛白妙菩薩及聲聞衆以爲侍者金精寶
光在佛左右猶如斷山衆寶映錯有妙寶蓋
如須彌山無量寶成一寶間百億光明迴
旋宛轉於衆光中有百億師子座一一師子
座上有百億那由他菩薩大衆結跏趺坐時
彼菩薩身毛孔中有阿僧祇光一一光中有
一化佛其身脩圓如須彌山是諸化佛以百

量四

十二

千偈讚說不殺慈爲根本慈是妙藥除生死
患慈爲淨目導諸天人是諸化佛讚歎慈已
各作變化爲瑠璃山於其山內百億菩薩一
一菩薩有萬梵王以爲侍者到行者前於寶
山內異口同音皆說是法告言善男子汝於
念佛海應修慈心諸佛菩薩以慈心故得佛
大慈汝今應當修不殺戒行大慈心爾時亦
有天龍八部一切衆生遇此光者聞是語者
命終之後必生梵世佛告阿難汝持此語慎
勿忘失告諸比丘令行是事佛滅度後佛諸
弟子若聞是語思是法者有正念者有正受
者三昧不動者心不懈退者發大乘者當知
是人恒於夢中見此光明亦聞化佛說慈心
法覺已憶持深解義趣思其義故即得慈定
如是觀者名爲正觀若異觀者名爲邪觀佛

滅度後佛諸弟子思是法者持是法者當知是人其心清淨如諸佛心除却億劫生死之非常生梵世值遇諸佛請轉法輪既聞法已發菩提心於未來世必成佛道億億光照東方乃至東方無量世界令東方地白如雪山於衆山上有白寶雲其白寶雲狀如寶臺衆寶羅網寶鈴萬億衆鈴網間有一億白光是諸白光化成金臺一金臺上有四化佛一一化佛四億菩薩以爲侍者佛與菩薩皆說慈法讚歎不殺凡千億偈如是觀者名爲正觀若異觀者名爲邪觀佛告阿難佛滅度後佛諸弟子如是觀者除半億劫生死之罪億億光照南方令南方地皆作紅色此紅色光乃至南方無量世界變成白雲紅白分明於衆雲間有諸化佛白真珠色毗瑠璃光上妙金

華以爲佛座於金華上百億菩薩皆黃金色百億寶光映蔽白雲一一光中五百化佛是諸化佛異口同音亦讚不殺及大慈悲如是觀者名爲正觀若異觀者名爲邪觀佛告阿難佛滅度後佛諸弟子聞是法者思是法者觀是法者此人恒於夢中見釋迦文放齋光明以用照之此光明相如向所說其人生處不處胞胎恒生淨國若生天上自然化生億億光照西方乃至西方無量世界其光雜色如月如星衆星月間有七寶珠一珠出水一珠出火一珠生樹其樹七寶金剛爲果一珠生華於月光中有梵宮殿梵王眷屬及梵衆寶皆悉具足其星光中有摩醯首羅宮及其眷屬一一天宮百萬億梵王一一梵王無量無數諸天大衆以爲眷屬摩醯首羅等數不

可知是諸寶珠出瑠璃光瑠璃光內有真金像其真金像坐白寶座頂佩赤真珠光赤真珠光中有綠真珠化佛是諸化佛及諸天衆異口同音讚說不殺勸進行者行大慈悲佛告阿難如是觀者名爲正觀若異觀者名爲

量四

十四

邪觀佛滅度後佛諸弟子有憶想者有思惟者如此觀者常於夢中夢見諸佛爲說慈法除却七億劫生死之罪億億光照北方乃至北方無量世界令北方地皆珊瑚色琥珀玫瑰真珠碼瑙玻璃等寶以爲間錯一一寶中

有一億光一一光化作一師子師子背上有七寶蓋其蓋高妙如須彌山瑠璃爲竿雜寶綵華以爲莊嚴一一華上有百億化佛一一佛面如閻浮檀金色髮紺瑠璃色身百億寶色臂紅真珠色爪真金色手中相白蓮華色

鹿王踰曇華色足下相毗楞摩尼色從足下放五色光上至髮際身諸毛孔皆有化光一毛孔中有一億菩薩一一菩薩齋有一大蓮華其華高大如須彌山百寶所成華上有佛其佛高大與華正等亦出齋光此相現時衆寶師子奮迅若驚師子衆毛一一毛端有百億佛刹一一佛刹無量百億衆寶蓮華以爲莊嚴其蓮華上亦有百千大菩薩衆是諸菩薩亦出齋相如上菩薩如是菩薩衆色光明合成一山其山高顯如真金臺其臺四角

量四

十五

有四梵幢幢端皆有四億佛刹一一刹中有百千塔塔極小者從閻浮提至於梵世無數衆妙一切寶像以爲莊嚴是諸寶塔及化菩薩皆共讚歎喜捨二法若有衆生遇斯光者得大智慧如舍利弗總持不失猶如阿難佛

告阿難佛滅度後佛諸弟子欲見是相者當發慈心修不殺戒普爲十方一切衆生行是行者雖不坐禪恒於夢中得見衆色如向所說佛告阿難持是語者即持佛心作是觀者能觀佛心諸佛如來以大慈悲而以爲心戒定慧解脫解脫知見而以爲身十力四無所畏十八不共法大悲三念處而自莊嚴如是觀者名觀佛心佛告阿難此齋相中略而解之佛心境界後自當說如是觀者名爲正觀若異觀者名爲邪觀佛滅度後佛諸弟子思是法者持是法者觀是法者此人現世惡業罪障皆悉清淨億億光照東南方乃至東南方無量世界化成金輪一一金輪七寶隨從一一金輪百億轉輪聖王一一轉輪聖王千子四兵皆悉具足其化珠寶出大光明如烟

如雲一一光中有大蓮華華華相合合華之中出大日光一一日光有金色象菩薩化乘乘象之時萬億瑞應不可宣說諸菩薩光合成一佛其佛金色身量無邊亦出齋相齋相光明亦如上說諸光中人皆讚五戒說十善法諸轉輪王手執金輪宣十善法佛告阿難如是觀者名爲正觀若異觀者名爲邪觀佛滅度後佛諸弟子憶想是者思惟是者觀是法者却二十萬億劫生死之罪常生天上聞十善教億億光照西南方乃至西南方無量世界至彼界已其光如雨似雜色珠一一珠中出百億光一一光合成寶臺一一臺角有十二須彌山一一須彌山龕室無量一一龕中有無量化佛一一化佛有無量菩薩以爲眷屬是衆化佛及化菩薩亦皆讚歎說十善

法如是觀者名爲正觀若異觀者名爲邪觀
佛告阿難佛滅度後佛諸弟子憶想是者思
惟是者觀是法者除十二億劫生死之罪若
欲往生他方淨刹隨意無礙億億光照西北
方乃至西北方無量世界其光玉色玻瓈紅
紫更相映飾一一光中百億寶車白車白馬
紫車紫馬紅車紅馬諸馬毛鬣皆真金色如
是車上有七寶軒軒上皆悉有蓋其蓋十層
於軒蓋中有千光明寶鬘垂下光明隨流迴
入車中化成化佛佛身高顯萬億由旬一一
佛齋出無數光其光遍照無量化佛遇此光
者永脫三塗無三惡患此光迴旋正立空中
如雲上昇一一雲間百千化佛一一化佛百
億弟子如大迦葉勤修十二頭陀苦行心無
所著默離世間如是觀者名爲正觀若異觀

量四

十七

者名爲邪觀佛告阿難佛滅度後佛諸弟子
想是法者思惟是法者觀是法者當知此人
常見諸佛速成大乘除却十億劫生死之罪
億億光照東北方乃至東北方無量世界其
光清淨無諸濁穢如玻瓈鏡內外俱現於彼
光中見十方佛皆出齋相一一佛齋光明遍
照十方無量諸佛刹土一一佛刹有微塵數
化佛一一化佛微塵數菩薩以爲眷屬如是
菩薩齋相光明猶如金柱其金柱端萬億天
衣寶箱寶篋譬如雲臺從空而下一一箱篋
萬億光明一一光明合成一佛一佛身中無
量微塵無數化光於諸光端有諸化佛猶如
芥子此小佛身亦出齋相如上所說此齋光
明遍照十方入諸佛齋從諸佛齋出入諸菩
薩曾從諸菩薩曾出入諸聲聞頂從諸聲聞

頂出譬如大雲無量金色衆寶間錯入佛足
下入足下已足下千輻相中出大光明其光
如華華華相次繞佛億而從赤銅爪足趺毛
孔乃至頂髻佛身諸毛如蓮華敷一毛孔中
有八萬四千蓮華一蓮華上八萬四千化佛
一一化佛八萬四千諸大菩薩以爲眷屬一
一菩薩眉間衆光出妙音聲讚歎佛色身相釋
迦文佛現此光已告大王言如來色身分別
色相除佛現已其餘境界如向所現佛說是
已爾時父王即從座起整衣服爲佛作禮遶
佛七匝胡跪合掌白佛言世尊如來身色一
切都現唯佛心內有何境界有何相貌修行
何事佛心所念爲是何物佛心光明何所像
類是時如來即便微笑其舌相光如上所說
遶佛七匝從佛頂入爾時如來入解脫相三

量四

十八

昧令父王見如瑠璃窟成眞金像眞金像內
於佛胷中如瑠璃甯從佛咽喉下見如來心
如紅蓮華金華映飾紅華金光不開不合團
圓如心八萬四千脉一一脉如天畫師所畫
之脉一一畫中八萬四千光明一一光明八
萬四千種色一一色中無量微塵數化佛一
一化佛坐金剛臺其金剛臺放金色光明其
光無數不可具說一一光中亦有化佛數如
上說是諸化佛皆出廣長舌相上至髮際一
一佛舌有一億光其光合聚爲十千段一一
光上有百億化佛結跏趺坐入普現色身三
昧十方諸佛微妙色身入此三昧海中當佛
入此三昧時迦毗羅城及尼拘樓陀精舍并
閻浮提如大寶華於華臺上有玻瓈幢玻瓈
幢端有玻璃鏡十方無量諸佛淨國皆於中

觀佛三昧海經卷第五

量五

東晉天竺三藏法師佛陀跋陀羅譯

觀佛心品第四

是時佛心如紅蓮華蓮華葉間有八萬四千諸白色光其光徧照五道衆生此光出時受

量五

苦衆生皆悉出現所謂苦者阿鼻地獄十八小地獄十八寒地獄十八黑闇地獄十八小熱地獄十八刀輪地獄十八劒輪地獄十八火車地獄十八沸屎地獄十八鑊湯地獄十八灰河地獄五百億刀林地獄五百億劒林地獄五百億刺林地獄五百億銅柱地獄五百億鐵機地獄五百億鐵網地獄十八鐵窟地獄十八鐵丸地獄十八火石地獄十八飲銅地獄如是等衆多地獄佛告阿難云何名阿鼻地獄阿言無鼻言遮阿言無鼻言救阿

言無間鼻言無動阿言極熱鼻言極惱阿言不閉鼻言不住不閉不住名阿鼻地獄阿言大火鼻言猛熱猛火入心名阿鼻地獄佛告阿難阿鼻地獄縱廣正等八千由旬七重鐵城七層鐵網下十八隔周帀七重皆是刀林七重城內復有劒林下十八隔隔八萬四千重於其四角有四大銅狗其身廣長四千由旬眼如掣電牙如劒樹齒如刀山舌如鐵刺一切身毛皆出猛火其烟臭惡世間臭物無以可譬有十八獄卒頭羅刹頭口夜叉口六十四眼眼散迸鐵丸如十里車狗牙上出高四由旬牙頭火流燒前鐵車令鐵車輪一一輪輞化爲一億火刀鋒刃劒戟皆從火出如是流火燒阿鼻城令阿鼻城赤如融銅獄卒頭上有八牛頭一一牛頭十八角一一角頭

皆出火聚火聚復化成十八輞火輞復變作
火刀輪如車輪許輪輪相次在火燄間滿阿
鼻城銅狗張口吐舌在地舌如鐵刺舌出之
時化無量舌滿阿鼻城七重城內有七鐵幢
幢頭火涌如沸涌泉其鐵流迸滿阿鼻城阿

量五

鼻四門於門閫上有八十釜沸銅涌出從門
漫流滿阿鼻城一一隔間有八萬四千鐵蟒
大蛇吐毒吐火身滿城內其蛇哮吼如天震
雷雨大鐵丸滿阿鼻城此城苦事八萬億千
苦中苦者集在此城五百億蟲蟲八萬四千
紫紫頭火流如雨而下滿阿鼻城此蟲下時
阿鼻猛火其燄大熾赤光火燄照八萬四千
由旬從阿鼻地獄上衝大海沃焦山下大海
水滴如車軸許成大鐵尖滿阿鼻城佛告阿
難若有衆生殺父害母罵辱六親作是罪者

命終之時銅狗張口化十八車狀如金車寶
蓋在上一切火燄化爲玉女罪人遙見心生
歡喜我欲往中我欲往中風刀解時寒急失
聲寧得好火在車上坐然火自爆作是念已
即便命終揮霍之間已坐金車顧瞻玉女皆
捉鐵斧斬截其身身下火起如旋火輪譬如
壯士屈伸臂頃直落阿鼻大地獄中從於上
隔如旋火輪至下隔際身遍隔內銅狗大吼
齧骨啖髓獄卒羅刹捉大鐵叉叉頸令起遍
體火燒滿阿鼻城鐵輞雨刀從毛孔入化閻
羅王大聲告勅癡人獄種汝在世時不孝父
母邪慢無道汝今生處名阿鼻地獄汝不知
恩無有慚愧受此苦惱爲樂不耶作是語已
即滅不現爾時獄卒復驅罪人從於下隔乃
至上隔經歷八萬四千隔中擗身而過至鐵

量五

三

網際一日一夜爾乃周遍阿鼻地獄一日一夜此間浮提日月歲數六十小劫如是壽命盡一大劫五逆罪人無慚無愧造作五逆五逆罪故臨命終時十八風刀如鐵火車解截其身以熱逼故便作是言得好色華清涼大樹於下遊戲不亦樂乎作是念時阿鼻地獄八萬四千諸惡劍林化作寶樹華果茂盛行列在前大熱火燄化爲蓮華在彼樹下罪人見已我所願者今已得果作是語時疾於暴雨坐蓮華上坐已須臾鐵觜諸蟲從火華起穿骨入髓徹心穿惱攀樹而上一切劍林削肉徹骨無量刀林當上而下火車爐炭十八苦事一時來迎此相現時陷墜地下從下隔上身如華敷遍滿下隔從下隔起火燄猛熾至於上隔至上隔已身滿其中熱惱急故張

眼吐舌此人罪故萬億融銅百千刀輪從空中下頭入足出一切苦事過於上說百千萬倍具五逆者其人受罪足滿五劫復有衆生犯四重禁虛食信施誹謗邪見不識因果斷學般若毀十方佛偷僧祇物淫泆無道逼掠淨戒諸比丘尼姊妹親戚不知慙愧毀辱所親造衆惡事此人罪報臨命終時風刀解身偃臥不定如被楚撻其心荒越發狂癡想見已室家男女大小一切皆是不淨之物屎尿臭處盈流于外爾時罪人即作是語云何此處無好城郭及好山林使吾遊戲乃處如此不淨物間作是語已獄卒羅刹以大鐵叉擎阿鼻獄及諸刀林化作寶樹及清涼池火燄化作金葉蓮華諸鐵觜蟲化爲鳬鴈地獄痛聲如詠歌音罪人聞已如此好處吾當遊中

念已尋時坐火蓮華諸鐵觜蟲從身毛孔噉食其軀百千鐵輪從頂上入恒沙鐵叉挑其眼睛地獄銅狗化作百億鐵狗競分其身取心而食俄爾之間身如鐵華滿十八隔中一華葉八萬四千一一葉頭身手支節在一隔間地獄不大此身不小遍滿如此大地獄中此等罪人墮此地獄經歷八萬四千大劫此泥犁滅復入東方十八隔中如前受苦此阿鼻獄南亦十八隔西亦十八隔北亦十八隔謗方等經具五逆罪破壞僧祇汙比丘尼斷諸善根如此罪人具衆罪者身滿阿鼻獄四支復滿十八隔中此阿鼻獄但燒如此獄種衆生劫欲盡時東門即開見東門外清泉流水華果林樹一切俱現是諸罪人從下隔見眼火暫歇從下隔起宛轉腹行揅身上走

卷五

五

到上隔中手攀刀輪時虛空中雨熱鐵丸走趣東門既至門闔獄卒羅刹手捉鐵叉逆刺其眼鐵狗齧心悶絕而死死已復生見南門開如前不異如是西門北門亦皆如此如此時間經歷半劫阿鼻獄死生寒冰中寒冰獄死生黑闇處八千萬歲目無所見受大蛇身宛轉腹行諸情闇塞無所解知百千狐狼牽掣食之命終之後生畜生中五千萬身受鳥獸形還生人中聾盲瘡痂癰疽貧窮下賤一切諸衰以爲嚴飾受此賤形經五百身後復還生餓鬼道中餓鬼道中遇善知識諸大菩薩呵責其言汝於前身無量世時作無限罪誹謗不信墮阿鼻獄受諸苦惱不可具說汝今應當發慈悲心時諸餓鬼聞是語已稱南無佛稱佛恩力尋即命終生四天處生

彼天已悔過自責發菩提心諸佛心光不捨
是等攝受是輩慈哀是等如羅睺羅教避地
獄如愛眼目佛告大王欲知佛心光明所照
常照如此無間無救諸苦衆生佛心所緣常
緣此等極惡衆生以佛心力自莊嚴故過算
數劫令彼罪人發菩提心佛告阿難云何名
十八寒地獄寒地獄者八方冰山山十八隔
復有十八諸小冰山如玻璃色此等寒冰滿
冰山間如凡蓮華高十八由旬上有冰輪縱
廣正等十二由旬如天雨雹從空而下世間
自有無慈心者劫奪無道抄盜剝脫凍殺衆
生此人罪報欲命終時一切刀風化爲熱火
罪人作念我今云何不卧冰上爲火所逼作
是念時獄卒羅刹手執冰輪如白鶴翔躡虛
而至罪人見已除熱清涼心便愛念氣絕命

量五

六

終生冰山上既生之後十八冰山如以扇扇
一切寒冰從毛孔入十八隔中遍滿一隔割
裂劈坼如赤蓮華冰輪上下遍覆其身八方
冰山一時俱合更無餘辭但言阿羅羅爾時
罪人即作是念我於何時當免寒冰生熱火
中爾時空中有諸鐵鳥口背吐火從空中下
破冰啄腦罪人即死命終之後獄卒復以鐵
叉打地喚言活活應聲即甦起已思念我今
身上大火猛熾願得前冰以滅此火獄卒復
以冰輪迎接置餘獄中如是十八隔中無不
經歷此寒地獄壽命歲數如四天王日月八
千萬歲罪既畢已生賤人中貧窮鄙陋五百
世中爲人奴婢衣不蔽形食不充口此罪畢
已遇善知識發菩提心佛告阿難云何名黑
闇地獄黑闇地獄者十八重黑山十八重黑

網十八重鐵牀十八重鐵縵一一山高八萬四千由旬其鐵縵亦厚八萬四千由旬一一縵間十八重黑鐵圍山羅列如林陰闇此山世間自有愚癡衆生偷佛法僧燈明偷盜父母師長和尚謗說法者亦毀世俗論議師等

量五

七

不忌尊卑不知慙愧以此罪故命欲終時眼有電光睽睽不停即作是念我有何罪常見是火即閉兩目不願欲見及日月光命欲終時獄卒羅刹擎大鐵牀張大鐵傘如大隊雲乘虛而至爾時空中無形有聲此處黑闇汝欲往不罪人聞聲尋即起心欲往彼所氣絕命終坐鐵牀上如鷹王翔落黑闇處既入中已刀輪上下斬剉其身有大鐵鳥觜距長利從山飛來抓啄罪人痛急疾走求明不得足下鍬鏹穿骨徹髓如是憺惶經五百萬億歲

亦如四天王日月歲數彼人頭打諸黑闇山腦流眼出獄卒羅刹以鐵叉叉還安眼眶罪畢乃出爲貧窮人眼目角疎盲冥無見或被癩病人所驅逐如是罪報經五百身過是已後遇善知識發菩提心佛告阿難云何名爲十八小熱地獄十八小熱地獄者如阿鼻獄亦七重城七重鐵網無量諸惡以爲莊嚴自有衆生不順師教興惡逆心不知恩養盜師害師汙師淨食坐師牀座捉師鉢盂藏去不淨作五種惡云何爲五所謂罵師謗師打師殺師以諸毒藥持以飲師若沙門婆羅門作諸非法害師謗師此罪惡人無有慙愧剝像破塔劫法寶物殺伯叔父母兄弟姊妹如是罪人命欲終時阿鼻地獄十八獄卒各以鐵叉擎一隔獄如是衆獄如大寶蓋雨微細雨

雨滴如華此人罪報熱惱入心如火燒已見
雨清涼即作念言願我得坐蔭蓋之下涼雨
灑我不亦樂耶作是語已氣絕命終如擲毬
頃即便坐於大劔牀上百億劔刃刀皆出火
燒刺其身空中寶蓋化為火輪從上而下直
劈其頂其身碎裂為數千段上雨銅丸從毛
孔入獄卒羅刹以大鐵叉刺罪人眼或以鐵
箭射其心者悶絕而死須臾還活坐劔牀上
旋嵐猛風吹墮地獄既入獄已時閻羅王與
宮殿俱在虛空中告言獄種汝作衆惡殺師
謗師汝今生處名拔舌阿鼻汝在此獄當經
三劫作是語已即滅不現此獄苦痛如上所
說佛告阿難云何名十八刀輪地獄刀輪地
獄者四面刀山於衆山間積刀如塼虛空中
有八百萬億極大刀輪隨次而下猶如雨滴

量五

八

自有衆生樂苦惱他殺害衆生命終之時患
逆氣病心悶煩滿心堅如石即作是願得一
利刀削此諸患不亦快乎是時獄卒頂戴刀
輪翳令不現至罪人所卑言遜辭我有利刀
能割重病罪人歡喜即自念言唯此為快氣
絕命終生刀輪上如醉象走墮刀山間是時
四山一時俱合四種刀山割切其身不自勝
持悶絕而死獄卒羅刹驅噉罪人令登刀山
未至山頂刀傷足下乃至肝心畏獄卒故匍
匐而上既至山頂獄卒手執一切刀樹撲殺
罪人未死之間鐵狗齧心楚毒百端鐵蟲咬
食肉皆都盡尋復唱活脚踏鐵輪從空而下
一日一夜六十億生六十億死如是衆多凡
十八種此人罪故遂更增劇如四天王壽八
千萬歲罪畢生世墮在畜生五百世中身供

量五

九

衆口復五百世受卑賤形然後乃遇大善知識發菩提心佛告阿難云何名爲劒林地獄劒林地獄者縱廣正等五十由旬滿中劒樹其樹多少數如稻麻竹葦一一劒樹高四十由旬八萬四千劒輪爲葉八萬四千劒輪爲莖八萬四千劒輪爲果八萬四千沸銅爲枝世間自有愚癡衆生樂殺無厭如此罪人臨命終時遇大熱病即作念言我今身體時熱時寒舉身堅強猶如鐵砧即作願言得金剛劒割却此患樂不可言是時獄卒即自化身如已父母親友之形在其人前而告之言我有祕法如卿所念當用相遺罪人聞已心甚愛念急急欲得氣絕命終如馬奔走生劒華中無量劒刃削骨破肉碎如豆許復有鐵鳥從樹上下挑眼啄耳有大羅刹手捉鉞斧破

頭出腦鐵狗來舐死已唱活驅令上樹未至樹端身碎如塵一日之中身經諸樹一夜之中復經諸樹一日一夜殺身如塵不可稱數殺人罪故受如此殃經八萬億歲生畜生中身常負重死復剥皮經五百世還生人中貧窮短命多病消瘦過是已後遇善知識發菩提心佛告阿難云何名爲火車地獄火車地獄者一一銅鑊縱廣正等四十由旬滿中盛火下有十二輪上有九十四火輪自有衆生爲佛弟子及事梵天九十六種出家徒衆及在家者誑惑邪命諂曲作惡如此罪人欲命終時風大先動身冷如冰即作是念何時當得大猛火聚入中坐者永除冷病作是念已獄卒羅刹化作火車如金蓮華獄卒在上如童男像手執白拂鼓儻而至罪人見已心生

愛著如此金華光色顯赫照我令熱必除寒
冷若得坐上快不可言作是語已氣絕命終
載火車上支節火然墮火聚中身體焦散獄
卒唱活應聲還活火車轆身凡十八返身碎
如塵天雨沸銅遍灑身體即便還活如是往
返上至湯際下墮鑊中火車所轆一日一夜
九十億死九十億生此人罪畢生貧窮家爲
人所使繫屬於他不得自在償利養畢爾乃
得脫由前出家善心功德遇善知識爲其說
法心開意解成阿羅漢佛告阿難云何名沸
屎地獄沸屎地獄者八十由旬十八鐵城一
一鐵城有十八隔一一隔中四壁皆有百億
萬劒樹地如刀刃厚三尺於其刃上百千
蔴梨不可稱計一一蔴梨及劒樹間生諸鐵
蟲其數無量一一鐵蟲有百千頭一一頭有

量五

十一

百千紫髯頭皆有百千蚘蟲此諸蚘蟲口吐
熱屎沸如融銅滿鐵郭內上有鐵網鐵鳥世
間自有衆生破八戒齋汙沙彌戒沙彌尼戒
汙式叉摩尼戒汙比丘戒汙比丘尼戒自汙
淨戒優婆塞優婆夷戒諸比丘比丘尼優婆
塞及優婆夷沙彌沙彌尼戒式叉摩尼如是
七衆及餘一切汙僧淨食汙父母食偷竊先
敢不淨手捉及僧知事以自恃故汙僧淨食
四部弟子以不淨身坐僧祇牀犯偷蘭遮久
不懺悔虛食僧食坐僧衆中與僧布薩如是
衆多無量不淨惡業罪人臨命終時舉身皆
香如麝香子不可堪處即作是念當於何處
不聞此香如此香氣猶如狂風來熏我心作
是念已獄卒羅刹自化已身猶如畫瓶中盛
糞穢至罪人所以手摩觸令彼罪人心生愛

著氣絕命終猶如風吹墮沸屎中墮已糜爛
衆蟲啖食東西走時削骨徹髓飢渴逼故飲
熱沸屎蛭蟲蛆蟲啖其舌根一日一夜九十
億生九十億死罪畢乃出生貧賤家繫屬於
他不得自在設生世時恒值惡王屬邪見主
種種惡事逼切其身癰瘡惡瘡以爲衣服宿
世聞法善因緣故遇善知識出家學道成阿
羅漢三明六通具八解脫佛告阿難云何名
十八鑊湯地獄鑊湯地獄者有十八鑊一一
鑊縱廣正等四十由旬七重鐵網滿中沸鐵
五百羅刹鼓大石炭燒其銅鑊此石火燄燄
燄相承經六十日火不可滅閻浮提日滿十
三萬歲如是鑊沸上涌如星化成火輪還入
鑊中自有衆生毀佛禁戒殺生祠祀爲噉肉
血焚燒山野傷害衆生生燬衆生以火焚燒

五

十二

如此罪人欲命終時身心煩悶失大小便不
自禁制或熱如湯或冷如冰即作是念得大
温水入中沐浴不亦樂乎獄卒羅刹化作僮
僕手擎湯瓮至罪人所罪人心喜受樂此瓮
氣絕命終生鑊湯中速疾消爛唯餘骨在鐵
叉捺出鐵狗食之嘔吐在地尋復還活獄卒
驅喊還令入鑊畏鑊熱故攀劒樹上骨肉斷
壞落鑊湯中殺生罪故一日一夜恒河沙死
恒河沙生罪畢乃出生畜生中猪羊鷄狗短
命之處無不經歷如是畜身八千萬歲命終
之後還生人中受二種報一者多病二者短
命短命多病以爲眷屬過算數劫遇善知識
受持五戒行六波羅蜜發菩提心佛告阿難
云何名灰河地獄灰河地獄者長二百由旬
廣十二由旬下有利刀岸上劒樹滿中猛火

厚十二丈復有融灰以覆火上厚四十丈世間自有無慙愧衆生偷盜父母偷盜師長偷盜善友兄弟姊妹如是癡人無有慙愧不識恩養心無返復貪利欲得不識殃禍不順師教此人罪報欲命終時氣滿心腹喘息不續即作是念我心如泥氣滿胃中得一微火暴我身者不亦快乎獄卒羅刹應念即至化作妻子手擎火爐微灰覆上至罪人所是時罪人心大歡喜以歡喜故氣絕命終生灰河中諸劍樹間有一羅刹手執利劍欲來傷害是人恐怖走於灰河舉足下足刀傷其脚劍樹兩刀從毛孔入羅刹以又又其心出躋地悶死尋復還活是人偷盜師長父母罪因緣故一日一夜五百億生五百億死飢渴逼故張口欲食劍林兩刀從舌頭入劈腹裂心悶絕

而死由前聞佛法僧名故罪畢之後得生人中貧窮下賤覺世非常出家學道世無佛時成辟支佛世若有佛成阿羅漢佛告阿難云何爲劍林地獄劍林地獄者八千由旬滿中劍樹有熱鐵丸以爲其果如此劍樹高二十四由旬自有衆生不孝父母不敬師長作惡口業無慈愛心刀杖加人此人罪報臨命終時心如胡膠處處生著即作此念我心縛著觸事不捨耽酒嗜色身雖遇患心猶不息得一利刀割截此愛獄卒羅刹應聲即至化爲侍者執明鏡示語罪人言汝心多著可觀此鏡觀此鏡時見於鏡中有利劍像即作是念我今體羸不堪欲事得此利劍割斷我心不亦快乎作是念時氣絕命終受餓鬼身諸劍樹間忽然化生生已鐵丸從頂上入從口而

出腸胃焦爛躡地獄卒復以鐵叉打撲驅令上樹上一樹已鐵觜蟲噉以恐怖故涌身上樹如是展轉悉經劒林一日一夜八萬生八萬死罪畢之後生饑饉世及疾疫劫爲人卑賤口氣恒臭人所惡見過算數劫遇善知識

量五

十四

發菩提心佛告阿難云何名五百億刺林地獄刺林地獄者八千由旬滿中鐵刺一一刺端有十二鉤樹上復有大熱鐵鉗世間自有愚癡衆生惡口兩舌綺語不義語調戲無節誑說是非說經典過毀論義師如此罪報命欲終時咽燥舌乾即作此念得一利刺刺頸出血令衆脉間流注衆水不亦快乎作是念時獄卒羅刹化作父母手執明珠珠頭生刺持用擬口如水欲滴罪人歡喜我所願者今已得果作是念已氣絕命終如天電頃生刺

林間既生之後獄卒羅刹手執鐵鉗拔舌令出八十鐵牛有大鐵犁耕破其舌刺林諸樹有風吹來撲打其軀一日一夜六百生六百死過是已後得生人中脣哆面皺語言蹇吃如此罪人體生諸瘡膿血盈流經五百世人所惡見過是已後雖有所說人不信受遇善知識發菩提心佛告阿難云何名五百億銅柱地獄銅柱地獄者有一銅柱狀如火山高六百由旬下有猛火火上鐵牀上有刀輪諸刀輪間有鐵觜蟲鐵鳥在傍世間自有愚癡衆生貪惑滋多深愛不淨犯邪淫行非處非時行不淨業設有比丘及比丘尼婆羅門等諸梵行者若於非時非處犯不淨法乃至一切犯邪行者作不淨業如此罪人臨命終時舉身反強振掉不定猶如弓身不自勝持即

量五

十五

作此念得一堅大銅鐵柱者縛此身體令不動搖獄卒羅刹應時即至化作僮僕手執鐵杖至罪人所白言長者汝今身強餘物皆弱可捉此杖心即歡喜氣絕命終如弄杖頃生銅柱頭猛火燄熾焚燒其身驚怖下視見鐵牀上有端正女若是女人見端正男心生愛著從銅柱上欲投于地銅柱貫身鐵網絡頸鐵嘴諸蟲啖食其軀落鐵牀上男女俱時六根火起有鐵嘴蟲從眼而入從男女根出若汙戒者別有萬億諸小蟲輩如瘰癧蟲有十二嘴嘴頭出火啖食其體此邪姪報一日一夜九百億生九百億死罪畢乃出生鳩鵲中受鳩鵲身經五百世復生龍中經五百身後生人中無根二根及不定根黃門之身經五百世設得爲人妻不貞良子不慈孝奴婢不

順過是已後遇善知識發菩提心佛告阿難云何名五百億鐵機地獄鐵機地獄者有一鐵牀縱廣正等四百由旬上安諸絃絃間皆有萬億鐵弩鐵弩鏃頭百億鋒刃世間自有愚癡衆生爲貪欲故不孝父母不敬師長不順善教殺害衆生飢諸好人此人罪報命欲終時身體振動身諸六竅汁自流出如此罪人見自己牀如兜羅綿即生是念何時得一堅冷之處安身卧眠不亦快耶作是念時獄卒羅刹以叉擎牀敷大毳毼至罪人所罪人見已心生歡喜欲卧毼毼氣絕命終生鐵機上萬億鐵絃關從下動鐵絃低昂無量鐵弩同時皆張一一鐵箭射罪人心一日一夜六百億生六百億死如是罪人受罪畢已生畜生中經五百世還生人間貧窮下賤爲人所

使多墮刑獄恒受鞭撻過是已後遇善知識
發菩提心佛告阿難云何名鐵網地獄鐵網
地獄者八十九重諸鐵羅網一一網間百億
鐵針一一鐵針施五關總世間自有虛妄衆
生邪心諂曲妖媚惑人心懷讒賊晝夜惡念
刹那刹那頃成就惡念此人罪報臨命終時
身體瘙癢即作此念得一棘針刺刺疥蟲不
亦樂乎作是念時獄卒羅刹化為良醫手執
利針唱言治病罪人心喜氣絕命終生鐵網
間捽身下過衆總皆動無量諸針射入毛孔
如是宛轉諸鐵網間刹那頃死刹那頃生罪
畢乃出生於邊地無佛法處亦不聞說世間
善語何況正法雖生人中三惡道攝過算數
劫遇善知識雖得聞法心不解了佛告阿難
云何名鐵窟地獄鐵窟地獄者餓鬼道中最

卷五

十七

上苦法有一鐵山縱廣正等二十五由旬山
上復有五百萬億大熱鐵丸一一鐵丸圓
正等十三由旬山間復有百千刀劍是時彼
山東向開張有一小孔如摩伽陀升口但出
黑烟世間自有愚癡衆生慳貪縛著心如金
剛但樂求索無有厭足父母妻子悉不給與
師長教授視如糞穢奴婢親友不施衣食如
是慳人不慮無常護惜財物猶如眼目此人
罪報命欲終時諸情閉塞口噤不語心中默
念我死之後是諸惡人食我財物如噉鐵丸
居我屋宅如處閤室作是念已獄卒羅刹化
為慳人幻收財物至罪人所以火焚之罪人
心喜氣絕命終生火山上猶如融銅鑄鐵窟
中既入窟中劍蟲刀蟲啖食其軀煙熏其眼
不見火焰周障惶怖東西馳走頭戴鐵山鐵

九上下從頂而入從足而出一念頃死一念
頃生罪畢乃出生餓鬼中其身長大數十由
旬咽如針筍腹如大山東西求食融銅灌咽
經八千歲乃得苦畢生食唾鬼食膿鬼食血
鬼中罪畢復生廁神豬狗罪畢復生貧窮卑
賤無衣食處遇善知識發菩提心佛告阿難
云何名鐵九地獄鐵九地獄者八十由旬滿
中鐵城八十八隔一一隔中有五刀山持用
覆上下有十八大惡鐵蛇蛇皆吐舌舌出鐵
劍劍頭火然世間自有愚癡衆生毀辱布施
言施無報勸人藏積如是癡人向國王大臣
沙門婆羅門及一切衆生說施無因亦無果
報如是罪人臨命終時頸強脉縮迴轉不語
不喜見人低視而卧心中但念我積財寶得
與我俱快不可言獄卒羅刹化作其妻捉熱

量五

十八

鐵九化作寶器在其人前語言我隨汝死宛
轉相著終不相離氣絕命終生鐵城中東西
馳走鐵蛇出毒纏繞其身節頭火然即作是
念願天愛我降注甘雨應念即雨大熱鐵丸
從頂而入足下而出罪畢乃出爲貧窮孤獨
瘖瘂之人是人歲數如鐵窟說遇善知識發
菩提心佛告阿難云何名爲尖石地獄尖石
地獄者有二十五石山一一石山有八冰池
一一冰池有五毒龍世間自有愚癡衆生比
丘比丘尼沙彌沙彌尼式叉摩尼優婆塞優
婆夷九十六種諸梵志等法說非法非法說
法或犯輕戒久不懺悔心無慚愧猶如猿猴
此人罪報命欲終時心下氣滿腹脹如鼓飲
食嘔吐水漿不下即作是念得一尖石塞我
咽喉不亦快乎作是念時獄卒羅刹化作良

醫幻捉尖石作大藥丸著其口中告言閉口
心生歡喜氣絕命終生石山間無量尖石從
背上入從胃前出獄卒復以鐵叉叉口以石
內中一日一夜六十億死六十億生此是生
報從此命終墮黑繩地獄黑繩地獄者八百

量五

十九

鐵鎖八百鐵山豎大鐵幢兩頭繫鎖獄卒羅
刹驅噉罪人令負鐵山鐵繩上走不勝落地
墮鑊湯中羅刹驅起渴急飲鐵吞石而走一
日一夜經歷是苦九十萬徧罪畢生世爲人
僮僕遇善知識爲說實法如好白氎易染受
色得阿羅漢三明六通具八解脫佛告阿難
云何名十八飲銅地獄飲銅地獄者千二百
種雜色銅車一銅車上六千銅丸自有衆生
慳貪嫉妬邪見惡說不施父母妻子眷屬及
與一切心生慳嫉見他得利如箭入心如是

罪人欲命終時多病消瘦昏言寢語口中自
說欲得果食作是語時獄卒羅刹化爲銅車
滿車載果至罪人所罪人得已心生歡喜即
作是念得此美果食不知厭甚適我願歡喜
踊躍氣絕命終未經幾時生銅車上不久即
往生銅山間銅車轆頸獄卒羅刹以鉗磔口
飲以洋銅飲洋銅已迷悶蹠地唱言飢飢尋
時獄卒擘口令開以銅鐵丸置其口中吞十
八九節節大然東西馳走經於一日爾乃命
終獄卒唱言汝前身時諛諂邪見慳貪嫉妬
以是因緣受鐵丸報或曾出家毀犯輕戒久
不悔過虛食信施以此因緣食諸鐵丸此人
罪報億千萬歲不識水穀受罪畢已還生人
中五百世中言語嚙吃不自辯了以宿習故
食後噉炭及噉土塊過是已後遇善知識發

觀佛三昧海經卷第六

量六

東晉天竺三藏法師佛陀跋陀羅譯

觀四無量品第五

爾時世尊說是語時佛神力故十種白光從佛心出其光遍照十方世界一一光中無量

量六

化佛乘寶蓮華時會大眾見佛光明如玻瓈水或見如乳見諸化佛從佛胃出入於佛齋遊佛心間乘大寶船經往五道受罪人所一罪人見諸化佛如已父母善友所親漸漸爲說出世間法是時空中有大音聲告諸大眾汝等今者應觀佛心諸佛心者是大慈也大慈所緣緣苦衆生佛告阿難云何名慈心慈心者應當繫念緣苦衆生苦衆生者謂三惡道極苦惱者佛說是語時會大眾見於地獄餓鬼畜生解脫相三昧力故令諸衆生自

識宿命見受苦者皆是前世無量劫中父母師徒諸善親友見已啼泣爲佛作禮白言世尊我等今者因佛力故見苦衆生悉是我等父母師長佛告大眾三界衆生輪迴六趣如旋火輪或爲父母兄弟宗親三界一切無不是汝所親之者云何起意生殺嫉心作是語已淨飯王等一切大眾白佛言世尊云何名爲慈心三昧惟願世尊爲我略說佛告大眾夫慈心者應當起想先緣所親繫念之時念已父母受諸苦惱有不孝者念已妻子所愛衆生受諸苦惱有見衆生癩病癰瘡見已作念當云何救一想成已應作二想二想成已應作三想三想成已滿一室想一室想成已滿於僧坊一僧坊成已滿一由旬一由旬成已滿一閻浮提閻浮提成已滿弗婆提弗婆

提成已滿三天下如是漸廣滿十方界見東方衆生盡是其父見西方衆生悉是其母見南方衆生悉是其兄見北方衆生悉是其弟見下方衆生悉是妻子見上方衆生悉是師長其餘四維悉是沙門婆羅門等見是衆生皆受苦惱或遇重病或見在於刀山劍樹火車爐炭一切苦事見已悲泣欲拔其苦自作我想乘寶蓮華詣諸人所調身按摩爲洗癩瘡見地獄火憂悲雨淚欲滅其火見諸餓鬼刺身出血化作乳想供給餓鬼令得飽滿既飽滿已爲其說法讚佛讚法讚比丘僧作是讚已益更憂悲心無暫捨如是慈心極令通利事事廣說如慈三昧如是慈心名習慈者既習慈已次當行悲悲者見受衆苦如箭入心如破眼目心極悲苦遍體兩血欲拔彼苦

如此悲者有百億門廣說如大悲三昧行慈悲已次行大喜見諸衆生安隱受樂心生歡喜如已無異既生喜已次行捨法是諸衆生無來去相從心想生心想生者因緣和合假名爲心如此心想猶如狂華從顛倒起苦從想起樂從想生心如芭蕉中無堅實廣說如經十譬作是觀時不見身心見一切法同如實性是名菩薩身受心法依因此法廣修三十七助菩提分若取證者是聲聞法不取證者是菩薩法作是語已佛心光明益更明顯

量六

三

及心光明亦如向說如是光明照十方已從佛頂入從佛眉間白毫相出從白毫出遍照十方猶如金幢令十方地作真金色卷諸化佛入佛口中從佛口出亦照十方來入佛胃從佛胃出復照十方來入佛齋此光入時佛身之內如瑠璃水澄清不動三界五道一切衆生映現佛心見諸化佛乘大寶臺猶如寶船遊佛心間一一化佛讚說不殺讚歎念佛讚歎念法讚歎念僧讚歎念戒讚歎念施讚歎念天讚六和敬讚慈三昧如此六念能生善法此六念者是諸佛因佛心者是六念心因六和敬而得此法欲成佛道當學佛心說是語已如來身光倍更明顯佛身化佛及寶蓮華數不可知一一華光如雜華說如是觀者名爲正觀若異觀者名爲邪觀佛滅度後

佛諸弟子修六念者名念佛心念佛心者除十二億劫生死之罪作是觀者生生之處終不邪見心不僻謬恒得值遇無生菩薩如是人若生邊地無佛法處念佛功力自然悟解成辟支佛爾時世尊說是語已還攝身光如本無異佛告父王如大人相白毫光明及一切相有能逆觀順觀分別觀者令觀圓光及丈六者但發是心如見不見除却衆罪如向所說設有施主具五神通得如意珠飛遍十方十方世界一一世界衆生之數不可得量六知但以無量無邊總爲其數如是衆生皆是羅漢是大施主盡算數劫供養賢聖四事無乏是人得福寧爲多不父王白言但使供養一方羅漢得福無量何況十方無量羅漢佛告父王正使有人成熟邪見衆生數如上說

皆令彼人得羅漢道三明六通具八解脫不如發心趣向佛慧念佛須臾佛說是語時釋子衆中一億釋子發阿耨多羅三藐三菩提心自誓不求聲聞辟支佛道白佛言世尊諸佛身分乃至一毛無量化佛諸聲聞身如焦敗種爲何所益

觀四威儀品第六

爾時世尊於大衆中即便起行足步虛空父王觀見心甚歡喜亦隨佛行佛舉足時足下千輻輪相一一輪相皆兩八萬四千衆寶蓮華一一蓮華復化八萬四千億那由他華一一蓮華化爲一臺一一華臺一一華葉遍覆十方無量世界一一蓮華八萬四千葉釋迦牟尼足步虛空悉雨寶華如是衆華復有無量微塵數佛足步虛空父王見已心大歡喜

量六

五

得阿那含五體投地爲佛作禮時會大衆皆觀此事白佛言世尊十方世界無數化佛何者眞佛誰是化佛佛告大衆諸佛如來入空寂處解脫三昧隨意自在無有眞化所以者何佛心空寂復入空寂解脫光明王三昧此定力故諸佛如來化無邊身無邊身者是薩婆若薩婆若者名無著三昧無著三昧故如來現行若現乞食若或經行如是二法饒益衆生若有衆生佛在世時見佛行者步步之中見千輻輪相除却千劫極重惡罪佛去世後三昧正受想佛行者亦除千劫極重惡業雖不想行見佛跡者見像行者步步亦除千劫極重惡業佛告阿難汝從今日持如來語遍告弟子佛滅度後造好形像令身相足亦作無量化佛色像及通身光及畫佛跡以微

妙絲及玻璃珠安白毫處令諸衆生得見是相但見此相心生歡喜此人除却百億那由他恒河沙劫生死之罪說此語已如來還坐父王復問佛出世間有何利事能令衆生得安樂耶爾時世尊告大王言舍衛城中須達長者有一老母名毗伽羅謹勤家業長者勅使手執庫鑰出內取與一切委之須達長者請佛及僧供給所須時病比丘多所求索老母慳貪瞋嫌佛法及與衆僧而作是言我家長者愚癡迷惑受沙門術是諸乞士多求無厭何道之有作是語已復發惡願何時當得不聞佛名不聞法名不見剃髮染衣之人如是惡聲一人聞已復聞二人展轉遍滿舍衛城中末利夫人聞此語已而作是言云何須達如好蓮華人所樂見云何復有毒蛇護之

量六

六

作是語已勅須達言遣汝婦來吾欲與語阿那邠坻馳詣王宮到作禮畢却住一面末利夫人命令就坐坐已語言汝家老婢惡口誹謗何不驅擯阿那邠坻跪白夫人佛日出世多所潤益驚掘摩羅大惡之人尼捷賤人氣噓梅陀羅佛能調伏何況老婢而不能調末利夫人聞是語已心大歡喜我欲請佛汝遣婢來明日食時請佛及僧於宮供養長者遣婢持滿瓶金摩尼珠蓋勸助王家供養衆僧告言可往汝持此物貢上王家婢聞是語歡喜踊躍持寶瓶走末利夫人見彼婢來此邪見人佛當教化我見此人受化之時必獲法利爾時世尊從正門入難陀在左阿難在右羅睺羅在佛後老母見佛心驚毛豎可惡此人隨我後至即時欲退從狗竇出狗竇即閉

四方小巷一時閉塞唯正路開老母覆面以扇自障不喜見佛佛在其前令扇如鏡無所障礙迴頭東視東方有佛南視南方有佛西視西方有佛北視北方有佛舉頭仰看上方有佛低頭伏地地化爲佛以手覆面時手十指皆化爲佛老母閉目心眼即開見虛空中一切化佛滿十方界此相現時舍衛城中有二十五旃陀羅女五十婆羅門女及諸雜類并末利夫人宮中合五百女心生誹謗不信佛法見佛如來足步虛空爲於老母現無數身心大歡喜裂邪見網頭腦頂禮世尊足下爾時世尊以梵音聲安慰諸女告言法女汝今可稱釋迦牟尼稱我名故觀我身相可得解脫作是語已諸女同聲稱南無佛佛放眉間白毫相光照諸女心女見佛行威儀庠序

足下雨華猶如華蓋化佛如林不可稱計諸女見已發阿耨多羅三藐三菩提心老母見佛邪見不信猶能除却八十萬億劫生死之罪況復善意恭敬禮拜爾時老母以得見佛巷陌還開疾走歸家白大家言我於今日遇大惡對沙門瞿曇在王宮門多衆之前作諸妖幻身如金山衆華映飾目踰青蓮有萬億光不可具見沙門善幻世間無比大家年少可不喜見作是語已入木籠中以百張皮覆木籠上白氎纏頭却卧闇處爾時世尊還祇陀林末利夫人白言世尊願化邪女莫還精舍佛告末利此女罪重於佛無緣於羅睺羅有大因緣佛今日行爲其除罪作是語已即還精舍告羅睺羅汝詣須達大長者家度惡老母作是語時千二百五十沙門皆作是言

我等今日願欲隨從爾時羅雲承佛威神入如意定禮拜既畢達佛七帀即自化身作轉輪聖王阿難侍左難陀侍右千二百五十比丘化爲千子阿難爲典藏臣難陀爲主兵臣七寶四兵皆悉具足時金輪寶在虛空中不

量六

蓮華臺徑往須達大長者家夜叉唱言聖王出世擯諸惡人宣揚善法老母聞已心大歡喜聖王出世有如意珠無所求索此當可言爾時聖王槌鍾鳴鼓乘大寶輦至須達家老母見已甚大歡喜聖王出世多所潤益識別善惡必當不爲沙門所惑從木籠出敬禮聖王聖王即遣主寶藏臣往至女所告言姊妹汝宿有福應王者相聖王今者欲以姊妹爲玉女寶老母白言我身卑賤猶如糞穢聖王顧問喜慶無量何所堪任應王女寶若見念

者勅我大家放我令脫所賜已多爾時聖王告須達言卿家老女衆相巍巍吾今欲以充玉女寶須達白言惟命是從願上大王老婢聞放喜悅非恒聖王即便以如意珠照耀女面令女自見如玉女寶倍大歡喜而作是言諸沙門等高談大語自言有道無一効驗聖王出世弘利處多令我老婢如玉女寶作是語已五體投地禮於聖王時典藏臣宣王教令揚十善法女聞十善心大歡喜即作是言聖王所說義無不善爲王作禮悔過自責心既調伏時羅睺羅還復本身老母舉頭見千二百五十比丘即作此言佛法清淨不捨衆生如我弊惡猶尚化度作是語已求受五戒時羅睺羅爲說三歸受五戒法母聞此法未舉頭頃成須陀洹地神歡喜從地涌出告須

量六

九

達言善哉長者裂邪見網如來出世正爲此耳時羅睺羅將此老母詣祇陀林到已見佛身相紫金色歡喜合掌爲佛作禮懺悔前罪求佛出家佛告羅雲汝將此母詣憍曇彌未至中間羅雲爲說苦空非常無我等法老母聞已頭髮自落成比丘尼三明六通具八解脫身昇虛空作十八變波斯匿王末利夫人見此變化心大歡喜善哉佛日出現世間破無明闇能令邪見得應真道作是語已爲佛作禮白言世尊如此老母宿有何罪生卑賤處爲人婢使復何福慶值遇世尊如好白氎易受染色應時即得阿羅漢道佛告大王諦聽諦聽善思念之如來爲王分別解說過去久遠無數劫時有佛世尊名一寶蓋燈王如來十號具足彼佛滅後於像法中有王名曰

雜寶華光其王有子名曰快見求欲出家父即聽許王子詣山到僧坊中求欲出家時有比丘聰明多智深解實相受爲弟子復有比丘名德華光善說法要誘進初學王子比丘雖復出家猶懷憍慢和尚爲說甚深妙法般若波羅蜜大空之義王子聞已謬解邪說比丘滅後即作此言我大和尚空無智慧但能讚歎虛無空事願我後生不樂見也我阿闍梨智慧辯才願於生生爲善知識王子比丘作是語已法說非法非法說法教諸徒衆皆行邪見雖持禁戒威儀不缺以謬解故命終之後如射箭頃墮阿鼻獄八十億劫恒受苦惱罪畢乃出爲貧賤人五百身中聾癡無目千二百身恒爲人婢佛說是時末利夫人有五百婢懺悔自責發菩提心願於來世解深

空法佛告大王爾時和尚者今我身是阿闍梨者今羅睺羅是王子比丘此老母是徒眾弟子今日邪見女等發菩提心者是佛說此時舍衛城中二萬優婆塞發菩提心得念佛定常於定中見佛說法佛告父王邪見惡人見佛行時尚得如此無量福德何況觀佛行及像行者父王白佛佛摩耶生忉利天佛今光相神通具足云何當往爲母說法佛告大王如來當如轉輪聖王足行之法從閻浮提上忉利天問訊檀越爲說妙法爾時會中有菩薩摩訶薩名曰持地即從座起入首楞嚴三昧三昧力故從金剛際金剛爲輪金剛爲根金剛爲華華華相次出閻浮提時四龍王難陀跋難陀阿耨達多娑伽羅龍王等各持七寶詣持地所奉上七寶爲佛世尊作三

量六

十一

道寶階左白銀右玻璃中黃金從閻浮提金剛地際上忉利宮一一寶階七重欄楯是諸欄楯百億寶成百億光明一一光明百億寶華一一華中無量樂器自然涌出爾時持地以恒河沙七寶蓮華鋪佛蹈處於階道側豎諸寶幢無量寶幡懸其幢頭百億寶蓋彌覆其上忉利諸天雨曼陀羅華摩訶曼陀羅華曼殊沙華摩訶曼殊沙華嚴飾其間時梵天王手擎香爐與萬梵俱侍立階側一一香煙如瑠璃雲彌滿虛空於其雲中百千妓樂不鼓自鳴難陀龍等持海此岸栴檀末香漫散道中香光上出如金光焰高一多羅樹化爲金臺無量諸天持天瓔珞嚴飾階道如是供具不可稱計爾時世尊於閻浮提執持三衣告勅阿難難陀羅睺羅等五百比丘足步大

地始舉足時地六種動下足之時地生寶宮如梵王宮宮宮相次懸在空中隨映佛後在階道側持地菩薩并彌勒等一千菩薩一時合掌以萬億音歌詠如來無量德行爾時梵王無數百千諸梵天等手擎香爐無量妓樂以供養佛立侍左階釋提桓因無數天子百千天女鼓樂絃歌亦立左階無數聲聞菩薩大衆侍立右階爾時世尊放大光明照階道邊其光如雲百千億色猶如重閣佛處其中八萬四千化佛圍遶五百分身諸佛與佛正等執持衣鉢威儀庠序分身諸佛亦有阿難難陀以爲侍者時魔波旬於虛空中與諸魔衆讚誦妙偈歎如來德釋提桓因白摩耶言如來世雄爲報恩故來至此處摩耶夫人聞佛已來遣諸天女持諸天寶及天妓樂曼陀

量六

十二

羅華在階道邊以迎世尊爾時如來舉足下足無數宮殿一一宮殿五百化佛結加趺坐一一如來五百菩薩以爲侍者爾時五百分身諸佛釋迦文入忉利天宮諸天歡喜而說此偈

毗婆尸佛吉祥中尊亦放光明來至此處尸棄如來大吉尊化身無數來至此處毗舍浮佛放白毫光普照一切來至此處拘樓孫佛面門出光照十方界來至此處拘那含佛化身無數放大光明來至此處迦葉世尊身如寶臺足步虛空來至此處釋迦牟尼分身五百無數化佛照曜一切來至此處彌勒菩薩賢劫尊者亦放光明當至此處此處吉祥安隱無爲諸佛所遊牟尼生地名涅槃窟慧者智度

爾時世尊入忉利宮即放眉間白毫相光其
光化作七寶大蓋覆摩耶上七寶飾牀奉摩
耶坐佛母摩耶見佛入宮合掌恭敬爲佛作
禮五百化佛一時伸手諸天扶持不聽禮敬
八萬四千諸化如來皆悉起立爾時摩耶夫

量六

十三

人宮中自然涌出五百億光此光明中有大
寶臺一一臺上有十方佛如是諸佛自說名
字安慰佛母東方善德佛持妙寶華散釋迦
牟尼及摩耶上化成華蓋此華蓋中百億化
佛合掌起立問訊佛母南方栴檀德佛持寶
蓮華散釋迦牟尼及散佛母上化成華蓋於
華蓋中無數化佛合掌起立問訊佛母西方
無量明佛以寶蓮華散釋迦牟尼及佛母上
化成華蓋無數化佛合掌起立問訊佛母北
方相德佛以寶蓮華散釋迦牟尼及佛母上

化成華蓋無數化佛合掌起立問訊佛母東
南方無憂德佛西南方寶施佛西北方華德
佛東北方三乘行佛上方廣衆德佛下方明
德佛如是等佛各以寶華散釋迦牟尼佛上
及散佛母化成華蓋一一蓋中無數化佛合
掌起立問訊佛母時忉利宮滿中化佛佛母
摩耶頂上自然出衆供具無量幢幡供養諸
佛時幢幡中有妙音聲讚佛讚法讚比丘僧
佛告阿難是名如來從閻浮提昇忉利宮色
相光明諸神化事佛滅度後佛諸弟子若如
是觀是名正觀若異觀者名爲邪觀作此觀
者除一億劫生死之罪臨命終時見十方佛
必生他方淨佛國土佛告阿難汝持是語爲
未來世諸衆生等當廣宣說聞此語者思是
義者當知是人十方諸佛之所覆護命終必

當生諸佛前佛告父王云何名如來從忉利
天下閻浮提時光相變應我初下時無數天
子百千天女侍從世尊獨見一佛圓光一尋
放千光明足步虛空躡階而下時佛光中化
佛像現從佛光出導佛前行時優填王戀慕
世尊鑄金為像聞佛當下象載金像來迎世
尊蓮華色比丘尼化作瑠璃山結加趺坐在
山窟中無量供具奉迎世尊爾時金像從象
上下猶如生佛足步虛空足下雨華亦放光
明來迎世尊時鑄金像合掌叉手為佛作禮
爾時世尊亦復長跪合掌向像時虛空中百
千化佛亦皆合掌長跪向像爾時世尊而語
像言汝於來世大作佛事我滅度後我諸弟
子以付囑汝空中化佛異口同音咸作是言
若有衆生於佛滅後造立形像旛華衆香持

用供養是人來世必得念佛清淨三昧若有
衆生知佛下時種種相貌繫念思惟必自得
見佛佛告阿難佛滅度後佛諸弟子知佛如
來下忉利天及見佛像除却千劫極重惡業
如是觀者名為正觀若異觀者名為邪觀

觀佛三昧海經卷第六

音釋

鑰下切關出內出尺類切出之也也
邪補民切躡曉輒切也
邪補民切躡曉輒切也
邪補民切躡曉輒切也

觀佛三昧海經卷第七

量七

東晉天竺三藏法師佛陀跋陀羅譯

觀四威儀品第六之餘

佛告阿難云何如來至曠野澤伏鬼大將我從舍衛祇陀精舍放金色光照舍衛城令作

量七

金色舍衛國內有一長者名曰財德長者有

子年始三歲父教其子令受三歸散脂鬼神飢火所逼入舍衛城接取嬰兒爾時嬰兒稱南無佛以稱佛故鬼王口噤不能得食但眼出火以怖嬰兒嬰兒見鬼形狀醜惡曾有三

面齋有二面兩膝二面面如象面狗牙上出眼復出火火皆下流童子驚怖稱南無佛南無法南無僧爾時世尊天耳遠聞獨將阿難足步虛空阿難在後從佛不及佛以神力化作寶華其華光明接取阿難阿難坐華上見

閻浮提滿中化佛一一化佛身滿三千大千世界是諸化佛說三乘法勸進菩薩修行念佛阿難見聞即憶過去九十憶佛所說經藏憶持不失爾時世尊到曠野澤放眉間白毫大人相光其光直照怖小兒身小兒見光如見父母心無驚懼時曠野鬼舉一大石厚十二丈欲擲世尊眼出雷電雨雹如雨一一雹下如赤雞子從空而下未至佛上化成化佛一一化佛入火光三昧諸火光明燒曠野澤大地洞然鬼王不怖擲石住空化成寶臺臺中復有百億化佛異口同音讚歎慈心鬼猶不伏時金剛神手奮金杵揮大利劍髭如劍竦眼如電光以金剛杵擬鬼王額攘臂大叫聲振天地鬼王驚怖抱持小兒長跪上佛白言沙門惟願慈愛救我生命時金剛神化金

剛杵爲大鐵山四面火起繞鬼七帀猛火焰
熾焚燒鬼身嬰兒舉手勅鬼王言稱南無佛
我稱佛故從死得生汝今可稱南無諸佛爾
時鬼王驚怖失聲稱南無佛白言瞿曇可救
護我爾時世尊以梵音聲猶如慈父安慰諸
子撫慰鬼王亦復如是密迹金剛勅鬼王言
汝今速伏歸依佛法及與衆僧汝若不伏碎
汝眷屬萬億八千令如微塵時曠野鬼以驚
怖故五體投地爲佛作禮白佛言世尊我恒
欺人今者不殺當食何物佛勅鬼王汝但不
殺我勅弟子常施汝食乃至法滅以我力故
令汝飽滿鬼王聞已歡喜合掌受佛五戒受
佛五戒已見諸火山焰焰相次變成化佛滿
曠野澤皆是化佛一一佛後有一阿難一一
化佛異口同音皆說五戒時曠野鬼白金剛

神因大德故得服甘露無上法味時金剛神
擲杵空中佛神力故令金剛杵猶如百億金
須彌山一一須彌百億龕室一一龕室百億
化佛遊步經行是諸化佛舉足下足足下自
然生七寶臺一一臺上恒沙化佛結跏趺坐
佛告大王佛滅度後佛諸弟子欲知如來伏
曠野鬼自在神通如是觀者名爲正觀若異
觀者名爲邪觀佛滅度後若有衆生思是法
者觀是法者得此想者除百千億劫生死之
罪生生之處不受鬼身值遇諸佛間無空缺
設無佛時遇辟支佛無辟支佛恒遇仙人爲
說正道佛告阿難汝今持是境界念想爲未
來世一切衆生當廣宣說是名諸佛神通境
界若失此事則名謗佛斷菩提種持是法者
鬼魅不著恒爲諸佛之所護助佛告阿難云

何名如來到那乾訶羅國古仙山瞻蔔華林
毒龍池側青蓮華泉北羅刹穴中阿那斯山
巖南爾時彼穴有五羅刹化作龍女與毒龍
通龍復降雹羅刹亂行饑饉疾疫已歷四年
時王驚懼禱祠神祇於事無益召諸呪師令
呪毒龍羅刹氣盛呪術不行王作是念得一
神人驅此羅刹降是毒龍唯除我身其餘無
惜時有梵志聰明多智自言大王迦毗羅城
淨飯王子其生之日萬神侍御七寶降瑞阿
私陀相處國當爲轉輪聖王若不樂天下成
自然佛今者道成號釋迦文巨身丈六三十
二相八十種好足躡蓮華項佩日光身相端
嚴如真金山王聞是語心大歡喜向佛生地
自歸作禮若梵志語審實不虛有佛出世名
釋迦文然我相法却後九劫乃當有佛名釋

迦文云何今日佛日已興云何不哀至此國
界空中有聲告言大王汝莫疑佛釋迦牟尼
精進勇猛超越九劫聞是語已復更長跪合
掌讚歎佛通明慧應知我心願屈慈悲光臨
此國爾時香煙至佛精舍如白瑠璃雲繞佛
七帀化作金蓋其蓋有鈴出妙音聲其聲請
佛請比丘僧爾時如來勅諸比丘諸得六通
者隨從佛後受那乾訶羅王弗巴浮提請摩
訶迦葉徒衆五百化作瑠璃山山上皆有流
泉浴池七寶行樹樹下皆有金牀銀光光化
爲窟摩訶迦葉坐此窟中常坐不卧勑諸弟
子行十二頭陀其山如雲疾於猛風詣古仙
山大目捷連徒衆五百化百千龍蟠身爲座
龍口吐火化成金臺七寶牀座寶帳寶蓋及
諸幢幡皆悉備足目連處中如瑠璃人表裏

清徹詣那乾訶舍利弗以神通力化作雪山
白玉爲窟均提等五百沙彌坐七寶窟圍遶
雪山時舍利弗坐白玉窟如黃金人放金色
光其光雜色映耀雪山敷揚大法沙彌聽受
往詣彼國摩訶迦旃延與其眷屬五百比丘
化作蓮華猶如金臺比丘處上身下水化
爲流泉流諸華間水不滴地上有金蓋彌覆
比丘亦往彼國如是千二百五十大弟子各
有五百比丘作諸神通如舍利弗目犍連等
踊身虛空如鴈王翔往詣彼國爾時世尊著
衣持鉢勅語阿難持尼師壇爾時世尊足步
虛空佛舉足時四天王釋提桓因梵天王無
數天子百千天女遶佛七帀爲佛作禮侍從
佛後爾時世尊放頂金光化作一萬八千諸
大化佛一一化佛復放光明如此頂光亦復

量七

五

化作一萬八千諸大化佛佛佛相次滿虛空
中如鴈王翔往至彼國始到國界王出奉迎
爲佛作禮爾時龍王見世尊來父子徒黨十
六大龍興大雲雷震吼雨電眼中出火口亦
吐火鱗甲身毛俱出煙焰五羅刹女現醜惡
形眼如掣電住立佛前時龍王子見虛空中
滿中化佛白其父言父王吐火欲害一佛試
看空中有無數佛時龍吐毒心意猛盛呵責
其子唯有一佛何處有多時金剛神手把大
杵化身無數杵頭火然如旋火輪輪輪相次
從空中下火焰熱熾猶如融銅燒惡龍身龍
王驚怖無走遁處走入佛影佛影清涼如甘
露灑龍得除熱仰頭視空滿空中佛一一如
來放無數光一一光中無量化佛一一化佛
亦放無數百千光明時諸光中一時皆是執

金剛神奮金剛杵龍見諸佛極大歡喜見諸
金剛極大惶怖合掌恭敬爲佛作禮五羅刹
女亦禮如來時諸天子兩曼陀羅華摩訶曼
陀羅華曼殊沙華摩訶曼殊沙華而以供養
天鼓自鳴諸天叉手空中立侍時彼國王眷
屬五千燒衆名香頭面禮佛請佛就座時彼
龍王從龍池出獻七寶牀手擎敷置白佛世
尊惟願救我莫使力士傷害我身爾時如來
以梵音聲猶如慈母撫恤嬰兒令彼龍王及
羅刹女受法王化請佛就座爾時國王復敷
高牀毼毼毼極細軟者張白毼縵真珠羅
網彌覆其上請佛世尊令處縵中爾時世尊
舉足欲行佛鹿王踴躍出五光光有五色繞
佛七帀如天妙華化成華帳衆華葉間百千
無數諸化菩薩合掌讚偈有萬億音空中化

量七

六

佛放踰光明亦復如是十六小龍手執山石
霹靂起火來至佛所大衆驚怖入佛光中爾
時世尊出金色臂張合縵掌指網縵間兩大
寶華大衆皆見化成化佛唯諸龍見是金翅
鳥欲搏噬之龍畏金翅走入佛影爲佛作禮
叩頭求救佛至縵前勅阿難言敷尼師壇是
時阿難即入縵中先舉右手從左肩上取尼
師壇時尼師壇即復化成五百億金臺七寶
校飾欲敷之時即復化成五百億金蓮華七
寶莊嚴正四角時一角生五百億七寶蓮華
行行相次遍滿縵內爾時世尊就七寶牀結
跏趺坐諸蓮華上皆有佛坐時諸比丘見佛
坐已爲佛作禮右遶七帀各敷坐具比丘坐
具皆悉化成瑠璃之座比丘就坐時瑠璃座
放瑠璃光作瑠璃窟諸比丘等入火光三昧

身作金色時彼國王見佛神變歡喜合掌遶
佛七帀爲佛作禮觀佛神化應時即發阿耨
多羅三藐三菩提心勅諸臣下皆使發心爾
時龍王怖畏金剛大力士故亦發阿耨多羅
三藐三菩提心五羅刹女亦發菩提心爾時
大王爲佛及僧欲設中膳佛告大王但辦食
器餘無所須王受佛勅具諸寶器佛神力故
令諸器內天須陀味自然盈滿時諸大衆食
是食已自然得入念佛三昧見十方佛身量
無邊復聞說法微妙音聲其音純讚念佛念
法念比丘僧亦有廣說六波羅蜜三十七品
助菩提法聞是語已倍更歡喜遶佛千帀爾
時國王請佛入城龍王怒曰汝奪我利吾滅
汝國佛告大王檀越先歸佛自知時爾時國
王爲佛作禮遂巡而退爾時龍王及羅刹女

五體投地求佛受戒佛即如法爲說三歸五
戒之法龍王聞已心大歡喜龍王眷屬百千
諸龍從池而出爲佛作禮如來應時隨龍音
類爲其說法聞法歡喜佛勅目連爲其受戒
爾時目連入如意定即自化身作百千億金
翅鳥王一一鳥王足躡五龍住在虛空時諸
小龍而作是言佛勅和尚爲我受戒和尚云
何作恐怖像目連告曰汝於多劫不恐怖中
橫生怖想於無瞋恚生瞋恚想於無害所橫
生害想我實是人汝惡心故見我是鳥爾時
龍王以恐怖故自誓不殺不惱衆生以發善
心目連即時還復本身爲說五戒爾時龍王
長跪合掌勸請世尊惟願如來常住此間佛
若不在我發惡心無由得成阿耨多羅三藐
三菩提惟願如來留神垂念常在於此慇懃

三請如是不止時梵天王復來禮佛合掌勸請願婆伽婆爲未來世諸衆生故莫獨偏爲此一小龍百千梵王異口同音皆作是請爾時如來即便微笑口出無量百千光明一一光中無量化佛一一化佛萬億菩薩以爲侍

量七

從時彼龍王於其池中出七寶臺奉上如來惟願天尊受我此臺爾時世尊告龍王曰不須此臺汝今但以羅刹石窟持以施我時梵天王無數天子先入窟中時彼龍王以諸雜寶以莊校窟佛告阿難汝教龍王淨掃石窟諸天聞已各脫寶衣競以拂窟爾時如來還攝身光卷諸化佛來入佛頂爾時如來勅諸比丘皆在窟外唯佛獨入自敷坐具敷坐具時令此石山暫爲七寶時羅刹女及以龍王爲四大弟子尊者阿難造五石窟爾時世尊

坐龍王窟不移坐處亦受王請入那乾訶城耆闍崛山舍衛國迦毗羅城及諸住處皆見有佛時虛空中蓮華座上無量化佛一切世界滿中化佛龍王歡喜發大誓願願我來世得佛如此佛受王請經七日已王遣一人乘八千里象持諸供具徧一切國供養衆僧到處皆見釋迦文佛信返白王如來世尊不但此國餘國亦有餘國諸佛皆說苦空無常無我六波羅蜜王聞此語廓然意解得無生忍爾時世尊還攝神足從石窟出與諸比丘遊

量七

九

履先世爲菩薩時兩兒布施處投身餓虎處以頭布施處剗身千燈處挑目布施處割肉代鴿處如是諸處龍皆隨從是時龍王聞佛還國啼哭雨淚白佛言世尊請佛常住云何捨我不見佛當作惡事墜墮惡道爾時世

尊安慰龍王我受汝請坐汝窟中經千五百
歲時諸小龍合掌叉手勸請世尊還入窟中
諸龍見佛坐已窟中身上出水身下出火作
十八變小龍見已復更增進堅固道心釋迦
文佛踊身入石猶如明鏡見人面像諸龍皆
見佛在石內映現於外爾時諸龍合掌歡喜
不出其池常見佛日爾時世尊結跏趺坐在
石壁中衆生見時遠望則見近則不現諸天
百千供養佛影影亦說法時梵天王各合掌
恭敬以偈頌曰

如來處石窟 踊身入石裏 如日無障礙
金光相具足 我今頭面禮 牟尼救世尊
爾時世尊化作五百寶車佛處車中分身五
百爾時寶車住虛空中迴旋自在車轂輞間
百千光明一一光明無數化佛不動不轉到

迦毗羅城坐師子座如入三昧一毛孔中有
一佛出一毛孔中一佛還入如是出入滿虛
空中無量化佛結跏趺坐是名如來坐時境
界佛滅度後佛諸弟子若欲知佛行者如向
所說若欲知佛坐者當觀佛影觀佛影者先
觀佛像作文六想結跏趺坐敷草爲座請佛
令坐見坐了了復當作想作一石窟高一丈
八尺深二十四步青白石想此想成已見坐
佛像住虛空中足下雨華復見行想入石窟
中入已復令石窟作七寶山想此想成已復
見佛像踊入石窟石壁無礙猶如明鏡此想
成已如前還想三十二相相觀之極令明
了此想成已見諸化佛坐大寶華結跏趺坐
放身光明普照一切一一坐佛身毛孔中雨
阿僧祇諸七寶幢一一幢頭百千寶幡幡極

小者縱廣正等如須彌山此寶幡中復有無數百千化佛一一化佛踊身皆入此石窟中佛影齋裏此想現時如佛心說如是觀者名爲正觀若異觀者名爲邪觀佛滅度後如我所說觀佛影者是名真觀如來坐觀如來坐者如見佛身等無有異除百千劫生死之罪若不能見當入塔觀一切坐像見坐像已懺悔障罪此人觀像因緣功德彌勒出世見彌勒佛初始坐於龍華樹下結跏趺坐見已歡喜三種菩提隨願覺了云何名觀如來行詣拘尸那時降諸力士佛告父王如來不久當於彼國入般涅槃爾時五百力士除妨路石盡力士力不能令去爾時世尊化作沙門以手挑石石飛住空力士驚怖此石設墮走避無所仰看空石皆成化佛猶如金山諸佛圍

量

十一

遶力士見已心大歡喜時化沙門倚卧樹下如人晝眠有日光明從左脇出如百億日入右脇中一日中有二寶樹有大寶牀諸佛卧上如是光明徧照十方無量世界一一世界無量諸佛倚卧樹下皆有光明從右脇入左脇而出如是光明變成寶臺行者悉見十方世界有一寶臺此寶臺上有一大佛身量巨小與十方等卧倚臺側爾時彼佛左脇流水如瑠璃珠一一寶珠如須彌山一一山內百千卧佛一一卧佛出大光明亦如上說右脇復出萬億乳河流注于下滴滴化成百千化華華有化佛卧蓮華上各以右手灑甘露雨令一切衆皆得服食餓鬼衆生見此相時自然飽滿爾時空中有妙音聲讚四無量心然後分別空無境界無心心想寂滅境界作

是觀者名觀如來卧觀如來卧者當先觀卧像見卧像已當作是念佛在世時所以現卧諸佛如來體無疲倦但爲降伏剛強力士及諸邪見不善衆生或復慈愍諸比丘故現右脇卧如來卧者是大悲卧欲觀佛卧當行慈心行慈心者緣一切衆生見受苦時不惜身分成熟安樂受苦衆生令得無患大悲心者見諸衆生受苦惱時如已父母師長善友生悲哀心淚如猛雨如是等心名爲大悲見他受樂心生歡喜譬如比丘得第三禪是名爲喜捨者一切衆生無衆生相作是觀時先觀自身地大是衆生耶水大是衆生耶色是衆生耶受想行識是衆生耶空是衆生耶非空是衆生耶如是衆生耶非如是衆生耶實際是衆生耶非實際是衆生耶有爲空是

量七

十二

衆生耶無爲空是衆生耶如是分別解析時不見衆生不得衆生無衆生想心無所著亦無志求解如是等清淨法者名爲行捨佛告阿難若有衆生樂觀佛卧者是則真觀清淨慈定若有衆生聞佛卧法及諸比丘隨順佛語不壞威儀右脇卧者當知是人著慙愧衣服忍辱藥如此比丘現世坐禪見十方佛爲說大法若不坐禪不毀戒故於未來世見十方佛十方諸佛爲說大法聞法易悟猶如壯士屈伸臂頃應時即得阿羅漢道三明六通具八解脫如來卧者饒益衆生以饒益故名慈悲喜捨此四法者出生諸佛諸菩薩母說是語已佛於衆中舉身放光前八萬四千左八萬四千右八萬四千後八萬四千頂八萬四千是諸毛孔一一孔一毛旋生一一毛端

有百萬億塵數蓮華一蓮華上無量無數微塵化佛諸化佛身高顯莊嚴如千萬億諸須彌山一一佛齋中有五百萬億師子一一師子吐五百萬億諸供養具一一供具有五百萬億七寶華雲一一寶華雲有五百萬億諸

童子

十三

偈頌聲雲聲聲相次猶如雨滴爾時如來復更明顯八十種好金色光明從白毫出一一光明徧照十方化成諸佛是諸世尊行者無數住者無數坐者無數卧者無數是諸化佛說大慈悲說三十七品助菩提法說六波羅蜜說佛如來十力無畏十八不共法此相現時一億諸釋心無所著悟無生忍佛爲授記於未來世過算數劫當得作佛號三昧勝幢如來應供正徧知十號具足次第作佛凡有一億彼佛出時娑婆世界清淨莊嚴猶如聖

王伏幢世界光明佛刹等無有異是諸菩薩得佛道時國土無有毀禁亂意不善之名純是菩薩雖有聲聞不謗大乘時諸釋子聞佛授記心大歡喜各脫瓔珞以散佛上是諸瓔珞當佛上住化成華樹一一華樹有恒沙華一一華上有恒沙寶樓一一樓中有恒沙化佛一一化佛演說八萬四千諸波羅蜜復有化佛教諸聲聞數息安般流光白骨白骨流光心淨想心不淨想起結使想滅結使想斷使支想殺使根想如是諸想九百億塵數如數息安般說是名聲聞法菩薩法者唯有四法何等爲四一者晝夜六時說罪懺悔二者常修念佛不誑衆生三者修六和敬心不恚慢四者修行六念如救頭然佛告父王如是等名未來世觀佛三昧亦名分別佛身亦名

知佛色相亦名念佛三昧亦名諸佛光明覆
護衆生說是語時天龍夜叉八部鬼神十三
億衆發阿耨多羅三藐三菩提心自發誓願
願於來世常入三昧見佛色身如今無異時
梵天王釋提桓因無數天子爲佛作禮長跪
合掌白佛言世尊我等今者得見如來色中
量七
上色願當來世濁惡衆生繫念思惟見佛色
身此願不虛我今所說及我所見真實不虛
願令我等及諸天衆猶如佛身作是語時自
見心中百萬光出一一光明化成無量百千
化佛自見已身身真金色猶如難陀等無有
異時諸梵天白佛言如來世雄出現於世必
當利益一切衆生昔弘誓願今已得滿不捨
衆生此語不虛故我自見心相境界未來衆
生必當如是想佛真身佛告梵天如汝所說

真實不虛未來衆生但發是念得無量福身
相具足何況憶想佛說是語時淨飯王及諸
釋子比丘尼優婆夷同時俱起禮佛而退爾
時父王還至宮中爲諸姝女說佛相好千二
百五十姝女聞佛白毫相心生歡喜除百萬
億那由他生死之罪空中有聲告諸女言汝
聞佛相除諸罪咎應發無上三菩提心聞是
語已即見空中無量諸佛見諸佛已亦皆同
時得念佛定時諸比丘即從坐起敬禮佛足
遶佛七匝却住一面爾時阿難偏袒右肩合
量七
掌長跪白佛言世尊佛說三十二相餘有一
相如來云何不顯說耶爾時世尊勅諸比丘
各令還坐爾時世尊自化左右作五百億寶
山一一寶山有四佛坐四佛世尊讚歎念佛
佛即微笑口五色光舌十四光如此光明化

成一佛其佛齋中流出五水其色各異一一色中有九億菩薩一一菩薩頂上皆有梵摩尼光光中皆有恒沙化佛一一化佛齋中出水亦復如是如是衆水流入佛齋是諸化佛并化菩薩皆入佛齋是時佛身表裏俱淨過於淨妙勝瑠璃珠於佛身內有師子座一一師子座如須彌山一一座上有一如來九十億菩薩以爲侍者是諸菩薩頂上諸佛如須彌山如是十方無量諸佛齋中出水皆與水俱來入釋迦文佛齋時諸佛不大釋迦不小釋迦不大諸佛不小釋迦文佛身內心中有無量佛一一佛不相障礙舉身毛孔說念佛法時諸化佛各伸右手摩阿難頂汝今善持觀佛三昧莫使忘失一心憶念爲未來衆生開光明目作是語時過去七佛像住立空中

各伸右手摩阿難頂囑累是事時虛空中有無數光一一光中有無數化佛異口同音囑累斯法

觀佛三昧海經卷第七

音釋

噤巨禁切 竦荀勇切 攘如陽切 毳毼毼權
閉也 動也 持也 俱切
毼雙離切 搏伯各切 噬時制切 剗烏歡
能毛 毼也 擊也 也 切 刻

量七

觀佛三昧海經卷第八

量八

東晉天竺三藏法師佛陀跋陀羅譯

觀馬王藏品第七

佛告阿難未來衆生云何當觀如來陰馬藏相陰馬藏相者我在家時耶輸陀羅及五百

量八

侍女咸作是念太子生世多諸奇特唯有一事於我有疑姝女衆中有一女子名修曼那即白妃言太子者神人也毗陀經說若有神人質性清淨以梵行故身根平滿太子今者以梵行人納妃多載其諸姝女奉事歷年不見身根況有世事復有一女名曰淨意白言大家我事太子經十八年未見太子有便利患況復諸欲爾時諸女各異說皆謂太子是不能男太子晝寢皆聞諸女欲見太子陰馬藏相是時太子誓願力故應諸女人安徐

轉身內衣被發見金色身光明晃曜雙膝暫開咸覩聖體平如滿月有金色光猶如日輪諸女歡喜如此神人實可敬愛但於我等世情望絕作是語已悲泣兩淚爾時太子於其根處出白蓮華其色紅白上一下二三華相連諸女見已復相謂言如此神人有蓮華相此人云何心有染著作是語已噎不能言是時華中忽有身根如童子形諸女見已更相謂言太子今者現奇特事忽有身根如是漸漸如丈夫形諸女見此滿已情願不勝喜悅現此相時羅睺羅母見彼身根華華相次如天劫貝一一華上乃有無數大身菩薩手執白華圍遶身根現已還沒如前日輪此名菩薩陰馬藏相如來今者成菩提道是大丈夫是男子身復當爲汝顯現男相佛告阿難汝

未出家時摩偷羅王有一乳母名頭牟婆乳養彼王經十五載王既長大合掌長跪從王求願白言大王我雖卑賤乳養大王勤劬歷年伏惟大王乞賜一願王白乳母欲求何等乳母即言在王宮中如功德天一切無乏唯

量八

闕一事所謂女人情願所幸王白乳母當以

二

乳母配一大臣義同伉儷乳母不願白言大王貴人多事非我所樂願勅國內一切男子十五以上三十已還皆悉從我若能來者我施彼人一大金錢形醜陋者當施銀錢時彼國王報乳母恩造一高樓宣令國內勅諸男子如上所願皆悉來集經歷年歲乳母衰老多招諸女遂有五百一一女人復買諸婢種種莊飾數滿八千時彼國王遘疾崩亡太子紹位智臣白言先王報恩恣此老婢令王國

土如姪女村損辱國望實自不少用此何爲宜時擯徙白已出外焚燒高樓驅逐諸女諸女惶怖詣舍衛國既到舍衛於四衢道造立姪舍作妖如前舍衛大國多諸人衆臻諸女家經一宿者輸金錢二百國有長者名如閭達積財百億長者有子名曰華德兄弟三人遊蕩無度競奔姪舍始初一往各各皆輸金錢十五日日夜恒輸金錢過倍常人經一月中一藏金盡其父長者案行諸藏見一藏空問守藏者此藏中金爲何所在典藏白言

量八

三

大家諸子日日持錢往姪女舍若不制止用金當盡長者聞已椎胸大哭嗚呼賊子破我家居手執大杖打兒母頭其婦號哭嗚呼賊子生兒無益偷金藏盡父無訓範素不嚴勅見打胡爲長者瞋恚號哭詣王腹拍王前白

言大王國將荒亂摩偷羅國諸羅刹女來住此城破我家業王語長者汝甚大富金藏猶盡況餘凡下寧不困耶長者白王惟願大王速誅惡人王告長者吾受佛戒猶不傷蟻況欲殺人長者聞此舉手拍頭白言大王臣聞王者誅罰惡人爲國除患當有何罪今日大王與惡爲伴縱諸姪女壞亂正法國荒民窮戒將安存王告長者如來出世多所調伏驚掘摩羅氣噓旃陀羅大力鬼王羅刹魁膾一切皆化今當詣佛啓白此事卿可小忍安慰臣已駕乘名象與諸侍從往詣祇洹爲佛作禮遶佛三匝合掌長跪白言世尊摩偷羅國諸姪女等今來此間惑諸年少願佛化之佛告大王却後七日佛自知之時波斯匿王禮佛而退佛告摩訶迦葉汝往詣須達大長者

家可白檀越却後七日佛詣議場化諸姪女須達聞已歡喜踊躍辦諸供具作七寶華高十一丈置佛坐處懸繒幡蓋香汁灑地其日已至王擊金鼓令諸國內諸論議師皆詣議場須達長者請諸比丘比丘尼優婆塞優婆夷一切皆集當設供養明日時到王與諸人詣論議場長者如閻達遣旃陀羅喚諸姪女須達長者亦白時到是時如來勅千二百五十比丘汝諸比丘各隨定意現大神通上座憍陳如與四比丘化作一窟大如雪山百千蓮華一一華上有五比丘結跏趺坐身出金光令身金色端嚴可愛猶如彌勒復有化人作十八變一一變中有十八比丘作十八變神通可觀中有入三昧者中有經行者光明迴旋猶如金山生諸寶華比丘在窟身心不

散飛到議場坐於上位鬱毗迦葉踊身空中
化作六龍蟠身相結爲比丘座在其座上作
十八變飛至議場伽耶那提兄弟二人踊身
虛空化作大石窟入火光定作十八變飛至
議場大德摩訶迦葉著千納衣手擎鉢盂執
持威儀足步虛空步步之中化一寶樹一一
樹下有化迦葉經行林中作十八變亦至議
場大智舍利弗踊身空中作十八變身上出
千日光明赫奕不相障礙身下出千月如秋
滿月團圓可愛作十八變飛至議場大目犍
連踊身空中化作八萬四千師子座一一師
子閉目伏地白如雪山大目犍連坐其背上
作十八變飛至議場尊者優波離踊身空中
於虛空中鋪尼師壇結跏趺坐入慈三昧身
諸毛孔流出金光作十八變飛至議場大迦

量八

五

旃延踊身空中化作十五摩醯首羅一一天
子乘一牛王頭上生華大迦旃延處此華座
作十八變飛至議場所須菩提踊身空中冥
然不現但聞語聲說如此偈
一切法如性 無我無衆生 亦無姪欲想
當復教化誰 諸法本無性 亦無名字想
愛著故起欲 當復教化誰
說是語已作十八變飛至議場時阿那律踊
身空中化萬梵王作諸梵宮比丘處中作十
八變飛至議場羅睺羅難陀時二比丘踊身
空中化作寶樓比丘處中入深禪定作十八
變飛至議場如是千二百五十比丘各現異
變亦作十八種神通飛至議場爾時世尊獨
將阿難持尼師壇手執澡罐世尊在前阿難
在後從佛鉢盂中有六蓮華一一蓮華放金

色光照舍衛國令作金色澡罐水中有大金
幢其金幢頭有五百光一一光明化千化佛
三十二相皆悉具足足步虛空飛至議場波
斯匿王及諸大衆散華燒香爲佛作禮百千
天樂不鼓自鳴歌詠如來無量功德波斯匿
王長跪合掌勸請如來令化姪女佛坐華座
爲諸大衆略說苦空無常諸波羅蜜諸女不
受時女衆中有一姪女名曰可愛告諸女言
沙門瞿曇本性無欲人言不男故於衆中演
說苦空毀欲不淨若有身分皆具足者於大
衆中應去慙愧如尼捷子出身示我審有此
相我等歸伏爲其弟子若無此相虛說不淨
此無根人性自無欲云何不說欲爲不淨說
是語已如來爾時化作一象如轉輪聖王象
寶時象脚間出一白華猶如象支漸漸拄地

量八

六

諸女見已歡喜大笑各相謂言沙門善幻乃
化作此佛復化作一馬王像出馬王藏如瑠
璃甯下垂至膝諸女見已咸言是幻末利夫
人見此化相白諸比丘尼及優婆夷我等諸
女宜各退還姪女所說不可聽聞世尊大慈
今欲化之必作異變我等宜避禮佛而退佛
勅阿難汝告波斯匿王及諸比丘各自遊戲
波斯匿王白諸大德如來大慈欲化姪女我
等今者宜各速去作是語已却行而退唯此
千二百五十比丘侍立佛後佛告憍陳如將
汝徒衆經行林中五百比丘大智舍利弗爲
衆上首猶故合掌侍佛左右佛告舍利弗汝
亦隨意與諸論師論講所宜五百比丘隨舍
利弗後至華林中爲波斯匿王更說四諦唯
阿難在佛告阿難汝留坐具汝亦宜去作是

語已是時世尊獨往女所是時諸女見佛獨
在高聲大笑白言沙門汝今爲有身分不耶
佛言我具男身是大丈夫諸女聞已掩口而
笑爾時世尊鋪尼師壇金剛地神化作金牀
七寶爲脚在坐具下佛坐其獨製僧伽梨被
僧祇枝示曾_五字令女見之諸女見字如百
千男子年皆盛壯顏貌奇特甚適女意佛復
被泥洹僧見佛身體泯然平滿有金色光猶
如千日諸女見已皆言瞿曇是無根人佛聞
此語如馬王法漸漸出現初出之時猶如八
歲童子身根漸漸長大如少年形諸女見已
皆悉歡喜時陰馬藏漸漸長大如蓮華幢一
一層間有百億蓮華一一蓮華有百億寶色
一一色中有百億化佛一一化佛百億菩薩
無量大衆以爲侍者時諸化佛異口同音毀

諸女人惡欲過患而說偈言
若有諸男子 年皆十五六 盛壯多力勢
數滿恒河沙 持以供給女 不滿須臾意
時諸女人聞此語已心懷慙愧懊惱躡地舉
手拍頭而作是言嗚呼惡欲乃令諸佛說如
此事我等懷惡心著穢欲不知爲患乃令諸
佛聞如此弊猶如盛火焚燒我等說是語時
見虛空中一切化佛廣爲諸女說不淨觀所
謂九想十想三十想數息安般諸女聞說不
淨觀法樂禪定樂不樂欲樂爾時世尊還攝
身光端坐金牀大衆雲集還到佛所波斯匿
王白言世尊如來出世多所利益乃於此處
現大光明況餘身分無量功德一切諸天在
虛空中亦讚如來百千梵行如來梵行乃得
如此勝陰馬藏沒無處所顯出金華化佛無

數是持戒報功德巍巍時諸女人聞此語已
四千女等發阿耨多羅三藐三菩提心二千
女人遠塵離垢得法眼淨二千女人於未來
世過十二劫次第當得辟支佛道長者如閻
達見佛現化惡魔女人讚言善哉善哉如來

量八

昔者破波旬軍今化諸女與本無異此相現
時無量諸天發菩提心波斯匿王所將士眾
有五百人求佛出家鬚髮自落身所著衣變
成袈裟應時即得阿羅漢道是時大眾見馬
王藏心歡喜者除五十億劫生死之罪禮佛
而退佛告阿難我昔夏安居時波羅柰國有
一姪女樓樓上有女名曰妙音昔日於佛有
重因緣我與難陀及將汝往此姪女舍日日
乞食此女於我不曾恭敬於難陀所偏生愛
著已經七日女心念言沙門瞿曇若能遣弟

難陀阿難從我願言我當種種供養沙門佛
告阿難難陀汝從今日莫往彼村世尊自獨
執鉢而行至女樓所一日至三日放金色光
化諸天人此女不悟後日世尊復將阿難難
陀在樓下行姪女愛敬二比丘故遙以眾華
散佛及二比丘阿難告言汝可禮佛女愛阿
難應時作禮爾時世尊化三童子年皆十五
面貌端正勝諸世間一切人類此女見已身
心歡喜爲化年少五體投地敬禮年少白言
丈夫我今此舍如功德天福力自在眾寶莊
嚴我今以身及與奴婢奉上丈夫可備灑掃
若能顧納隨我所願一切供給無所愛惜作
是語已化人坐牀未及食頃女前親近白言
丈夫願遂我意化人不違隨已所欲既附近
已一日一夜心不疲厭至二日時愛心漸息

量八

九

至三日時白言丈夫可起飲食化人即起纏綿不已女生獸悔白言丈夫異人乃爾化人告言我先世法凡與女通經十二日爾乃休息女聞此語如人食噎既不得吐又不得咽身體苦痛如被杵擣至四日時如被車轢至五日時如鐵丸入體至六日時支節悉痛如箭入心女作念言我聞人說迦毗羅城淨飯王子身紫金色三十二相愍諸盲冥救濟苦人恒在此城常行福慶放金色光濟一切人今日何故不來救我作是念已懊惱自責我從今日乃至壽終終不貪色寧與虎狼師子惡獸同處一穴不貪色欲受此苦惱作是語已復起飲食行坐共俱無奈之何化人亦瞋咄弊惡女廢我事業我今共汝合體一處不如早死父母宗親若來覓我於何自藏我寧

經死不堪受恥女言弊物我不用爾欲死隨意是時化人取刀刺頸血流漫地塗汙女身透迤在地女不能勝亦不得免死經二日青瘀臭黑三日腿脹四日爛潰大小便利及諸惡蟲迸血諸膿塗漫女身女極惡獸而不得離至五日時皮肉漸爛至六日時肉落都盡至七日時唯有臭骨如膠如漆粘著女身女發誓言若諸天神及與仙人淨飯王子能免我苦我持此舍一切珍寶以用給施作是念時佛將阿難難陀帝釋在前擎寶香爐燒無價香梵王在後擎大寶蓋無量諸天鼓天妓樂佛放常光照曜天地一切大眾皆見如來詣此女樓時女見佛心懷慙愧藏骨無處取諸白氎無量眾香纏裹臭骨臭勢如故不可覆藏女見世尊為佛作禮以慙愧故身映骨

上臭骨忽然在女背上女極慙愧流淚而言
如來功德慈悲無量若能令我離此苦者願
爲弟子心終不退佛神力故臭骨不現女大
歡喜爲佛作禮白佛言世尊我今所珍一切
施佛佛爲呪願梵音流暢女聞呪願心大歡
喜應時即得須陀洹道五百侍女聞佛音聲
皆發無上菩提道心無量梵衆見佛神變得
無生忍帝釋所將諸天子等有發菩提心者
有得阿那含者佛告阿難我昔初成道時伽
耶城邊住熙連河側有五尼捷第一尼捷名
薩闍多五百徒衆餘四各有二百五十弟子
時諸尼捷自稱得道來至我所以其身根繞
身七帀來至我所鋪草爲座即作此語瞿曇
我無欲故梵行相成我之身根乃能如此如
自在天我今神道過踰沙門百千萬倍沙門

量八

十二

作一我當作二即於地中化作一樹以其身
根絞繞著樹滿七帀已令樹雲霧如龍王氣
高聲大喚舉手唱言瞿曇我梵行相事驗如
此汝稱男子言大丈夫以何爲證爾時世尊
化作寶架寶架兩頭有十四珠一一明珠有
千光明一一光明化成化佛作十八變住立
空中世尊現化倒住空中脚在架上時佛二
足出千蓮華一一蓮華萬億光明一一光明
有百億寶臺一一臺中無數化佛一一化佛
各攝一脚猶如卷鎖令脚不現一切化佛及
釋迦文悉懸一脚倒住空中唯諸尼捷見佛
倒住無量天龍八部鬼神見佛世尊安坐講
堂敷演大法所謂無相無我等法時空有聲
告諸尼捷佛已作一汝可作二時諸尼捷即
自騰擲手搏樹枝抱樹而立盡尼捷術不能

倒立樹神現身手搏其耳罵言狂人汝如小蟲敢與獸王師子共戰汝向大喚佛若作一我當作二佛今已住大神通力汝何不爲樹神罵已地神堅牢即從地出住立空中以大鐵鎖鎖尼捷脚倒懸空中有五夜又以杖撻之尼捷痛急自掣墜地未至地頃有一尼捷稱南無佛世尊以手接取尼捷令身不痛時諸尼捷既至地已妬心不歇語地神言汝無慈心偏爲瞿曇汝宿罪故受夜叉身在此地下今日復更無慈普愛但爲瞿曇困苦我等時恒河神飛住空中手執大石告言尼捷如汝癡人服食牛糞石灰塗頭令髮墮落裸形無恥猶如驢馬亦如貧龍不能潤益如來佛日普照一切汝今云何持黑闇身與日爭光爾時水神唱是語已勸請世尊伏諸尼捷爾

量八

十二

時世尊告諸尼捷汝等不知如來身分若欲見者隨意觀之如來積劫修行梵行在家之時無邪欲想心不染累故得斯報猶如寶馬隱顯無常今當爲汝少現身分爾時世尊從空而下即於地上化作四水如四大海四海之中有須彌山佛在山下正身仰臥放金色光其光是曜映諸天目徐出馬藏遶山七匝如金蓮華華華相次上至梵世從佛身出一億那由他雜寶蓮華猶如華幢覆蔽馬藏此蓮華幢有十億層層有百千無量化佛一一化佛百億菩薩無數比丘以爲侍者化佛放光照十方界尼捷見已大驚心伏佛梵行相乃至如此不可思議形不醜惡猶如蓮華我今頂禮佛功德海佛智無邊不可窮盡受我懺悔攝取我等作此語已五百尼捷合掌叉

手長跪在地求佛出家佛言善來比丘佛勅迦葉爲辦衣服迦葉爾時至仙人所告大仙人今日世尊伏諸尼捷惟願仙士施少衣裳時諸仙人取好樹皮多羅樹葉裁縫爲衣時仙人師名曰光目合掌叉手告諸弟子佛德無量弘誓周普乃攝受此著邪見人我宜辦衣給裸形者亦敬佛寶可脫諸苦說是語已從迦葉後至世尊所五百仙人見蓮華臺從佛身出如衆蓮華圍遶須彌上至梵世時諸仙人見此事已歡喜合掌敬禮世尊諦觀世尊目不暫捨見佛眉間白毫相光右旋宛轉及見佛身一切衆相作是思惟此相好者必從前世無縛無著無我無作無心無識無人無物無施無受清淨檀波羅蜜生亦隨一切平等無相大智空慧般若波羅蜜生思是義

已應時即得無生法忍五百尼捷著僧伽梨爲佛作禮未舉頭頃應時即得阿羅漢道三明六通具八解脫一一尼捷誓願當度五百尼捷現此相時無量諸天龍夜叉衆見佛梵行清淨果報身心歡喜發阿耨多羅三藐三菩提心佛告阿難佛滅度後天衆龍衆夜叉衆沙門衆婆羅門衆問佛世尊過去世時清淨無欲修諸梵行得何果報汝當答言佛有馬王藏相與身平等七合盈滿如金剛器中外俱淨爲度衆生出現是相化佛光明妙蓮華雲其數無量如此身者從無數世無染安隱善持戒慧尸波羅蜜生佛勅阿難佛滅度後佛諸弟子欲觀如來陰馬藏相當作是觀如是觀者是名正觀若異觀者名爲邪觀佛滅度後佛諸弟子若有繫心正念思惟佛梵

行相化佛光明者常於夢中見十方佛此人
生生恒修梵行除却二十萬劫生死之罪說
是相時夜又衆中八千夜又身心歡喜讚歎
如來無量德行應時即發阿耨多羅三藐三
菩提心

量八

十四

觀佛三昧海經卷第八

音釋

遘 居候切 逶迤 逶迤謂面掩地若蛇行也 瘥 瘥疾也
潰 潰於御切 散壞也 粘 尼占切 相著也

觀佛三昧海經卷第九

量九

東晉天竺三藏法師佛陀跋陀羅譯

本行品第八

佛告阿難如來有三十二大人相八十種隨形好金色光明一一光明無量化佛身諸毛孔一切變現及佛色身略中略者我今爲此時會大衆及淨飯王略說相好佛生人間亦同人事因人相故說三十二相勝諸天故說八十好爲諸菩薩說八萬四千諸妙相好佛寶相好我初成道摩伽陀國寂滅道場爲普賢賢首等諸大菩薩於雜華經已廣分別此尊法中所以略說爲諸凡夫及四部弟子謗方等經作五逆罪犯四重禁偷僧祇物婬比丘尼破八戒齋作諸惡事種種邪見如是等人若能至心一日一夜繫念在前觀佛如來

一相好者諸惡罪障皆悉盡滅是故如來名婆伽婆名阿羅訶名三藐三佛陀名功德日名智滿月名清涼池名除罪珠名光明藏名智慧山名戒品河名迷衢導名邪見燈名破煩惱賊名一切衆生父母名大歸依處若有歸依佛世尊者若稱名者除百千劫煩惱重障何況正心修念佛定佛告阿難如來往昔無量無邊阿僧祇劫以智慧火燒煩惱薪修無相定不非時證是故獲得如是勝相一一相中無量化佛何況多相若能繫心觀一毛孔是人名爲行念佛定以念佛故十方諸佛常立其前爲說正法此人即爲能生三世諸如來種何況具足念佛色身如來亦有無量法身十力無畏三昧解脫諸神通事如此妙處非汝凡夫所學境界但當深心起隨喜想

起是想已當復繫念佛功德念佛功德者所謂戒定智慧解脫解脫知見金色三十二相八十隨形好十力四無所畏十八不共法大悲三念處是若有衆生一聞佛身如上功德相好光明億億千劫不墮惡道不生邪見

量九

雜穢之處常得正見勤修不息但聞佛名獲如是福何況繫念觀佛三昧爾時世尊說此語時於虛空中有七寶臺一一臺上有百億寶蓋天雨寶華供養釋迦牟尼佛時文殊師利法王子結跏趺坐坐寶臺中與十億菩薩住虛空中讚言善哉善哉釋迦牟尼大悲世尊說佛身相示佛威儀現佛光明顯諸化佛爲未來世凡愚衆生不見佛者作見佛因善哉阿難慈悲法子汝名歡喜依名定實善持佛語慎勿忘失未來衆生聞汝說者即是見

佛思此義者具足見佛微妙色身爾時文殊說此語已與諸菩薩眷屬大衆從空而下敬禮佛足遶佛七匝却住一面佛告文殊佛子汝今在座作此觀時地生蓮華縱廣正等滿一由旬文殊師利及諸菩薩坐蓮華上爾時文殊師利法王子既已坐竟白佛言世尊我今自欲說於往昔本生因緣惟願世尊加我威神佛告文殊速說勿疑文殊師利告諸大衆對尊者阿難阿難當知我念過去無量數劫復倍是數不可思算阿僧祇劫彼世有佛名寶威德如來應供正遍知明行足善逝世間解無上士調御丈夫天人師佛世尊彼佛出時衆生弊惡與今無異彼佛世尊亦長丈六身紫金色說三乘法如釋迦文爾時彼國有大長者名一切施長者有子名曰戒護在

量九

三

母胎時母信敬故豫爲其子受三歸依子既生已年至八歲父母請佛於家供養童子見佛安行徐步足下生華有大光明見已歡喜爲佛作禮禮已諦觀目不暫捨一見佛已即能除却百萬億那由他劫生死之罪從是已後恒得值遇百億那由他恒河沙佛於諸佛所植衆德本是諸世尊皆說如是觀佛三昧亦讚白毫大人相光勸多衆生懺悔繫念過是已後復得值佛名摩尼光多陀阿伽度阿羅訶三藐三佛陀摩尼光佛出現世時常放光明以作佛事度脫人民如是二萬佛皆同一號名摩尼光時諸世尊皆以化佛微妙光明誘接衆生次復有佛名栴檀摩尼光十號具足如是百億佛皆號摩尼光是諸世尊誓願力故正以眉間白毫相光覆護衆生除滅

衆罪復有佛出名栴檀海如來應正遍知如是百萬佛皆同一字名栴檀海是諸世尊以智德字卐字印光化度衆生時彼童子親侍諸佛間無空缺禮拜供養合掌觀佛觀佛功德因緣力故復得值遇百萬阿僧祇佛彼諸世尊亦以色身化度衆生從是已後即得百千億念佛三昧得百萬阿僧祇旋陀羅尼既得此已諸佛現前說無相法須臾之間得首楞嚴三昧時彼童子受三歸依一禮佛故諦觀佛相心無疲厭由此因緣值無數佛何況繫念具足思惟觀佛色身時彼童子豈異人乎今我身是爾時世尊讚文殊師利言善哉善哉文殊師利乃於昔時一禮佛故得值爾許無數諸佛何況未來我諸弟子勤觀佛者佛勅阿難汝持文殊師利語徧告大衆及未

來世衆生若能禮拜者若能念佛者若能觀
佛者當知此人與文殊師利等無有異捨身
他世文殊師利等諸大菩薩爲其和尚說是
語時菩薩衆中有一佛子名曰財首即從座
起遶佛七匝恭敬禮拜亦禮文殊師利足以
天曼陀羅華摩訶曼陀羅華曼殊沙華摩訶
曼殊沙華而散佛上及散文殊師利上亦散
尊者阿難是諸天華當於佛上化爲華臺於
華臺內有十方佛結跏趺坐東方善德佛告
大衆言汝等當知我念過去無量世時有佛
世尊名寶威德上王如來應正遍知彼佛出
時亦如今日說三乘法時彼佛世有一比丘
有九弟子與諸弟子往詣佛塔禮拜佛像見
一寶像嚴顯可觀既敬禮已目諦視之說偈
讚歎隨壽修短各自命終既命終已生於東

量九

五

方寶威德上王佛國土在大蓮華結跏趺坐
忽然化生從此已後恒得值遇無量諸佛於
諸佛所淨修梵行得念佛三昧海既得此已
諸佛現前即與授記於十方面隨意作佛東
方善德佛者則我身是南方梅檀德佛西方
無量明佛北方相德佛東南方無憂德佛西
南方寶施佛西北方華德佛東北方三乘行
佛上方廣衆德佛下方明德佛如是等十方
佛世尊因由禮塔一讚偈故於十方面得成
爲佛豈異人乎我等十方佛是時十方佛從
空而下放千光明顯現色身白毫相光各各
皆坐釋迦佛牀各伸右手摩阿難頂告言法
子汝師和尚釋迦牟尼百千苦行無數精進
求佛智慧報得是身光明色相今爲汝說汝
持佛語爲未來世天龍大衆比丘比丘尼優

婆塞優婆夷廣說觀佛法及念佛三昧說是語已然後問訊釋迦文佛起居安隱既問訊已放大光明各還本國時會大眾見十方佛及諸菩薩國土大小如於明鏡見衆色像財首菩薩所散之華當文殊上即變化成四柱寶臺於其臺內有四世尊放身光明儼然而坐東方阿閼南方寶相西方無量壽北方微妙聲時四世尊以金蓮華散釋迦佛未至佛上化為華帳有萬億葉一一葉間百千化佛化佛放光光中復有無數化佛寶帳成已四佛世尊從空而下坐釋迦佛牀讚言善哉善哉釋迦牟尼乃能爲於未來之世濁惡衆生說三世佛白毫光相令諸衆生得滅罪咎所以者何念我昔曾空王佛所出家學道時四比丘共爲同學習學三世諸佛正法煩惱覆

量九

六

心不能堅持佛法寶藏多不善業當墮惡道空中聲言汝四比丘空王如來雖復涅槃汝之所犯謂無救者汝等今當入塔觀佛與佛在世等無有異我從空聲入塔觀像眉間毫相即作是念如來在世光明色身與此何異佛大人相願除我罪作是語已如太山崩五體投地懺悔諸罪觀佛眉間懺悔因緣從是已後八十億阿僧祇劫不墮惡道生生常見十方諸佛於諸佛所受持甚深念佛三昧得三昧已諸佛現前授我記荊東方有國國名妙喜彼土有佛號曰阿閼即第一比丘是南方有國國名歡喜佛號寶相即第二比丘是西方有國國名極樂佛號無量壽第三比丘是北方有國國名蓮華莊嚴佛號微妙聲第四比丘是時四如來各伸右手摩阿難頂告

言法子汝持佛語廣爲未來諸衆生說三說此已各放光明還歸本國財首菩薩所散諸華住阿難上者化成華雲遍滿十方一一雲間無數化佛各伸右手摩阿難頂告言法子諸佛如來所有化身亦如我等等無有異汝

量九

七

今親見當爲未來一切衆生廣分別說令諸衆生修行念佛若念佛者得見化佛與今無異若有衆生聞汝所說則爲見佛除無量罪爾時財首菩薩白佛言世尊我念過去無量世時有佛世尊亦名釋迦牟尼彼佛滅後有一王子名曰金幢憍慢邪見不信正法知識比丘名定自在告王子言世有佛像衆寶嚴飾極爲可愛可暫入塔觀佛形像時彼王子隨善友語入塔觀像見像相好白言比丘佛像端嚴猶尚如此況佛真身作是語已比丘

告言汝今見像若不能禮者當稱南無佛是時王子合掌恭敬稱南無佛還宮繫念念塔中像即於後夜夢見佛像見佛像故心大歡喜捨離邪見歸依三寶隨壽命終由前入塔稱南無佛因緣功德恒得值遇九百萬億那由他佛於諸佛所常勤精進逮得甚深念佛三昧三昧力故諸佛現前爲其授記從是已來百萬阿僧祇劫不墮惡道乃至今日獲得甚深首楞嚴三昧爾時王子今我財首是也如是等諸大菩薩其數無量各說本緣依念佛得如本生經說爾時世尊告諸大衆我念過去無數劫時爾時有佛號梅檀窟莊嚴如來應供正遍知明行足善逝世間解無上士調御丈夫天人師佛世尊十號具足在閻浮提諸德山中於彼山中出家學道足滿七劫

成阿耨多羅三藐三菩提爾時彼世有二童子多聞無厭遊行國界問諸婆羅門時有一婆羅門名牢度又伽告言童子世間有佛名梅檀窟汝等二人可詣彼所求論議法時二童子長者名爲一切喜見第二童子名勇猛鎧共詣佛所各持天華共散如來爾時世尊寂然禪定入三昧王三昧身心不動普現一切諸佛色身光明無數如般若波羅蜜所說時二童子見佛色身及見光明即時超越那由他恒河沙阿僧祇劫生死之罪恒得值遇無量無數百千諸佛於諸佛所修行甚深念佛三昧現前得見十方諸佛爲其演說不退法輪爾時第一童子豈異人乎今彌勒菩薩是第二童子今我釋迦牟尼是我與賢劫諸菩薩會於過去梅檀窟佛所聞是諸佛色身

變化觀佛三昧海以是因緣功德力故超越九百萬億阿僧祇劫生死之罪於此賢劫次第成佛最後樓至如來亦於此處說觀佛三昧佛告阿難此觀佛三昧是一切衆生犯罪者藥破戒者護失道者導盲冥者眼愚癡者慧黑闇者燈煩惱賊中是勇猛將諸佛世尊之所遊戲首楞嚴等諸大三昧始出生處佛告阿難汝今善持慎勿忘失過去未來三世諸佛是諸世尊皆說如是念佛三昧我與賢劫諸大菩薩因是念佛三昧力故得一切智威神自在如是十方無量諸佛皆由此法成三菩提爾時尊者阿難佛神力故自識宿命無數劫事白佛言世尊我念過去無數億劫有佛世尊名日月燈明十號具足我於彼世見佛如來放大光明其光徧照十方世界皆

作金色一一光中有諸化佛我見是已身心
歡喜稱南無佛從是已來常得值遇百千諸
佛說法猶如瀉水置於異器憶持不忘是故
我今得見世尊親自供侍作是語已說諸偈
頌讚歎諸佛微妙色身爾時空中有無數佛
皆現光明身身毛孔所出化佛如釋迦文皆
告阿難言法子汝今持是觀佛三昧廣爲一
切大衆分別令諸凡夫種見佛因說是語已
化佛不現爾時世尊爲囑此事故住立空中
威儀自在作十八變顯一切光告阿難言若
有衆生欲觀佛者當如此觀佛說是語時十
二億天子得念佛三昧現前受記

觀像品第九

爾時會中有菩薩摩訶薩名曰彌勒即從座
起偏袒右肩頂禮佛足脫身瓔珞奉上如來

以真珠華散佛世尊及文殊師利所散瓔珞
自然涌住於虛空中化成八萬億寶臺一一
臺中有百億釋迦文佛皆放光明普現色身
山林河海一切衆生所有妙色星宿日月諸
須彌山諸天龍神及諸宮殿亦於中現五通
神仙百億呪術九十六種諸邪見道醫方技
藝工巧文詠皆於一毛顯現此事世間邪見
穢欲衆生所希見者亦於光明悉自涌出地
獄畜生諸阿脩羅八難四倒諸不祥事受報
好醜亦於此相自得覺知所散珠華住佛上
者化作百億量九白色光明住文殊上者化作百
千億微妙色光此諸光明互相交絡如大龍
王蟠身相向一一光中五億寶光如僧伽梨
割截分明以金色光縫持令住縷出入處生
四寶華一一華中賢劫菩薩結跏趺坐十方

諸佛及諸化佛坐寶蓮華爲此賢劫諸大菩薩說般舟甚深三昧亦讚觀佛最初因緣惟無三昧念佛境界金剛譬定說是法已是諸如來各伸右手摩阿難頂告言法子汝今應當善持佛語慎勿忘失爾時彌勒菩薩白佛言世尊惟願天尊大慈大悲憐愍一切未來世中多有衆生造不善業佛不現在何所依怙可除罪咎佛告彌勒阿逸多諦聽諦聽善思念之如來滅後多有衆生以不見佛作諸惡法如是等人當令觀像若觀像者與觀我身等無有異說是語時空中有華十方諸佛住立空中叉手合掌讚言善哉佛子善問此事惟釋迦文救世苦者爲諸末後盲冥衆生說觀像法今正是時慎勿疑慮彌勒菩薩重更慇懃勸請世尊說觀像法爾時世尊放常

量九

十一

光明照尼拘樓陀精舍及十方國皆作金色佛神力故令金色地分爲二分一分中五百億佛從下方界皆自踊出住立空中合掌讚歎彌勒菩薩摩訶薩言善哉佛子乃能憐愍未來衆生生末法者勸請世尊說觀像相時諸化佛說此語已踊身虛空作十八變釋迦文佛即自微笑笑時口中生大蓮華其華有光如合百億日月星宿衆宿日月間百億化佛結跏趺坐坐師子牀爾時釋迦文佛告彌勒菩薩言諦聽諦聽善思念之如來今者爲未來世五苦衆生犯禁比丘不善惡人五逆誹謗行十六種惡律儀者爲如是等說除罪法爾時阿難白佛言世尊佛涅槃後此等愚人無依無怙無歸依處云何如來說除罪法佛告阿難汝於佛法心未具解如我在世

歸依我者名歸依佛名歸依法名歸依僧佛滅度後濁惡世中諸衆生等欲除罪咎欲於現世得須陀洹至阿羅漢欲發三菩提心欲解十二因緣當勤修習觀佛三昧阿難白佛言世尊如來在世衆生現見觀佛相好觀佛光明尚不了了況佛滅後佛不現在當云何觀佛告阿難佛滅度後現前無佛當觀佛像觀佛像者若比丘比丘尼優婆塞優婆夷天龍八部一切衆生欲觀像者先入佛塔以好香泥及諸瓦土塗地令淨隨其力能燒香散華供養佛像說已過惡禮佛懺悔如是伏心經一七日復至衆中塗掃僧地除諸糞穢向僧懺悔禮衆僧足復經七日如是供養心不疲厭若出家人應誦毗尼極令通利若在家人孝養父母恭敬師長調心令輒心若不輒

量九

十二

當強折伏令心調順如調象馬不令失御心柔順已住於靜處燒衆名香禮釋迦文而作是言南無大德我大和尚應正徧知大悲世尊願以慈雲覆護弟子作是語已五體投地泣淚像前從地而起齊整衣服結跏趺坐繫念一處隨前衆生繫心鼻端繫心額上繫心足指如是種種隨意繫念專置一處勿令馳散使心動搖心若動搖舉舌拄齟閉口閉目叉手端坐一日至七日令身安隱身安隱已然後想像樂逆觀者從像足指次第仰觀初觀足指繫心令專緣佛足指經一七日閉口閉目令了了見金像足指漸次復觀兩足趺上令了了見次觀鹿王睍心旣專已次第至髻從髻觀面若不明了復更懺悔倍自苦策以戒淨故見佛像面如真金鏡了了分明作

是觀已觀眉間毫如玻瓈珠右旋宛轉此相
現時見佛眉眼如天畫師之所畫作見是事
已次觀頂光令分明了了如是衆相名爲逆
觀順觀像者從佛頂上諸螺文間一一螺文
繫心諦觀令心了了見佛螺文猶如黑絲右

量九

十三

旋宛轉次觀佛面觀佛面已具足觀身漸下
至足如是往返凡十四徧諦觀一像極令了
了觀一成已出定入定恒見立像在行者前
見一了了復想二像見二像已次想三像乃
至想十皆令了了見十像已想一室內滿中
佛像間無空缺滿一室已復更精進燒香散
華掃塔塗地澡浴衆僧爲父母師長按摩調
身洗浴身體上塗足油四方乞食得好美者
先上師長分奉父母作是行已發大誓願我
今觀佛以此功德不願人天聲聞緣覺正欲

專求佛菩提道發是願已若實至心求大乘
者當行懺悔行懺悔已次行請佛行請佛已
次行隨喜行隨喜已次行迴向行迴向已次
行發願行發願已正身端坐繫念在前觀佛
境界令漸廣大一僧坊中滿中佛像方身丈
六足下蓮華圓光一尋及通身光摩尼燄相
及衆化佛化佛侍者光明衆色皆令了了一
僧坊已令心復廣一頃地中滿中佛像此想
成已心得安隱身體悅樂若行若立心想利
故見一頃地滿中佛像香華供具及諸幢幡
皆隨像行以心利故左右前後盡見像行心
漸廣大見百頃地滿中佛像開目閉目皆令
心想想想不絕心心相續如渴思飲此想成
已見一由旬滿中佛像漸增廣遠滿百由旬
見一切像三十二相八十隨形好皆悉炳然

此想成已想一閻浮提八千由旬滿中佛像
此想成已次想東方弗婆提界八千六十由
旬滿中佛像此想成已復想西方瞿耶尼界
廣八千九百由旬滿中佛像此想成已復觀
北方鬱單越界一萬六千由旬滿中佛像此
想成已復更廣遠見百閻浮提滿中佛像此
想成已見百億四天下滿中佛像念想成已
唯除食時除便轉時一切時中恒見佛像虛
空及地滿中佛像像相次間無空缺念想
成已身心歡喜倍加精進頂戴恭敬十二部
經於說法者起大師想於佛法僧起父母想
令心調柔不起瞋想設瞋恚時當於般若波
羅蜜前五體投地誠心懺悔如上所說五法
次第應行念想成已閉目叉手端坐正受更
作遠想滿十方界見一切像身純金色放大

光明若有犯戒作不善者先身犯戒及以今
身見諸佛像或黑或白以懺悔故漸見紅色
見紅色已漸見金色見金色已身心歡喜勸
請諸像使放光明起此想時念想利故見一
切像舉身毛孔皆放光明一一光明百億寶
色一一色中無量雜色微妙境界悉自涌出
此念想成名觀立像佛告阿難如是觀者名
爲正觀若異觀者名爲邪觀餘相現者別境
界出當疾除之作是觀者除却六十億劫生
死之罪亦名見佛於未來世心想利故值遇
賢劫千佛世尊爲其和尚於佛法中次第出
家一一佛所見佛身相了了分明聞佛說法
憶持不忘於星宿劫光明佛所現前受記羣
心觀像尚得如是無量功德況復繫念觀佛
眉間白毫相光說是語時大梵天王無量梵

衆持諸天華奉散世尊脫身瓔珞以奉上佛其華如雲在空中住所上瓔珞變成金臺於金臺中有金色光其光變爲七佛尊像端嚴微妙色相悉具螺髻梵王長跪合掌勸請世尊而作是言如來大悲慈愍衆生願爲來世盲冥衆生具足演說觀像想法令諸衆生依佛所說恒得值遇諸佛世尊得念佛三昧三昧力故令諸衆生遠離罪惡以罪滅故現見諸佛佛告梵王如是如是如汝所說爾時世尊復爲來世諸衆生故更說觀像坐法觀像坐者至心繫念令前立像足下生華此華生時當起想念令此大地作黃金色作七寶色隨想而現一一寶色黃金爲界一一界間生寶蓮華作此想時有寶蓮華千葉具足應想而現既見華已請諸想像令坐寶華衆像坐

時大地自然出大白光如瑠璃色白淨可愛衆白光間百億菩薩白如雪山從想像身毛孔中出一一菩薩身毛孔中出金色光其光如山百千金色閻浮檀金光明赫弈數不可知應想而現一一山頂有一想像高顯可觀閻浮檀金色其光大盛照十方界皆作金色見地及空亦作金色滿中金像金光金蓋金臺金華金旛見想菩薩純白玉色手執白拂有執白華當起想念極令鮮白若餘雜想異境界現當疾除滅若不除滅隨逐餘想隨他變九境界喜發風病此念佛想是大甘露利益衆生觀佛三昧如服良藥利益四大服此藥者不老不死佛告阿難若有衆生欲觀像坐當如是觀作是觀者名爲正觀若異觀者名爲邪觀若有衆生觀像坐者除五百億劫生死

之罪未來值遇賢劫千佛過賢劫已星宿劫中值遇諸佛數滿十萬一一佛所受持佛語身心安隱終不謬亂一一世尊現前授記過算數劫得成爲佛爾時世尊告阿難言若有衆生觀像坐已當觀像行觀像行者見十方界滿中像行虛空及地見一一像從座而起一一像起時五百億寶華一一華中有無數光一一光中無數化佛隨心想現坐像起立未起中間當動身時眉間白毫旋舒長短猶如眞佛放白光明爲百千色映飾金光衆白光間無數銀像身白銀色銀光銀華銀蓋銀旛銀臺悉皆是銀時衆金像與銀像俱動身欲起諸像齋中各生蓮華其蓮華中踊出無數百千化佛一一化佛放金色光照行者身是時行者入定之時自見已身三十六物惡

量九

十七

露不淨不淨現時當疾除滅而作是念三世諸佛身心清淨我今學佛眞淨法身此不淨觀從貪愛生虛僞不實用此觀爲作是念已當自觀身使諸不淨變爲白玉自見已身如白玉瓶內外俱空作是觀時宜服酥藥勿使身虛此想成時諸像皆起如前立住見像立時當作想念請像令行像旣行已步步之中足下生華成蓮華臺見十方界滿中行像供具妓樂諸天大衆恭敬圍遶行像放光照諸大衆令作金色銀像放光照諸大衆皆作銀色白玉菩薩放白玉光令諸大衆作白玉色雜色諸像放雜色光映飾其間此想成已更起想念請諸行像皆令以手悉摩我頭爾時諸像各伸右手摩行者頭是時衆像放大光明照行者身光照身時行者自見身黃金色

此想成已出定歡喜復更至心禮敬諸佛修諸功德以是功德迴向菩提爾時復當更起想念我今想見衆多金像行坐隨意未見神通起心作想請諸行像及菩薩像作十八變應念即作十八種變現滿十方一切衆像踊身空中作十八變威神自在普現色身令行者見見已歡喜請一切像令轉法輪應念即時一一衆像異口同音讚歎持戒讚歎念佛想聞此已心大歡喜復加精進以精進故心想得成心想成時見十方界一切大地山河石壁皆悉變化爲金剛地金剛地上涌出白光衆白光間無數化佛坐寶蓮華一一化佛放無數億百千光明一一光明復化無數百千化佛此想現時行者自見身諸毛孔出金色光遍照一切若餘境起當疾除滅如此心

量九

十八

想疾於猛風須臾之頃見無數化佛行者心利如明眼人執玻璃鏡自觀面像行者觀像亦復如是此想成已當作是念諸佛世尊住大寂滅身心清淨無來無去如我身者四大五陰所共合成如芭蕉樹中無堅實如水上沫如水中月如鏡中像如熱時燄如野馬行如捷闍婆城作是想已諸像尋滅有金色光於金光間有金佛影如鏡中像行住坐卧四威儀中現一切色此想成時當念如來戒身念戒身時見諸佛影眉間光明猶如白絲空中清淨至行者前行者見已當作是念釋迦牟尼多陀阿伽度阿羅訶三藐三佛陀過去世時以大戒身而自莊嚴是故今日得戒定慧解脫解脫知見作此念時釋迦文佛坐瑠璃窟身紫金色端嚴微妙與諸比丘菩薩大

衆以爲眷屬住行者前告言法子汝修觀佛三昧力故我以涅槃相力示汝色身令汝諦觀汝今坐禪不得多觀汝後世人多作諸惡但觀眉間白毫相光作此觀時所見境界如上所說爾時一念情無所著心大歡喜應時

即得念佛三昧念佛三昧者見佛色身了了

量九

十九

分明亦見佛心一切境界亦如上來觀佛心說亦見佛身一切光明亦如上觀佛身光說亦見佛身一切毛孔一一毛孔悉生八萬四千蓮華一一華中復有八萬四千化佛佛佛相次滿十方界爾時釋迦牟尼佛即伸右手摩行者頂一切化佛亦伸右手摩行者頂得此觀者名佛現前三昧亦名念佛三昧亦名觀佛色身三昧爾時諸佛異口同音各各皆爲行者說法雖未得道見佛聞法總持不失

此名凡夫念佛三昧得此三昧者剎那剎那頃恒見諸佛於念念頃聞佛說法所謂大乘方等經典一日一夜即得通利父母生身惱濁惡世以念佛故得聞總持捨身他世必得見佛於諸佛所得千萬億旋陀羅尼得陀羅尼已八十億佛各伸右手摩行者頂一一諸佛皆說決言汝念佛故過星宿劫得成爲佛身相光明與我無異說是語已八十億佛一時放光光中復有無量化佛一一化佛皆說是語佛告阿難如是衆法名觀像法若觀像法時自當更有無量百千諸勝境界如是觀者名爲正觀若異觀者名爲邪觀

觀佛三昧海經卷第九

觀佛三昧海經卷第十

量十

東晉天竺三藏法師佛陀跋陀羅譯

念七佛品第十

佛告阿難若有衆生觀像心成次當復觀過去七佛像觀七佛者當勤精進晝夜六時勤

量十

行六法端坐正受當樂少語除讀誦經廣演法教終不宣說無義之語常念諸佛心心相續乃至無有一念之間不見佛時心專精故不離佛日過去久遠有佛世尊名毗婆尸佛身高顯長六十由旬其佛圓光百二十由旬身紫金色八萬四千相一一相中八萬四千好一一好中無數金光一一光中有恒沙化佛一一化佛有恒沙色光一一光中無數諸天聲聞比丘菩薩大衆以爲侍者人人各持一大寶華華上皆有百千億寶摩尼網豔網

豔相次高百千丈以爲佛光是時佛身益更明顯如百千日照紫金山光明豔起化佛無數一一化佛猶如百億日月俱出令行者見毗婆尸佛偏袒右肩出金色臂摩行者頂告言法子汝行觀佛三昧得念佛心故我來證汝汝今可觀我真色身從一一相次第觀之汝當至心立金剛誓我等先昔行佛道時與汝無異爾時毗婆尸佛慰行人已即時化作大寶蓮華如須彌山佛在華上結跏趺坐爲於行者說念佛念法及說百億旋陀羅尼行者見已倍加歡喜敬禮彼佛彼佛告言若有衆生聞我名者禮拜我者除却五百億劫生死之罪汝今見我消除諸障礙得無量億旋陀羅尼於未來世當得作佛佛告阿難爾時行者見毗婆尸佛心歡喜故我與六佛現其

人前上坐毗婆尸爲此法子說念佛三昧尸
棄世尊身長四十二由旬身紫金色圓光四
十五由旬通身光明一百由旬其光網中無
數化佛及諸菩薩聲聞大衆諸天眷屬以爲
圍遶隨從佛後右旋宛轉是時行者見尸棄
佛更復增益無量百千陀羅尼門復更增廣
得見百千無數化佛於未來世過算數劫於
其中間恒得值遇諸佛世尊生菩薩家說是
語時復有無數百千天子聞是事已見佛色
身端嚴微妙同時皆發三菩提心毗舍世尊
舉身放光住行者前其佛身長三十二由旬
圓光四十二由旬通身光六十二由旬身紫
金色光明威相如前無異見此佛已復更增
進諸陀羅尼三昧門於未來世必定不疑生
諸佛家拘留孫佛亦放大光明住行者前其

佛身長二十五由旬圓光三十二由旬通身
光五十由旬相好具足如紫金山見此佛者
常生淨國不處胞胎臨命終時諸佛世尊必
來迎接拘那含牟尼佛放大光明住行者前
其佛身長二十由旬圓光三十由旬舉身光
長四十由旬光相具足見此佛者即得百億
諸三昧門無數陀羅尼若出定時常得諸佛
現前三昧如此三昧證明行者所以名諸佛
現前三昧者得此三昧出定入定行住坐卧
恒得覩見一切諸佛以妙色身現其人前迦
葉世尊放大光明住其人前佛長十六丈身
紫金色相好具足見此佛者得寂滅光無言
相三昧於未來世恒住大空三昧海中釋迦
牟尼佛身長丈六放紫金光住行者前彌勒
世尊身長十六丈如是諸佛各入普現色身

三昧現其人前令其行者心得歡喜以歡喜故是諸化佛各伸右手摩行者頂見七佛已見於彌勒見彌勒已賢劫菩薩一一次第逮及樓至各放光明住行者前時千菩薩各各讚歎念佛三昧及爲行者說諸菩薩性說諸菩薩解說諸菩薩慧是名因觀像心得念佛三昧佛告阿難佛滅度後佛諸弟子如是觀者是名正觀若異觀者名爲邪觀修此三昧者雖具煩惱不爲煩惱之所使也以是念佛三昧力故十方諸佛放大光明現其人前光明無比三界特尊佛說是語已時梵天王復更勸請願佛世尊說十方佛住行者前光明色相

念十方佛品第十一

佛告阿難云何行者觀十方佛觀十方佛者

東方爲始東方有世界國名寶安隱無量億寶有億千色以用合成佛號善德亦放無數光普照百千國亦與無數億分身諸化佛住於行者前身色如金山端嚴甚無比坐大金剛窟無數雜寶光莊嚴爲堂閣一堂閣前無量微塵數百億諸寶樹一一寶樹下八萬四千師子座一一師子座有一分身佛結跏趺坐三昧座於寶樹下善德佛世尊身長二百五十億那由他由旬一一身毛孔無數億微塵一切勝相好一一相好中有無數化佛一一化佛高顯巍巍如須彌山放大光明坐寶蓮華住虛空中分身諸佛各各開現微妙光明顯出無數百千化佛一一化佛坐寶蓮華一一蓮華有千幢幡一一幢幡演出百億微妙音聲是諸聲中教觀十方無數佛身此

相現時見十方界猶如金剛百億寶色不滅
不壞見此相已於諸佛前受法王子位如是
境界各性地菩薩南方梅檀德佛身相高顯
其佛國土瑠璃為地恒沙寶色於佛光中亦
有無數百千堂閣寶樹行列鋪師子座座上
諸佛結跏趺坐寶幢幡蓋說法音聲如佛海
三昧說西方無量明佛國土清淨黃金為地
五百億寶色佛身光明重閣講堂寶樹行列
寶師子座分身諸佛結跏趺坐坐寶樹下寶
幢幡中亦說念佛海北方相德佛其地玻璃
色有五百億寶光寶樹行列寶師子座重閣
講堂幢幡光明與彼無異東南方無憂德佛
其地七寶色一一色上有七百億雜色寶樹
行列重閣光明百億萬種一一光明說佛功
德海如佛海說西南方寶施佛其地五寶色

量十

五

一一寶上五百億光明一一光明化為五百
億蓮華雲一一蓮華雲上有百億重閣一一
重閣如百千萬億梵王宮一一梵王宮中無
數牀座光明蓮華所共合成是諸座上有諸
分身佛結跏趺坐演說諸佛大慈悲法光明
洞然亦說佛海西北方華德佛其佛國土瑠
璃玻瓈色一一色上有無數百千光一一光
化為五百億寶窟一一窟中無數寶蓋一一
蓋中百億光明一一光中無數分身佛結跏
趺坐放大光明其光明中說念佛三昧因念
佛三昧中復更得見無數諸佛東北方三乘
行佛其佛國土純白銀色百億萬光光有千
色莊嚴國界極令清淨分身化佛寶樹幢幡
行列莊嚴數不可知上方廣眾德佛其地五
百億寶色一一寶色無數光明一一光明化

爲無數百億化佛一一佛光中無量寶樹行列莊嚴一一樹下百億寶師子座諸佛在上結跏趺坐無數菩薩以爲侍者一切大衆皆悉住佛光明雲中下方明德佛其地金色金光金雲於光雲中無數金臺七寶樓閣百寶行樹羅列莊嚴寶幢幡蓋數億千萬一一樹下百億寶座諸堂樓閣無數坐具狀如寶華無數分身一切諸佛坐寶樹下瑠璃座上衆華色間無數佛會是諸世尊皆悉講說菩薩行法如是十方無數化佛一一化佛顯現光明時十方佛各各悉坐金剛窟中身量光明如善德佛及諸化佛威神國土令行者見如於明鏡自見面像了了分明見十方佛心歡喜故不染諸法住於初心時十方佛廣爲行者各說相似六波羅蜜聞是法已於初地下

量十

六

十心境界無有疑慮見此事者必聞諸佛說般若波羅蜜聞第一義空心不驚疑於諸法中得入空三昧是名相似空相三昧佛告阿難佛滅度後我諸弟子欲觀十方佛者於念佛三昧中但知麤相當自然知無量妙相如是觀者是名正觀若異觀者名爲邪觀得此觀者見佛無數不可限量入此定者名見一切諸佛色身亦得漸漸入三空門遊此空者諸佛力故心不著空於未來世當成阿耨多羅三藐三菩提得不退轉是名不忘菩提之心正順佛道說觀十方佛時十方佛坐金剛山百寶窟中各伸右手摩阿難頂告言法子汝持佛語爲未來世諸衆生等當廣宣說慎勿妄傳當爲堅發三菩提心行念佛定正受者說佛告阿難此念佛三昧若成就者有五

因緣何等爲五一者持戒不犯二者不起邪見三者不生憍慢四者不恚不嫉五者勇猛精進如救頭然行此五事正念諸佛微妙色身令心不退亦當讀誦大乘經典以此功德念佛力故疾疾得見無量諸佛見諸佛者獨一心淨不與他共應當供養十方諸佛云何供養是人出定入塔見像誦持經時若禮一佛當作是念正遍知諸佛心智無有限礙我今禮一佛即禮一切佛若思惟一佛即見一切佛見一一佛前有一行者接足爲禮皆是已身若以一華供養佛時當作是念諸佛法身功德無量不住不壞湛然常安我今以華奉獻諸佛願佛受之作是念已復當起想我所執華從草木生持此供養可用擬想即當作想身諸毛孔令一毛孔出無數華雲以此

華雲運想擬意供一切佛一一佛上化成華臺諸佛受之於十方界施作佛事供養香時亦復如是香烟香雲於十方界施作佛事作佛事已還成金臺住行者前若凡夫人欲供養者手擎香爐執華供養亦當起意作華香想當發是願願此華香滿十方界供養一切佛化佛并菩薩無數聲聞衆受此香華雲以爲光明臺廣於無邊界無量作佛事禮佛若坐禪起是供養心常當發是願願繒蓋幢幡音樂偈頌當作是願我今設此少分供具願此供具遍供十方一切諸佛諸佛受已於幢幡中化光明雲於妓樂中偈頌之中演妙法音作是願已坐時應想令身毛孔一一孔中作無量幢幡想一一幢幡中作無量偈頌雲想作是想時心如香鑪流出金色香烟香雲

身毛孔中如好華樹涌出阿僧祇無量雜華雲是諸華雲於十方界諸佛之上化爲一切諸供養具爾時當於身心分中起一切供養具想若得食飲若施人一錢當起空無我想檀波羅蜜如是等無量供養皆當起心從心想出供養十方一切諸佛是名坐時無量功德從心想海生如是坐時入深禪定無量境界諸三昧海但於心中出息入息念念想想相續不絕於一心中運其心意作無數供具雲上供諸佛下施一切作是念者名學普施此想成時漸漸減少諸煩惱結觀法無二相無相方故當得甚深六波羅蜜

密行品第十二

佛告阿難未來衆生其有得是念佛三昧者觀佛諸相好者得諸佛現前三昧者當教是

人密身口意莫起邪命莫生貢高若起邪命及貢高法當知此人是增上慢破滅佛法多使衆生起不善心亂和合僧顯異惑衆是惡魔伴如是惡人雖復念佛失甘露味此人生處以貢高故身恒卑小生下賤家貧窮諸衰

無量惡業以爲嚴飾如此種種衆多惡事常

自防護令永不生若起如是邪命業者此邪

命業猶如狂象壞蓮華池此邪命業亦復如

是壞敗善根佛告阿難有念佛者當自防護

勿令放逸念佛三昧人若不防護生貢高者

邪命惡風吹憍慢火燒滅善法善法者所謂

一切無量禪定諸念佛法從諸心想生是名

功德藏佛告阿難譬如長者多饒財寶唯有

一子長者自知將死不久以諸庫藏委付其

子其子得已隨意遊戲忽於一時值有王難

無量衆賊從四面來競取藏物不能遮護唯有一金乃是閻浮檀那紫金重十六兩金錠長短亦十六寸此金一兩價直餘寶百千萬兩爲賊所逼無奈金何即以穢物纏裹真金置泥團中衆賊見已不識是金脚踐而去賊去之後財主得金心大歡喜念佛三昧亦復如是當密藏之復次阿難譬如有人貧窮薄福依諸豪貴以存性命時有王子遇行出遊執大寶瓶於寶瓶內藏王印綬是時貧者詐來親附得王寶瓶擎持逃走王子覺已遣六大兵乘六黑象手執利劍疾走追之時持瓶人走入深草空野澤中見曠野澤滿中毒蛇四面吐毒吸持瓶者時貧窮人惶驚怖馳走東西蛇亦隨之無藏避處於空澤中見一大樹蒼鬱扶疎甚適其意頭戴寶瓶攀樹而

上既上樹已六兵乘象馳疾如風尋復來至貧人見已吞王寶印持瓶冠頭以手覆面坐貪惜故不忍見之時六黑象以鼻絞樹令樹蹣倒貧人落地身體散壞唯金印在寶瓶現光諸蛇見光四散馳走佛告阿難住念佛者心印不壞亦復如是復次阿難譬如長者多饒財寶無諸子息唯有一女是時長者年過百歲自知朽邁將死不久我此財寶無男兒故財應屬王作是思惟喚其女子密告之言我今有寶寶中上者當以遺汝汝得此寶密藏令堅莫令王知女受父勅持摩尼珠及諸珍寶藏之糞穢室家大小皆亦不知值世饑饉女夫告妻我家貧窮困於衣食汝可他行求自活處妻白夫言我父長者臨命終時以寶賜我今在某處君可取之時夫掘取大獲

珍寶并如意珠持如意珠燒香禮拜先發願
言爲我雨食隨語即雨百味飲食如是種種
隨意得寶時夫得已告其妻言卿如天女能
賜我寶汝藏此寶我尚不知況復他人佛告
阿難念佛三昧堅心不動亦復如是復次阿
難譬如有王暴虐違道民罹其毒人怨神怒
國大亢旱求請神祇不能得雨有臣白言大
王當知今此境內林藪之中有一仙士五通
無礙王可祈請令其九龍大王聞已欣踊無
量遣人詣林請仙人出仙神飛往大王殿前
高聲唱言大王無道諸天龍神皆悉散去不
護王國云何使我令請雨也王聞此語極懷
慚愧改悔先行所作惡事仙人知王心已輒
善應念誦呪神通力故天降甘雨地出涌泉
潤澤一切佛告阿難欲念佛者如王棄惡得

量十

十一

念佛者如善呪人復次阿難譬如力士自恃
大力數犯王法王遣五人收捕力士幽閉圜
圖五處枷鎖極令牢固奮力大怒舉體血現
枷鎖摧折踰牆逃逝到海岸邊解髻明珠持
雇船師船師語言如此白石海中無數我用
是爲力士長跪白船師言我此明珠有六種
色即以黃繒裹珠置之水中水即金色復還
收珠以白繒裹置之水中水即變白收取復
以綠繒裹置之水中水色變作綠瑠璃色收
取以碧繒裹置之水中水即變作真金精色
收取復以絳繒裹置之水中水即變作硨磲
色收取復以紫繒裹置之水中水即變成赤
金剛色水上復有紫摩尼光船師見已即留
寶珠以大寶輦輦勇猛士置大船上望風舉
帆疾如射箭到於彼岸到彼岸已心意泰然

安隱無懼大取珍寶報船師恩佛告阿難若念佛者如大力士挽心王鎖斷到慧彼岸復次阿難譬如劫欲盡時二日並出山林樹木河池枯涸三日出時衆色火起四日出時大海消滅三分留一五日出時大海竭盡六日出時須彌崩倒七日出時大地洞然乃至色界唯金剛山不可催破還住本際念佛三昧亦復如是行是定者住過去佛實際海中佛告阿難吾今欲與十方諸佛報念佛三昧恩爾時世尊說是語已及十方諸佛賢劫菩薩入一切色身光明三昧時諸佛身一一毛孔涌出衆多不可稱數微妙化佛雲是諸化佛結跏趺坐住立空中如是無數一切化佛各伸右手摩阿難頂及勅釋提桓因汝等二人持是妙法慎勿忘失爲未來世濁惡衆生滅

第十

十二

衆罪障故如來正遍知今於大衆中說一切佛身相爾時尊者阿難即從坐起頂禮佛足白佛言世尊當何名此經此法之要當云何持佛告阿難此經名繫想不動如是受持亦名觀佛白毫相如是受持亦名逆順觀如來身分亦名一一毛孔分別如來身分亦名觀三十二相八十隨形好諸智慧光明亦名觀佛三昧海亦名念佛三昧門亦名諸佛妙華莊嚴色身亦名說戒定慧解脫解脫知見十力四無所畏十八不共法果報所得微妙色身經汝好受持慎勿忘失佛說是語時比丘比丘尼優婆塞優婆夷及諸菩薩大衆天龍八部一切鬼神聞佛說是微妙身相有得須陀洹斯陀舍阿那含有得阿羅漢者有種辟支佛道因緣者有發阿耨多羅三藐三菩提

心者有得無生法忍者數甚衆多不可稱說
時諸大衆聞佛說法恭敬頂禮奉行佛語作
禮求退是時阿難即從座起合掌長跪白佛
言世尊如來今者一切身相皆已說竟唯不
顯說無見頂相惟願天尊少說頂相光明瑞
應令未來世凡愚衆生知佛勝相爾時世尊
即入頂三昧海令佛頂上肉髻之中一一毛
孔涌出瑠璃光其光如水螺文右旋遍滿十
方無數世界如百億世界微塵數海如是八
萬四千諸毛孔中皆出是水相一一水相復
過是百千萬倍數不可知是諸瑠璃水上生
衆多大寶蓮華華有無數百千億葉葉作無
數百千億寶色葉極小者遍覆三千大千世
界如是華上一一鬚間有無量阿僧祇百千
萬億恒河沙化佛一一化佛頂肉髻相流出

衆光亦復如是時諸佛身量同虛空不可得
知如是諸佛佛佛相次盡世界海際此相現
時於十方面各有百億微塵數菩薩身昇虛
空現大神變至釋迦牟尼佛所時諸菩薩以
佛神力故暫見一毛孔中少分瑞相應時即
得無量百千金剛相陀羅尼佛現是相時賢
劫千菩薩及十方諸佛皆現此相時會大衆
見此少分相者須陀洹人如剎那頃成阿羅
漢觀因緣者不緣諸緣成阿羅漢發心菩薩
超越境界增進甚深三昧海門住於性地無
生菩薩倍加增進無量勝法住首楞嚴三昧
佛告阿難佛滅度後濁惡世中若有衆生聞
佛勝相心不驚疑不生怖畏當知是人能滅
一切煩惱業障聞佛勝相生隨喜者除却千
億劫極重惡業後世生處不落三塗不生八

億劫極重惡業後世生處不落三塗不生八
難處佛說是語時長老憍陳如等諸大比丘
彌勒等諸大菩薩無量大衆聞佛所說皆大
歡喜頂戴奉行

觀佛三昧海經卷第十

量十

十四

音釋

鋌待鼎切 鋌金鋌也 藪蘇后切 圀圀郎丁切 魚魚名 涸水竭也